

**SEVENTH LEGISLATIVE ASSEMBLY OF MIZORAM
(SEVENTH SESSION)**

LIST OF BUSINESS

FOR TENTH SITTING ON MONDAY, THE 19th OCTOBER, 2015
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **Pu R. LALZIRLIANA**, Minister to lay on the Table of the House a Statement of Correction on the reply given on the 12th October, 2015 to Starred Question No. 178, Ballot No. 57 asked by Pu Lalruatkima regarding "Ex-Gratia leh Compensation Ground chungchang".
3. **Pu R. ROMAWIA**, Minister to lay on the Table of the House a copy of the Mizoram Registration Rules, 2015.

LEGISLATIVE BUSINESS

Bill for introduction, consideration and passing

4. **Pu LAL THANHAWLA**, Hon'ble Chief Minister to beg leave of the House to introduce "The Mizoram Clinical & Health Establishment (Regulation) (Repeal) Bill, 2015.

ALSO

to introduce the Bill

to move that the Bill be taken into consideration

AND

to move that the Bill be passed.

FINANCIAL BUSINESS

DISCUSSION AND VOTING ON DEMANDS

5. **Pu R. ROMAWIA**, Minister to submit to the Vote of the House various Demands under his charge.
6. **Pu H. ROHLUNA**, Minister to submit to the Vote of the House various Demands under his charge.

NGURTHANZUALA
Secretary

SPEAKER : Mi tha chuan a thinlung ro bawm tha ata thil thate a theh chhuak thin a; mi sual chuan a thinlung ro bawm chhia ata thil chhiate a theh chhuak thin; thinlunga khat liam chu a kain a sawi thin a ni si a.

(Luka 6:45)

Zawhna No. 148-na kan la ang a, a zawhna neitu MLA zahawm tak Pu Lalruatkima i lo sawm ang.

Pu LALRUATKIMA : Pu Speaker, ka Starred Question No. 148-na Home Department changtu Minister zahawm tak chhan atan:

- a) Chawngtea Police leh mipui inkara inhmuhthiam lohna kha engvanga thleng nge a nih?
- b) Police-te silai hmehpuah avanga nunna chan kha tunge? Hliam tuar engzat nge awm?
- c) Nunna chante ralna atan sorkarin zangnadawmna engzat nge a pek?
- d) Hliam tuarte chhawmdawlana/tanpuina pek an ni em? A nih chuan engzat nge pek an nih?
- e) Kha thil thleng kha a chhui chiang tur ruat a ni em?

*Speech not corrected

SPEAKER : Awle, Department neitu Minster zahawm tak Pu R. Lalzirliana chhang turin i lo sawm ang.

Pu R. LALZIRLIANA, MINISTER : Pu Speaker, MLA zahawm tak Pu Lalruatkima zawhna chhanna chu:

- a) Mizoram Chakma Student leh Young Chakma Association-te chuan NGO dangte nena tangkawpin an Joint Memorandum tipuitling tura CADC an nawr nan dt. 4/09/2015 khan Total Bandh Chawngteah huaihawt an tum a, Sorkar lamin nasa taka a ngen hnu pawha an sut duh loh avangin an hruaitute 'preventive arrest' in Chawngte Police Station-ah hren an ni a. An hruaitute hren hi thu delhkih awm lova chhuah tura ngen nan Chawngte P.S. hmaah mipui tam tak an pungkhawm a, an thinrim chuan Police Station luhchhuah tumin an beih tak avangin leh hnawhkian tumna te pawh a sawt tak loh avangin Magistrate duty phalnain 'firing in the air' thupek chhuah a ni ta a ni.
- b) Police-te silai hmehpuah avanga nunna chan chu Agosh Chakma a ni. Police silai hmehpuah avanga hliam tuar dang an awm lo.
- c) CADC leh Joint NGO te hian zangnadawmna atan ₹ 10 lakh in inremna an siam a, inremna ang hian ₹ 3.5 lakh pek phawt a ni a, pawisa awm ve leh a bak hi pek tur a ni.
- d) Hliam tuarte hi hliam tenau te te tuar an nih avangin sorkar damdawi inah a thlawna enkawl an nih tho avangin a hranpain an hliam tuar enkawl na tur hi pawisa pek a ni lo.
- e) Aw, ruat ni e. Kha thil thleng kha chhui chianga Magisterial Enquiry nei turin Pu J. Hmingthanmawia, District Magistrate, Lawngtlai District ruat a ni.

SPEAKER : Zawhbelhna Pu Lalruatkima.

Pu LALRUAKIMA : Pu Speaker, ka lawm e. Kha, Law & Order kenkawh chungchangah Chakma Autonomous District Council chhungah thil tih fuh tawk lo, hlawhchhamna kan neih zia a langin ka hria a. Kha thil thleng September ni 4, 2015 a nunna hlu tak mai chan a ni kha a pawl khawp mai a. Chutah chuanin, 'firing in the air', van vawr zawnga silai kahah nunna hlu tak mai chan civil mi a awm kha van vawr zawnga silai kah kha hrethiam lo kan police zingah an awm em ni?

Tin, zangnadawmna chungchangah helho kuta boralte pawh harsa takin cheng nuai 10, Office Memorandum Finance Department-in a tihchhuah angin kan pe a. Autonomous District Council chhungah cheng nuai sawm pek leh tho tur khan kan rel a. Kha kha eng dan tlawhchhanin nge zangnadawmna nuai sawm zet mai kha kan pek tih leh a chhui chiang tur report kha engtikah nge theh luh a nih dawn, engtikah nge, engtik hun chung nge chhui chian hun chung kha pek a nih tih kha ka'n zawh belh a ni.

*Speech not corrected

SPEAKER : Dr. K. Beichhua.

Dr. K. BEICHHUA : Pu Speaker, Chawngte buainaah khan in engzat chiah nge tih chhiat a nih tih ka zawhbelhna a ni a. Tin, sorkar thil tih chhiat a awm em? CEM bang ta mai kha buaina avanga bang em ni? tih ka zawhna a ni e.

SPEAKER : Zawhna dang a awm loh chuan Minister zahawm tak chhang turin i sawm ang.

Pu R. LALZIRLIANA, MINISTER : Pu Speaker, van vawr zawnga silai kah hi Magistrate te chuan an pek dan tur a ni a, engemaw reflect a awm nge ni, tin, van vawr zawng lo pawh khan kan vannei a, khalaia mite pawh kha an vannei a, a lawmawm khawp mai a. Police Station beih reng reng hi a beitate an awm a nih chuan anmahni lam hawi zawnga kah pawh kha an manual-ah hian, an danah hian a phal tlat mai a. Tin, self defence miin a neih theih nan chuan, PC hunah pawh khan kan hria a, an hmaiah hmarcha lo theh ula an chalah hreipuiin lo chek rawh u, tih te pawh kha mi an inchhungah an va kal a, va tih nat an tum a, tharum nena an tih chuan kha kha kan Indian Constitution-ah pawh hian a phalsak hrim hrim a. Chuvangin, kan police-te, sorkar kan vannei a, tin, khalaia va hualtute pawh kha an vannei ka ti a, thi an tlem kha a lawmawm khawpin ka hria.

Tin, helho kah leh sawlaia mipui pungkawm tih te kha chu han sawi zawm chi a ni lo hrim hrimin ka hria a. Helho ten ram venghim tura kal te an lo kah chu awlsam takin pek a nih pawhin a awm em em a. Sawlaia ram venghim turte anmahni zu bei tura law and order kengkawhtu tur anmahni zu bei tura zu kal te an lo kap palh hi dik tak chuan compensation hi pek miah awm loh ka ti a, kei chuan. Amaherawhchu, Chakma Autonomous District Council CEM kha helamah a

awm a, tumah sorkar hotute rawn lovin an Council atanga pek turin commitment a lo siam ve mai a ni.

Pu LALRUATKIMA : Pu Speaker, khawngaih takin, kan Minister zahawm tak khan a chhang fuh lo hretin ka hria, harsa takin helho laka nunna hlu tak chante kha pek an ni a, ka ti zawk a ni. Awlsam takin pek a ni a rawn ti zawk a. Kha kha chu min chhang fuh lo zawkin ka hria a. Chulai te chu a tawngkam kha record-ah khan a awm thei a ni a. Tin, eng dan tlawhchhanin nge kha kha pek a nih, ex-gratia cheng nuai sawm kha?

*Speech not corrected

Pu R. LALZIRLIANA, MINISTER : Kha kha chu an Council-ina an lo tih a nia, kha kha kan zu zawt lo.

Tichuan, report, hemi Magisterial Enquiry nei tura kan tih khan report a theh lut daih tawh a. Human Rights Commission-ah thawn ani tawh a ni. Tichuan, CEM banna chhan kha amah zawh loh chuan ka hre law, in hnaih viau bawk a in hre zawk lo'm ni tih mai kha ka chhanna chu a ni a.

Dr. K. BEICHHUA : Pu Speaker, Aizawlah ka awm ve daih a, ka va zawt ve thei bik si lova. In tihchhiat zat leh Sorkar thil tihchhiat kha ka zawhna pakhat zawk kha a ni a.

Pu R. LALZIRLIANA, MINISTER : In 17 a nih chu, ka va ngaihtuah zui vak lo va, a chhiat ngai ngaiin a la chhia aniang. Anmahnin enquiry te chu sawlaih Chakma Autonomous District Council an ni a, mahnia thuneihna nei ve an ni a, an duh leh an lo ti mai ang chu.

Dr. K. BEICHHUA : Pu Speaker, Sorkar thil tihchhiat a awm em tih ka zawhna kha min la chhang lo.

Pu LAL THANHAWLA, CHIEF MINISTER : Pu Speaker, District Council Office te pawh an tichhia a, dik tak chuan tun aia nasa zawk a hrem an phu a ni. Tin, joint NGO leh Chakma Student Association hruiatu kha sorkar hnathawk a ni a, engtinng a chungah hian action kan la lak ang tih pawh hi ngaihtuah a la ngai dawn a, khami Thana beihnaa ring leader kha sorkar hnathawk a ni a. Chuvangin, kha mipui sosangah khan politics a inrawlh a, an tum chu Chakma District Council kha a ni a. Tin, an duh ang an tih theih loh takah Police Station kha an bei leh a, tin, Police Station beih hi a thiango hrim hrim a, an thi tlem zawka tawngthu chheloah. Self-defence-ah chuan a tawpkhawk an thleng thiang ve a ni.

Tin, Chakma C.E.M ban nachhan kha Congress Legislature Party-ah majority a hloh a, khami buaina nen khan connection a nei lova, anmahni tualchhungah neuh neuh an nei ve a an

Leader, CEM khan Legislature Party confidence a hloh takah chuan dan pangaiin democratically in a bang a, aiawh an thlang tawh.

Pu LALRUATKIMA : Pu Speaker, engati nge a mawhphurtute kan hre tho si a, khati khawpa nunna chan leh house damage engemawzat awm si khan, kan hriat tho si kha chuan a mawhphurtu kha engatinge kan man mai loh, engati nge a chhan? tih kha ka'n zawh belh zawk a ni.
*Speech not corrected

Pu R. LALZIRLIANA, MINISTER : A mawhphurtu chu mipui an ni a khatah kha chuan, man tur a nih chuan 400/500 man a ngai ang a, a buaithlak angreng viau ang a. Sorkar property kha an tichhe nual a (interruption) (Pu K. Beichhua : Pu Speaker, he thil hi inhmusitna tawngkam a ni in ka hria, member te hi heti zawng hian tawnglo ila tha ka ti).

Kha kha chu i thu a ni lova, member-te thu thu a ni a. Hmanniah pawh dawt in sawi a titu kha a ni a, saw saw. Chuvangin, unparliamentarian a ni kha kha. Dawt kan tilo reng reng a, han en leh mah ula, thudiklo a sawi a ni ka ti a ni, Chuvangin, dawt rawn sawitu kha amah, Beichhua ngei hi a ni e.

Pu LARUATKIMA : Pu Speaker, 'member zahawm tak' tih hi parliamentarian ten kan tih tur niin ka hria a, keini first timer chauh kan ni a, kan tawng sual nasa a. Amaherawhchu, kan senior te'n a hmingmerh a kan in ko lawl lawl hi chu he House zahawm tak ti zahawmlo theitu kan nih avangin khawngaih takin tunhnuah chuan awm tawhlo se la. House record atang hian Pu Speaker, i nawtreh ang u. Tunah I nawtreh dawn lo a nih chuan keini tan chuan a fel thei dawn lo a ni. (Speaker : Tawk rawh se aw). Tawk rawh se kan ti zel a, helai a hmingmerha nalh lo tak taka in koh fo kha naupang zawk pawh ni ila House record a awm atan a mawi lo. Pu Speaker, tunhnuah chuan thleng tawh lo se ka duh khawp mai.

*Speech not corrected

SPEAKER : Zawhna no.149-na neitu Dr. Ngurdingliana zawt turin i sawm ang.

Dr. NGURDINGLIANA : Pu Speaker, ka lawm e. Hun ka la reilo ang a, a chhan chu, Fisheries Department changtu Minister zahawm takin demand-ah khan min rawn hrilhfiah tawk tawhin ka hria a. Midang tan hun ka'n kian zawk ang e. Ka lawm e.

SPEAKER : I zawt lo mai ang maw? (Dr. Ngurdingliana : zawt lo ang). A nih chuan a lawmawm e. 150-naah kan kal thei ta. Zawhna neitu kan MLA zahawm tak Dr. K. Beichhua i sawm ang.

Dr. K. BEICHHUA : Pu Speaker, ka lawm e. Health & Family Welfare Deptt. changtu Minister zahawm tak ka zawhna chu-

- (a) Kum 2013-2014 leh 2015-2016 April to August thla thleng hian mi raipuar JSY dawng thei tura in register Mizoramah engzat nge awm?
- (b) District tinah in register engzat nge?
- (c) District tinah mi engzat nge dawng?
- (d) District tinah state hian hemi atan pawisa cheng engzat theuh nge a release?
- (e) District tina ASHA in a sum dawn zat percentage leh nu ina a dawn percentage engzat nge?

SPEAKER : Awle, Department changtu House Leader zahawm tak chhang turin i sawm ang.

Pu LAL THANHAWLA, CHIEF MINISTER : Pu Speaker, kan member zahawm tak Pu K. Beichhua zawhna, Starred Question 150-na chhanna chu-

(a) 43,792

(b)	Aizawl East	-	10,604
	Aizawl West	-	7181
	Champhai	-	6398
	Kolasib	-	4185
	Lawngtlai	-	3085
	Lunglei	-	3978
	Mamit	-	2962
	Saiha	-	2813
	Serchhip	-	2586

(c)	Aizawl East	-	10,604
	Aizawl West	-	6380
	Champhai	-	2711
	Kolasib	-	1525
	Lawngtlai	-	1181
	Lunglei	-	2743
	Mamit	-	1036
	Saiha	-	946
	Serchhip	-	1203

(d) District Hming	2013-14	2014-15	2015-16(upto Aug)
	<u>(₹ In lakhs)</u>	<u>(₹ In lakhs)</u>	<u>(₹ In lakhs)</u>
Aizawl East	15,00,000	13,00,000	4,50,000
Aizawl West	58,00,000	16,50,000	5,50,000
Champhai	19,00,000	11,50,000	4,50,000

Kolasib	14,50,000	7,50,000	2,50,000
Lawngtlai	6,00,000	4,75,000	2,50,000
Lunglei	10,50,000	11,00,000	3,00,000
Mamit	5,00,000	4,75,000	2,50,000

August thla thleng Rs 2,50,000/-

Distict Hming	2013-14 (₹ in lakhs)	2014-15 (₹ in lakhs)	2015-16 upto August (₹ in lakhs)
Saiha	7,00,000	5,50,000	2,50,000
Serchhip	8,00,000	5,50,000	2,50,000

e)

		2014-15	2015-16
Aizawl East	ASHA	61% Nu	35%
Aizawl West	ASHA	12.5% Nu	20%
Champhai	ASHA	39% Nu	41%
Kolasib	ASHA	24% Nu	24%
Lawngtlai	ASHA	15% Nu	18%
Lunglei	ASHA	18.5% Nu	24%
Mamit	ASHA	43% Nu	46%
Saiha	ASHA	6.5% Nu	9%
Serchhip	ASHA	40% Nu	77%

JSY DAWNGTHEI TURA IN REGISTER AUGUST THLENGA LA DAWNGLO ZAT :

District	Mother	ASHA	Total
Aizawl East	424	575	999
Aizawl West	4879	3269	8148
Champhai	762	838	1600
Kolasib	1380	1267	2647
Lawngtlai	162	160	322
Lunglei	623	503	1126
Mamit	120	80	200
Saiha	443	443	886
Serchhip	236	310	546
TOTAL	9029	7445	16474

JSY dawng thei turten a hun taka an dawn loh chhan hi Fund indaihloh vang a ni a. Central atanga kan mamawh Fund a hun taka kan dawn thin loh avangin District hrang hrangah JSY Fund hi an mamawh ang zat pek theih a ni rih lova, pawisa kan dawn veleh district hrang hrangah an mamawh hnem dan azirin sem darh thin a ni. Fund indaih veleh ala dawng lote pawh dawn tir zel tum a ni, Pu Speaker.

SPEAKER : A neitu Dr K. Beichhua.

DR. K. BEICHHUA : Pu Speaker, zawhbelhna turte pawh a rawn sawi nual a, a lawmawm a. Chutih laia la chiang lo deuh hleka ka hriat chu ASHA-te hi hlawh nei lova, anmahni tlawmngaihna ti ta ila, chutiang deuhva khawtlang rawngbawl an ni a. Henga an chan tur te te angte hi hamthatna an dawn ve na awmchhun a ni. Chutih lai chuan Saiha District hi ngatinge khati em em a a hniam tih kha ka zawhna a ni e. 2014-15 ah 6.5% leh 2015-16 ah 9% chauh a ni e, kha kha engvanga khatianga hniam ta mai nge tih kha, district dang nena compare khan a hniam lutuk a ni.

SPEAKER : Er. Lalrinawma

Er. LALRINAWMA : Pu Speaker, ka lawm e. A relevant tho chuan ka hria a, hmanni ah damdawi inah kan kal a. Sairang pa hi rulin a chuk a, tichuan a thisenah zu an hmu an tih avang khan RSBY hman kha an phal ta hlek lo mai a. Chu mai piah lamah kan bialah pa pakhat a tlu a, stroke a ni ang chu, an rawn phur thla a, an han zawt a, 'Zu i in ngai em?' an ti a, 'In ngai e' a ti a, chu pawh chu RSBY card kha hman an phal leh ta bawk si lova. Hmanniah khan zawhna chhannna ah khan mi 50,000 chuang zet MLPC Act hnuaiyah zu lei theihna permit nei kan awm a. Heng MLPC Act hnuaiya zu permit lei theihna nei te hian RSBY card hi an hman ve thei em tih hi kan zawt duh a ni. A chhan chu rul chuk leh helaiah zu kha chu a in kaihnnawih tawh lo reng reng a, a buaithlak khawp mai he thil hi. Chuvang chuan, Pu Speaker, helai hi min han chhan sak se, Zoram mipuiin kan buaipui a ni tunah hian tih kha kan sawi duh a ni.

SPEAKER : A chhan thiam chuan chhang sela. Chief Minister zahawm tak i sawm ang. Awle, zawt law law rawh.

Pu LALRUATKIMA : Pu Speaker, Health Department hi technical thil a tam a, keni ang mimawl deuh tan chuan hriatfiah loh te pawh a tam mai a, project hrang hrangah te hian. JSY hi engtihna nge? tih leh ASHA hi engtihna nge, enge a awmzia? tih kha kan Minister zahawm tak kha kan zawt tel teh ang.

*Speech not corrected

SPEAKER : A vai khan Chief Minister-in chhang se.

Pu LALRINLIANA SAILO : Pu Speaker, a zawh theih em? (SPEAKER : A pawl love.) Janani Suraksha Yojana hi tunah hianin Central atangin sawrkar hianin priority a rawn pe zel em tih kan zawt teh ang.

SPEAKER : House Leader zahawm tak chhang turin i sawm ang, Department neitu.

Pu LAL THANHAWLA, CHIEF MINISTER : Pu Speaker, member zahawm tak Health Minister hmasa in JSY kha chu a rawn chhang tawh a. Kei chu Hindi te a ni a, Hindi ka thiam lo a, ka lo hre vak lo a, min rawn chhan sak a, ka lawm hle mai.

Tin, ASHA hi nu nau neitur te voluntary ang deuh a tanpuitu ni maw ka ti mai a, ka hre vak lova. Vainu ho hian hmingah an nei chawh a, ASHA hi, chutiang chu nge ni ka hre lova. Engpawh nise, ASHA ho hi an tangkai khawp a, amaherawhchu, hmun tam takah hian an tangkai tur angin kan hmang tangkai lo niin ka hria a, a mimal tak chuan. Nau nei te leh khatiang vel tha taka an neih theihna tur atana tanpuitu tur an ni tlangpui a.

Tin, Saiha bik, rul chuk tih velte kha, ni e, zu in zawng zawng rul chuk damdawi ina enkawl theih loh a nih dawn chuan a buaithlak dawn khawp mai a. Ngatinge rul chukte dawmdawi inah in enkawl duh loh tih ka lo ang e. Khatiang dan a awm kha ka hre lova. Dr.Thanchungnunga kha chu rulin a chuk a, amah leh amah khan a kher chhuak a, a dam mai a.

Er. LALRINAWMA : RSBY card MLPC Act hnuaia zu permit nei khan an hmang thei em ka tih laia chu – khami rul chuk a kha an harsa a, RSBY card an nei a. Amaherawhchu, a thisenah khan zu an lo hmuh avang khan an enkawl thei lo ta ringawt mai a ni. RSBY card tangkai tak kha an hmang thei lo ta a ni. Chulai zawk chu a nia.

Pu LAL THANHAWLA, CHIEF MINISTER : An diklo a ni mai thei Pu Speaker. Zu kha lo in lo se a thihpui nghal mai thei a, zu khan a lo counteract ve mai thei bawh a, rul tur kha. Chuvangin zu a lo in hlauh kha lawmpui zawk awm tak a ni a. A chhan chu zu power khan rul tur kha a tihdal avangin a thihpui nghal lo pawh a ni ve thei tho a ni. Chu chu an la analyse a ngaih ka ring hle mai.

Pu K. SANGTHUAMA : Tilai khan, khawngaihin ka bialah khuan tuna an rawn sawi ang khan nikhaw hrelon a awm reng mai a. Chu chu Civil Hospital-a ka han kal pawhin nitina an enkawl ve na pawisa kha an titawp hmak mai a. Khilalah pawh ka sawi a, enge kal zel ka hre lova. Khawngaihin min chhut zui sak zel theih chuan a lawmawm ngawt ang.

Pu LAL THANHAWLA, CHIEF MINISTER : Chulai dan chu ka hre lo va Pu Speaker. Engpawh nise damlo leh na tuar damdawi Ina an hruai kha chu a chhan leh vang chu engpawh lo ni se damdawi In chuan an enkawl tur niin ka ring a. Humanitarian ground avang

ringawt pawhin. Chuvangin doctor duty kha an diklo a nih ka ring. Zu in, rulin a chuk a, enkawl loh tur tih khawvel danah a awm ka ring chiah lo va, a awm leh awm loh ka lo zawng ang a, chutiang chu fiah a tulin ka ring a. Damdawi In te leh damdawi Ina thawkte hi chu missionary rilru pua hmangaihna nen, lainatna nena enkawl tura beisei an ni a. Chutiang an tih loh chuan an diklo tihna a ni a. Chuvangin enfiah pawh a ngaiin ka ring.

Tin, Saiha bika percentage a tlemna kha, a zawttu hi doctor, mithiam a ni a, a hre mai thei a, Saiha chhuak a ni bawk a. Amaherawhchu, ka rin danin ASHA hi a nih tur angin an hmang tangkai lo a ni ang em aw, tih kha ka ring zawk a. A chhan chu tunhma pawh khan duh angin an hmang tangkai lo va, hmang tangkai turin an Minister-te leh a thawktute hian anni ho kha hrilhfiaha ti turin ka ti a.

Tin, khatia a tlem zawkah chuan Serchhip pawh hi a tam viau lo va, population azirte pawh a ni thei a, tin, population tlem avangte pawh a ni thei a. Pu Speaker, chuloah chuan ASHA-te hman tangkai nachang hriat leh hriat loh hi a pawimawh hlein ka ring a. Chungah pawh chuan an nih tur ang leh hman tangkai tur angin an hmang tangkai rih lo pawh a ni ve thei tho a ni.

Dr.K.BEICHHUA : Pu Speaker, question-a ka lo zawh nachhan pawh kha han en ta ila, District tinin sum a dawn zat percentage ka rawn tih kher kherna kha. Percentage a nih kha chuan sum kan pek zah leh mihring zah kha a percent engzatnge sum kan pek tihna a ni ta a. Chuvang chuan sum chu hetia han ngaihtuah chuan a awm hmel a, a dawngtu kha kan pe tlem ta a ni. Chuvang chuan IMR a tam a, Saiha phei chu, MMR- te pawh a tam berna district a ni. District dang ngaihtuah khan a hniam fal em em mai a ni. Chuvang chuan kan Chief Minister zahawm tak khan helai hi khawngaih takin assurance min pe thei se, lo enchiang turin, tih kha ka rawn thlen e.

Pu LAL THANHAWLA, CHIEF MINISTER : RSBY te, JSY-te hi a hmang thei tu tur hi duh angin an tam lo va. Tuktina min rawn hmu, ka dam lova, chuti/khati ti ang chite pawh hi RSBY in register leh register- lote leh a dang dangte pawh ka lo zawt ziah a ni. Awareness a tlem avangin in register nachang hrelote pawh an awm a ni mai thei e. Mahse thahnemngaihna avangin Zokhuua zin changte hian kan V/C-te hnenah pawh hian tlangaua thahnemngai taka nakina mamawh leh si turte chu in register nachang hre turin kan ti thin a. Chuvangin JSY-ah pawh hian awareness a tlem avanga in register an tam loh vangte pawh a ni ve thei tho a, percentage tlem hi.

Tin, member zahawm tak Dr.K.Beichhua in a sawi IMR leh MMR chhim lampangah a bikin sawlai district-ah te a hniam hi tunhma atang tawhin Health Department hian hnarmawhah a nei ve a. A theih chin ang angah chuan theihpatawp a la a, tunah pawh a bik taka tan lak dan tur scheme-te pawh an siamin ka hria a. Tin, national level-ah pawh min pawt hniamtu a nih avangin Central Ministry lam atang pawhin tan la tura intihna te leh keini pawhin tan kan lak theihna tur atan a tul ang anga min rawn tanpui turin an lo ti tawh thin a. Chutiang chuan theihpatawp chhuah mek a ni.

Tin, rul chuk, khatia an lo ti kha thil vanduaithlak tak a ni a, paw ka ti a. Rul chuk a te hnenah pawh khan kan Health Department lam hian ngaihdam a dil tur a ni ang em aw, tih te ka ngaihtuah a. A natna chhan kha engpawh nise langin medical care kha chu an phu ve hrim hrim a ni, an damloh avang khan. Chutiang chu a ni a, chuvangin thil vanduaithlak tak a ni tih he House-ah hian ka'n sawi duh ve hrim hrim a ni.

Tun laiin vaihlo zuk leh hmuam avang te, kuhva ei nasat avangte leh ei leh ina kan fimkhur loh avang ten cancer a tam an ti a. Vaihlo zuk leh hmuam phei hi chu a chhan nasa berah an puh Chiang a. Khawvelah zu leh sa leh accident-a thi ai pawhin an tam zawk nghe nghe a ni, an ti a. World Health Organization-te chuan. Chuvangin vaihlo zuk leh hmuam i sim loha kuhva i ei teuh teuh avangin i cancer a ni, sorkar mawh a nilo e, kan enkawl thei lo che, ti se, chung nen chuan a inang reng a. An dik lo hul hual a ni, chuvang chuan he House-ah hian thupha ka chawi e.

Dr.K.BEICHHUA : Pu Speaker, percent kha chu nau nei tawh an pek tur ngawih ngawih 6.5 % kha a ni. Chuvang chuan an pe tlem hle tih kha kan Chief Minister-in min hriat sak chu a tha ang e.

S P E A K E R : Khawngaihin duh tawh mai rawh u, tlawmngai rawh u. Unstarred question zawk tur a nia, Starred-ah kan lo dah palh a, hetiang khawpa chhanna sei dun hi chu Unstarred tur a ni, hrethiam mai rawh u. 151-naah kan kal ang.

Er.LALRINAWMA : Pu Speaker, khawngaihin thil pakhat chiah damdawi In kha chuan an enkawl a, dawmdawi In kha kan timualpho dawn niin ka hria a. A ni lova, damdawi In chuan an enkawl a ni kha rul chuk a kha. Amaherawhchu, RSBY beneficiaries an nihna kha, a thisenah zu an hmuh avang khan an paih zawk ka sawina a ni khalai kha. Damdawi In kha kan timualpho thei dawna ka hriat avangin ka'n sawifiah a ni. Damdawi In chuan an enkawl, amaherawhchu, RSBY beneficiaries an nihna lai kha an hmang thei ta lo a ni, tih lai zawk kha a ni.

Pu LAL THANHAWLA, CHIEF MINISTER : Danin a phal leh phal loh kha chu tunah ka hre mai lova. Engpawh nise, an enkawl tho chuan kha kha chu an enkawl tur a ni mai a. RSBY claim leh claim loh kha chu an in register leh register loh te pawh a ni ang a, tin, a chi dang pawh kha, chutiang zawk chu a ni.

Engpawh nise, nau chungchangah pawh khan ASHA hi tun aia hmang tangkai tura nau nei turte leh nau nei mekte kan hriattir a, kan hrilhfiyah a ngai hle a. Mahni bial theuhah tan lak pawh a pawimawh khawp ang.

S P E A K E R : Nakinah chuan hetiang chhanna sei tak mamawh hi chu Starred Question-ah dah tawh loh tur tih kha hria ila a tha ang e. Tunah hian zawhna no. 151-na neitu MLA zahawm tak Pu Lalruatkima zawt turin ilo sawm ang.

Pu LALRUATKIMA : Pu Speaker, ka lawm e. Ka Starred Question No. 151 na Health & Family Welfare Department changtu Minister zahawm tak chhan atan -

- (a) Aizawl Civil Hospital hi Computerised a ni tawh em? A nih chuan engtik atang khan nge Computerised a nih?
- (b) Computerisation atan sum khawi atangin nge hmuh a nih a, engzatnge hman a nih ?
- (c) Tender engtikah nge chhuah a nih a, tunge Contractor atana thlan ?
- (d) Aizawl Civil Hospital Computerisation hi engtikah nge zawh fel a nih? tih ka zawt e.

*Speech not corrected

S P E A K E R : Le, Department neitu kan House Leader chhang turin ilo sawm ang.

Pu LAL THANHAWLA, CHIEF MINISTER : Pu Speaker, member zahawm tak Pu Lalruatkima Starred Question No. 151 na chhanna chu -

- (a) Civil Hospital, Aizawl hi Computerised tawh a ni a, Dt. 29.3.2013 ah project zawh fel niin tunah hian tangkai takin an hmang a ni.
- (b) Hospital Management Information System (HMIS), Civil Hospital Aizawl tan North Eastern Council atangin a hnuaia tarlan ang hian hmuh a ni.

Year of Sanction	-	2011
Approved Cost	-	₹ 466.51 lakh
Sanctioned amount – NEC	-	₹ 419.86 lakh
State	-	₹ 46.64 lakh
A vaiin	-	<u>₹ 466.50 lakh</u> a ni.
- (c) Tender hi chhuah a ni lova, Government of Mizoram phalna hmangin vide No.B.16015/3/09- HFW Dt. 24.3.2011 angin, SPECTRA Consultancy Pvt. Ltd Kolkatta te thawh tir an ni.
- (d) Dt. 29.3.2013-ah Completion Certificate pek a ni.

S P E A K E R : Zawhbelhna, a neitu Pu Lalruatkima.

Pu LALRUATKIMA : Pu Speaker, Government-in tender chhuah lovin pekna turin phalna a pe a, khalaiah khanin kan House Leader zahawm tak hianin a hriat leh hriat loh ka hre lova, Chief Minister laina hnai tak hianin a thawk niin a lang a. Chuvang chuanin hei hi a thawh duh vang hianin Government approval sanction hi pek a ni ta a mi?, tender lo tur hian, tih ka zawhna a ni a. Tin, hetih lai hianin Mizoramah ICT kan nei a, chumi hnuaiah chuanin ZENICS te pawh an awm a, engatinge SPECTRA kher kha thlan an nih? ZENICS te khan an thawk ve thei lo em ni? tih kha ka zawh belhna a ni e.

*Speech not corrected

S P E A K E R : Hriatsa in zawt a nih hmel a, midang zawhna nei in awm chuan, aw Pu Beichhua.

Dr. K.BEICHHUA : Pu Speaker ka lawm e. DPR hi siam ngei a nih ka ring a, tunge DPR hi siam tih leh Completion pe tur hian Directorate emaw, Medical Superintendent hnuaiah hian Computer lama expert kan nei em? tih a ni bawk a. Tin, he hna hi Directorate in nge vil Civil Hospital, Aizawl? tih kha ka zawhna a ni bawk a. Tunah hian Kulikawn leh Cancer Institute ah hian Internet la connect loh a ni a. A project-ah chuan ka hriat dan chuan tel tura an tih niin ka hria a. Internet connection a la awm lova, Internet connection la zo si lo, completion hi engtia pek nge an nih? tih hi ka zawhna a ni e.

S P E A K E R : Zawhbelhna dang a awm loh chuan House Leader-in a chhang ang a, lo zawh belh tawh suh u, a tawpna a ni ang.

Pu LAL THANHAWLA, CHIEF MINISTER : Pu Speaker, SPECTRA Consultancy Pvt. Ltd Kolkata hi Chief Minister laichin hnai tak ta anih ka hre ngai lova, Chief Minister laichin hnaite zingah hetiang hi an awm leh awm loh ka lo zawng ang e.

Pu LALRUATKIMA : Pu Speaker, SPECTRA ah khan a neitu lam a ni lova, a thawktu tak tak chu Spectra anih rualin a material supply leh engemawah khanin hlawkna tel kha kan Chief Minister zahawm takte chhungkaw hnai anih a rinawm a, a hriatpuia tih a nih avangin an duhlo em ni ni ta, tih kha ka zawt ani. He thila hi a lokal a SPECTRA kha an thlang ringawt a, comparative statement engmah awm lovin, (SPEAKER :A chhang dawn a lawm). A laichinte SPECTRA ah an awm tih lam ka sawi lova.

*Speech not corrected

Pu LAL THANHAWLA, CHIEF MINISTER : Pu Speaker, SPECTRA company hi Mizoram sorkarin pawmte an ni a, Finance Department pawhina a empanelled an ni a. Mizoram sorkar hian a duh duh a pe thei a, an ni chuan sub-contract emaw an duh duh an chhawr thei, sorkarin thu a va nei miah lo tih hi he House zahawm tak hi ka hriattir duh a ni. Tunah hian contractor hnenah leilaih tur an pe a, kha contractor khan a duh chuan labour ah pawh sub-contract pawhin tupawh a pe chhawng thei a, a chhawr thei a, engineer pawh a duh duh a chhawr thei a, chu chu sorkar thu a ni tawh ngai lo a ni, tih hi he House zahawm tak hian kan hriat ka beisei.

Tin, Mizoram Clinical & Health Establishment and Regulation Repeal Bill, heng angte pawh hi kan nei a, heng angte pawh hi a tul anga hman tangkai a ni a. Engpawh nise Pu Speaker, computerised kan duh a, kan la ti zel pawhin ka ring a, chuvangin a competent leh a tha apiang leh hmelhriat tawhsa kha hmelhriat ngai loh ai chuan kan Department hrang hrangte pawh hi chutiang zawng chuan an kal zel pawh ka ring a.

Amaherawhchu, Mizoram sorkar-ah empanel an ni em tih te leh khatiang zawng a department hrang hrang ten an hriat ani em tih te a ngai a. Tin, consultancy firm te pawh hi empanel kan nei a, empanel lo chu sorkar department hian tumah an hmang ngai lo a ni.

S P E A K E R : Awle, zawhna number 152-naah kan kal ang a, Pu Lalthanliana zawt turin ilo sawm ang.

Pu LALTHANLIANA : Pu Speaker, ka lawm e. Health & Family Welfare Department changtu Minister zahawm tak chhan atana ka zawhna chu -

- (a) Mizoram chhunga private damdawi ina inenkawl man te hi sawrkarin a bithliah nge? Anmahniin an insiam ve mai?
- (b) The Mizoram Clinical Establishment Rules-te kan lo nei ve ta bawk a, hemi dan hmang hian damdawi ina inenkawlna man te hi inang tlang leh mumal deuh zawkin a siam ve thei ang em?

S P E A K E R : Chhang turin department neitu House Leader ilo sawm ang.

Pu LAL THANHAWLA, CHIEF MINISTER : Pu Speaker, member zahawm tak Pu Lalthanliana Starred Question 152 na chhanna chu -

- (a) Private damdawiin a in enkawlna man te hi Sorkarin a bithliah lova. An damdawiina awm te, an awmman leh ilo te sorkarin a bithliah lo a ni.
- (b) The Mizoram Clinical Establishment (Registration & Regulation) Rules, 2014 hi Section 6 leh Annexure – I a a lan danin damdawiin a inenkawlna man a ni lova, provisional emaw permanent registration, renewal/duplicate certificate, change of ownership atana fee lak tur a duan zawk a ni e.

S P E A K E R : Zawhbelhna.

Dr. K.BEICHHUA : Pu Speaker, zawhbelhna ka siam leh ang a, chhantir lova min liam tir leh mai chuan a uihawm viau dawn in ka hria. Mizoram ah Accreditation Board din ani em? Board din ni ta se tunge member? Accreditation Board hian heng hospital te hi inspection a nei thin em? Hospital waste heng bawhlhawh te te ang chi natna theh darh tu hlauhawm tak a ni a, heng te hi eng anga separate nge an nih tih kha ka zawhna a ni e.

S P E A K E R : Pu Rinawma, zawt nghal sela.

Er.LALRINAWMA : Pu Speaker, ka lawm e. Chumi hmam hei RSBY bawk kha sawi ila, tunah hian a tangkai em em a BPL ten an nei a, amaherawhchu, thingtlang atanga damlo rawn kal tam zawk hian Civil leh Durtlang kan pan tlangpui a, Civil ah chuan

RSBY kha alo hman theih a, private damdawiin-ah hian Durtlang tih loh ah chuan a hman ve theih loh a ni. Hei hi a buaithlak em em mai a ni. RSBY package list hi a awm vek a, a thlawna enkawl an ni bik lova. Chuvang chuan Civil damdawi in rush em em, lun baw si tih thawl na atan hian heng private damdawi inah te hian heng packaged list hmang hian a enkawl ve theih lawm ni thingtlang lam damlo te hi? Chuti a nih loh chuan Civil Hospital-ah seat kan chang lova, khumte. Chuvang chuan private damdawi in te hi RSBY hmang ve tur hian an tih ve theih lawm ni tih hi ka zawhbelh duh chu a ni.

S P E A K E R : Session tantirh lam khan kan sawi tawh a, zawhna neitui a zawt ang a, chumi zawhah chuan zawhbelhna chu zawhna neitu leh member dang pahnihin an zawt ang a, chu chu i duh taw k ang kan ti tawh a. Khami bawhchhiat tum talh chu a dik bik lo ang a, tunah hian Department neitu House Leader chhang turin i sawm ang.

Pu LAL THANHAWLA, CHIEF MINISTER : Pu Speaker, a zawhna neitu chance pe miah lova an rawn zawt kha a zawhna neitu hi ka ngaipawimawh hmasa zawk a, a hriat belh duh tur awm a hi kan hrih hmasa ang e.

Mizoram Private damdawi in a inenkawl na man hrang hrang te hi a hranpa a bithliah a ni lova, tunah hian sorkar hian Mizoram chhunga in enkawl na man leh phai lama in enkawl na rate hrang hrang khaikhawm bithliah dan tur a ngaihtuah mek a ni.

Tin, Mizoram Clinical Establishment Registration and Regulation Rule 2014 hi hospitala in enkawl na man bithliahna a ni lo va, he rules in a tum ber chu private hospital and Maternity Home , Nursing Home, Dispensary leh hetiang ang damdawia inenkawl na hmun te sorkarin a thu hnuai a dah theih nan a in register vek tura tihfel leh fee mumal taka lak chungchang te a ni a. Hemi Clinical Establishment Rules 2014 ah hian thunei tu ber chu State Council for Clinical Establishment niin Secretary, Health & Family Welfare Chairman na hnuai ah din a ni a, chutiang chuan mumal takin, fumfe takin Mizoram Gazette ah pawh chhuah a ni.

Hospital waste leh bio-medical waste ang zawng zawng hi a ngaimawh awm a, Prime Minister programme ah pawh hian ngaihawh ber te zing ami ani a. A sub-group kan thutna ah pawh hmun tam tak ah pawh hian an lo buaipui ve hle a ni a. Chutiang chuan Mizoramah pawh kan buaipui a, a theih chin chin ah te pawh Incinerator dah a ni a, a tlangpuiin medical waste management hi Mizoram Pollution Control Board hnuai ami a ni a, anni hnuai ami a ni tih avanga ngaihthah chi a ni lova. Civil Hospital pawh hi tunhma kan sorkar hotuten fianrial deuhva sawn an lo duhna chhan chu bawlhhlawh bawm lian tak, hrisel lo tak Aizawl khaw laili takah kan dah a ni mai tun ah hi chuan. Fur lai te phei chuan Aizawl thlang lampang Tuikual bawr vel te khu bawlhhlawh luang thla hian a ti khawngaihthlak hle thin a ni. Chungte avang pawh chuan Waste Management hi

ngaih pawimawh a ni a. A solution tha ber chu sawn chhuah a, tangkai dang, medical lamah tho hman kha tunhma chuan kan lo fight dan a ni a. Mahsela chutiang chuan a kalpui hleihtheih ta lova, engpawhnisela by-medical waste leh medical waste leh a waste naran te pawh hi a disposal UD & PA Department hian nasa takin a ngaihtuah mek a, a sum sen tur ang te pawh a ngaihtuah a ni.

Tin, RSBY hi private hospital thenkhat in an pawm lo va, chu chu a harsatna a ni a. Engpawhnise, engtingge tih tur la ni zel ang tih chu sorkar in a la ngaihtuah zel ang. Accreditation Board hi sorkarin a din lova, private hospitalte hi khawvela hnam hrisel lo pawl kan nih avang hian a ding tam hle a, sorkar in thunun na dan mumal tak hi a nei lo a ni. Tin, a location te pawh hi dik tak chuan veng lunlai leh duh na lai lai a dah hi khawvel kalphung a ni lova. Amarawhchu kan mamwh avangin kan dil a, eizawna atan kan mamawh baw si a, a pawng a puin khap theih a ni lova, khawvel ah hriselna lam ngaih pawimawh a ni a. Chuvangin engtingge public health ti chhe lo ber zawnga kalpui a nih ang tih te pawh hi uluk taka ngaihtuah a ngai a. Tin, refer case ah hian sorkar hian a seng tam lutuk a, zahthlak khawp a seng a, a management a dik loh avangin heng te pawh hi en tha turin dik zawk leh in seng so tlem zawka kan kal theih dan tur te ngaihtuah in Chief Secretary hovin Committee pawimawh tak din a ni a, an recommendation pawh an submit tep tawh ang.

S P E A K E R : Awle, zawhna dangah kan kai ang a, 153-na a neitu Dr.K.Beichhua'n zawt sela.

Dr.K.BEICHHUA : Pu Speaker, ka lawm e. Minister zahawm tak UD & PA Minister changtu hnena ka zawhna chu -

- a) Mizoram Smart City atana rawtna siam a ni tawh em ?
- b) Smart City a tana Central sorkar tehfung tlangpui engte nge ?
- c) City project siam a ni tawh em ?

SPEAKER : Awle, Department neitu Minister zahawm tak chhang turin i sawm ang.

Pu ZODINTLUANGA, MINISTER : Pu Speaker, kan member zahawm tak Dr. K. Beichhua a starred question 153- na a)-na chhanna chu: -

- a) Aizawl Smart City atana rawtna siam a ni tawh a. Central pawhin Smart City atana siam tur list-ah Aizawl a dah tawh a ni.
- b) Smart City atan hian India ramah khawpui 100 thlan chhuah tur a ni a. State tina urban population leh statutory town awm zat atanga tehfung siamin Municipality Urban Local Body awmnaah States tan allocation siam a ni. Chutiang chuan Mizoram State tan Smart City pakhat pek kan ni ve a ni.

- c) Smart City proposal siam turin Central Sorkar duh angin Consultant thlanfel a ni a. Smart City proposal an mahni chuan an duang ang tih a ni e.

SPEAKER : Aw, zawhbelhna, a neitu khan a nei lo em ni? A neitu khan a zawt hmasa tur a nia maw. (PU LALRUATKIMA : Ka nei lo a tia, Pu Speaker.)

SPEAKER : A neih loh chuan zawt rawh le.

Pu LALRUATKIMA : Aizawl Smart City atana kan project-ah khan Zodin Cinema Hall hlui thin kha a tel a, Mizoram State BJP ten lei an tum avanga lei ta mai ni khan, lei tum veleh chhawng ang khan thu kan dawng a. A neitupa ngei pawh ka zawt a, chutiang chuan min chhang tho a. Chulaiah chuan BJP ten a lei an tum avanga lei tur kan nih chuan kha Smart City project-ah khan in.....

SPEAKER : Ngawi rawh aw, BJP ten lei an tum tih kha House ah an sawi em ni?

Pu LALRUATKIMA : Consultative Committee ah Pu Speaker, kan sawi a (Speaker : House a mi kha sawi tur maw) Consultative Committee ah khan kan sawi a, BJP ten lei an tum avangin sawlai hmun saw lei a tul, tiin kan Sorkar thuneitu lamin an sawi a

*Speech not corrected

Pu LAL THANHAWLA, CHIEF MINISTER : Pu Speaker, BJP lei tum leh lei tum loh lam a ni lova. Sorkarin a mamawh a, hman deuh atang khan a duh tawh a, chuvangin a lo remchang a Mizoram Sorkarin a lei mai dawn a ni.

Pu LALRUATKIMA : Pu Speaker, zawhna a ni a, chutah chuan Mizoram State BJP in lei an tum thu sawichhuah a nih avang khan, khalaiah khan, a thu dawnna kha a dik reng em, tih kha ka han zawt tel nghal a. Tin, Smart City Project ah, a hmunhma lei hi a tel reng em ni? Tin, Pu Speaker, Sawlaiah Assam Rifle te chhuak turin Zokhawsang lamah te a kal zel a hun rei tawh tak atangin, chuti a nih chuan lei kher ngai lovin hmun tha zawk te kan lei thei lawm ni, tih kha ka'n zawhbelh a ni.

*Speech not corrected

SPEAKER : Zawhna dang a awm loh chuan Department changtu Minister zahawm takin chhang se, a tawpna a ni ang kha kha. Zawhna hun hi a tawp tawh tak e. Chhang turin Minister i lo sawm ang.

Pu ZODINTLUANGA, MINISTER : Pu Speaker, he House zahawm takah ti tina te, khawlai ti ti te kan sawi chhuak thin hi a pawl kan ti a. Sorkarin

Pu LALRUATKIMA : Pu Speaker, khawlai ti ti a ni lova, Committee thu ka rawn sawi a ni. Khawlai ti ti a nilo. Khalai kha a awmzia kha project ah hian a tel reng em? A tel thei reng em?

*Speech not corrected

Pu ZODINTLUANGA, MINISTER : Pu Speaker, he House zahawm takah hian Consultative Committee kan thukhawm a, thil tam tak kan rel a. Aizawl Municipal Council siamthat ngai lai te siamtha turin kan thukhawm a, chungah chuan Aizawl khawpui chhungah traffic jam te a tam tawh thin si a, hengte hi Zodin Cinema Hall te hi a neituten an zuar in kan hria a. Heng te pawh hi lei a tha lawm ni tiin Consultative Committee ah kan sawi a, minute a awm a Consultative Committee chuan Sorkar hian lei thei sela a tha kan ti, tiin kan passed a ni.

Pu LALRUATKIMA : Pu Speaker, Consultative Committee-ah State BJP te pawhin lei an tum a, tiin sawi a ni ngei a, chu chu kawtlai titi emaw ni dawn?

*Speech not corrected

Pu T.T.ZOTHANSANGA : Committee mawngpawp a awm a nih chu.

Pu LALRUATKIM : Pu Speaker, Committee mawngpawp a awm lo, Consultative committee chu inrawnkhawmna mai a ni. He House zahawm takah hian a sawichhuak thiang vek.

*Speech not corrected

Pu ZODINTLUANGA, MINISTER : Pu Speaker, tuten nge lei tum an tih te chu, chungah chuan a member zing ami te pawhin chung te pawh chuan lei an tum tih te pawh chu an sawi ve ang chu, BJP a ni emaw ni love maw. Kan State sorkarin a mamawh thu kan sawi a, chungah chuan Consultative Committee, kan member zahawm tak Pu Lalruatkima leh Dr. K. Beichhua, member zahawm tak Saiha bialtute awmnaah, he Zodin Cinema Hall hi lei a tha tiin kan passed a ni. Chumi chu Aizawl Smart City nen hian a inrawlhna a awm lova (SPEAKER : A zawhna hun a tawp a, chhan zawh tir ang aw, hun a tawp a.)

Aizawl Smart City ni tur hian Pu Speaker, India ramah state hrang hrang atangin khaw 100 thlan tur a ni a.

Andhra Pradesh 3,

Andaman ah 1,

Arunachal Pradesh 1,

Assam ah 1

Chandigarh ah 1,

Chhattisgarh ah 2,
 Daman & Diu ah 1,
 Delhi ah 1,
 Goa ah 1,
 Gujarat ah 6,
 Haryana ah 2,
 Himachal ah 1,
 Jammu & Kashmir ah 1,
 Jharkhand ah 1,
 Karnataka ah 6,
 Kerala ah 1,
 Lakshadweep ah 1,
 Madhya Pradesh ah 7,
 Maharashtra ah 10,
 Manipur ah 1,
 Meghalaya ah 1,
 Mizoram ah 1,
 Nagaland ah 1,
 Odissa ah 2,
 Pondicherry ah 1,
 Punjab ah 3,
 Rajasthan 4,
 Sikkim ah 1,
 Tamil Nadu 12,
 Telengana ah 2,
 Tripura ah 1,
 Uttar Pradesh ah 13,
 Uttarakhand ah 1,
 West Bengal ah 4.

Chutiang chu India ram sorkarin allotment min pe a, Mizoram pawh pakhat min pe ve a ni.

Chumi ti tur chuan Pu Speaker, he Smart City Project siam turin Central sorkarin min tih angin anmahni Panel Firm an nei a, consultancy ti turin. Chung Panel Firm zing atang chuan tender te kan ko a, chungah chuan member 8, Consultancy Firm 8 - Feedback INFO Private Limited te, Voyan Solution te, Architechno Consultant, DDF Consultant, Engineering India Limited, DATA World Pvt. Ltd., ICMA & AdSoft India Limited leh Dorse Holding-ten an rawn chhang a. Chumi zinga chhang tlawm ber, a chhang hniam ber Architechno Consultant Pvt.Ltd. chuan nuai 13,8,4500/- in a rawn chhang a. Chu chu

kan state sorkarin a hniam ber chu central sorkarin an panel firm zing atanga kan tender chhuah atangarawn chhangtu chu kan thlang a. Chung chuan Pu Speaker, kan Aizawl City road map tur te, Aizawl Smart City road map tur te arawn siam ang a, chu chu central sorkar-ah kan thehthla dawn a. Heng ang hi stage 1 stage 2 ten Aizawl Smart City hi then a ni a. Chungah chuan retro-fitting te, re-development te, green field te, plan city te kha a component pawimawh zing ami a ni a. Chung kan proposal zingah chuan Pu Speaker, wawiina Zodin Cinema Hall sorkarin a lei tur te pawh hi tangkai taka hetiang ang mithiam hian an hman theih kan beisei a, lei kan tum bawk a ni.

Tin, Aizawl khawpui tawt tawh zia leh motor dahna kan mamawh zia a hretu chu Zoram mipui, Aizawl khawpui a cheng mai nilo, nitin a chakkhairawn la te pawh hian Aizawl khawpui traffic tawt zia te, kawngsira motor loh theih loh a kan dah avang te a harsatna kan tawh te hi kan hria a. Chutiang ti tur atan chuan wawiin Zodin Cinema Hall hmun sorkarin a, Consultative Committee kan member zahawm tak tak Pu Lalruatkima te, member zahawm tak tak Dr. K. Beichhua te awmna Committee in hetiang hian lei tura rawtna kan han siam a, sorkarin ngai pawimawh a kan han lei ta te hi kan ram tana thil tha tur a ni a. He smart city project ah pawh hian Pu Speaker, kan consultant te hian.

Pu LALRUATKIMA : Pu Speaker, dawn hniam miah lovin 10 crore khan lei turin kan ti a, kan inruahman a. BJP in lei an tum bawk si a chulaiah chuan chu harsatna chu a awm em ni tih kha ka zawt a ni mai.

*Speech not corrected

DEPUTY SPEAKER : Pu Speaker, BJP in lei an tum a, an chang ta lova, an rilru a na em ah ngaihsak ta mai ila. Helaiah BJP in sawh nghet sela, bawng talh te pawhrawn khap ve sela tih te pawh an duh a ni mai thei a, chuvangin i hrethiam ang u. BJP in an chang lo kha an rilru a na viau ni tur a ni.

Pu LALRUATKIMA : Pu Speaker, helaiah thulai taka sawitur kha a ni dawn lawm ni (.....Interruption) Pu Speaker, ka zawhna kha min chhang mai se, midang ka zawt lo, Pu Speaker.

*Speech not corrected

Pu R. ROMAWIA, MINISTER : Pu Speaker, i thu zawm lova, i phalna pek ni lote kha chu an microphone off sak hmiah mai kha House tan hian kan zahawmna zawk a ni thei ang a.

SPEAKER : Awle, Minister-in han sawi chhunzawm se.

Pu ZODINTLUANGA, MINISTER : Pu Speaker, chuvangin Aizawl Smart City kan nei tur hi kan lawm a. Sorkarin tangkai taka a hman atan ruahmanna kan siam a ni tih kha

ka chhanna a ni e. BJP in lei an tum/tum loh thu chu khawlai titi mai mai a ni a. Chuvang chuan, sorkarin tha taka leitura kan ruahman hi a changtu minister ka nihna ang pawhin lawmthu ka han sawi bawk a ni. Ka lawm e.

SPEAKER : Awle. Business danga kan kal hmain Minister Pu P.C. Lalthanliana leh Parliamentary Secy. Pu H. Zothangliana ten chawlh an dil a, kan phalsak a ni tih he House hi ka hriattir e.

Tunah chuan, Laying of Papers ah kan kal tawh ang a. Minister Pu R. Lalzirliana'n Statement of correction on a reply given on the 12th October, 2015 to starred question No.178, Ballot No.57 asked by Pu Laruatkima regarding ex-gratia leh compensation grant chungchang

S P E A K E R : hei sap tawng leh Mizo tawng a in pawlh nuaih mai a. Hei hi House-ah rawn lay turin i sawm ang.

Pu R.LALZIRLIANA, MINISTER : Pu Speaker, ka lawm e. Member zahawm tak Pu Laruatkima zawhna 178-na , Ballot No.57-na correction chu he House zahawm takah hian ka rawn lay e.

S P E A K E R : Awle, a copy sem ni se. Tunah chuan Pu R.Romawia, Minister zahawm takin 'The Mizoram Registration Rules, 2015' hi House dawhkanah rawn lay se.

Pu R.ROMAWIA, MINISTER : Pu Speaker, i phalna leh he House zahawm tak remtihna "The Mizoram Registration Rules, 2015" chu House-ah ka rawn lay e.

S P E A K E R : Awle, a copy kha sem ni se. Tunah chuan Legislative Business-ah kan kal ang a. House Leader zahawm takin "The Mizoram Clinical & Health Establishment (Regulation) (Repeal) Bill, 2015" he House-ah introduce turin House phalna rawn dil pawt se.

Pu LAL THANHAWLA, CHIEF MINISTER : Pu Speaker, i remtihna leh House-in min phalpuinain "The Mizoram Clinical & Health Establishment (Regulation) (Repeal) Bill, 2015" hi he House zahawm takah ka rawn pulut e.

S P E A K E R : Awle, a rawn introduce ta a, kan remti a ni lawm ni introduce? Awle, kan remti tlang a. Introduce sela, ngaihtuah atan rawn move nghal mai se.

Pu LAL THANHAWLA, CHIEF MINISTER : Pu Speaker, i remtih na leh House phal na in "The Mizoram Clinical & Health Establishment (Regulation) (Repeal) Bill", 2015 hi ka rawn pu lut a. Tin, i remtih na in he bill hi he House zahawm takin min pass sak turin ka rawn

ngen a. He bill hi financial involvement a awm lo a. Additional financial involvement a awm dawn lo va. Tin, bill hian sap tawngin ‘The bill attempt to delegate power to make rules for carrying out the provisions of this bill to State Executive of the Department’ tih a ni a, financial implication a awm lo va.

Hemi bill put luh a ngaihna chhan chu ‘consequent upon the enforcement of Clinical Establishment, Registration and Regulation Act, 2010 in the State of Mizoram with effect from 1st March, 2012. Secretary, Health & Family Welfare notified repeal of Mizoram Clinical & Health Establishment (Regulation) Act, 2007. This process and manner of repeal was later found to be erroneous and procedurally incorrect since there can be no two acts on the same subject simultaneously. It is now exigent to move the bill to repeal “The Mizoram Clinical Establishment Act”, 2007. Hemi awmzia chu Pu Speaker, hemi Clinical Registration, Regulation Act, 2007 hi a kalphung a lo dik lo va, chu chu nuai bo a ngai a. Act pahnih subject pakhat a a awm theih loh avangin Mizoram Clinical Establishment Act, 2007 hi tuna Act hian a rawn thiat ta a ni, tih deuh mai a ni a. Chuvangin han sawi tur teh chiam a awm pawhin a lang lo va. A hlui dik lo a kha a hma in a lo awm tawh a, Act pahnih subject pakhat a awm theih loh avangin tuna “Mizoram Clinical & Health Establishment (Regulation) (Repeal) Bill”, 2015 hian a hma kha a rawn nuai bo a, tuna mi hi a ding ta zawk e, tih a ni a. Chu chu House zahawm tak hian min rentih sak turin kan ngen a ni, ka lawm e.

S P E A K E R : Hei hi chu a tha zawk kan neih theih na tura a awm sa thiahna mai a ni a. Sawiho ngai teh chiam lo turah ngai ila, kan Leader pawh khan pass a rawn dil ti tih mai a. Sawiho lem lovin kan pass mai turah ka ngai a. Engemaw pawimawh tak zawh duh emaw te kan awm em ? Anih chuan, kan Leader khan pass kha a dil nghal tawh bawh in ka hria a. Tunah hian “The Mizoram Clinical & Health Establishment (Regulation) (Repeal) Bill”, 2015 chu he House hian lungrual takin pass remti zawngin “Remti” ti rawh u le (Members : Remti) Remti lo kan awm em ? “The Mizoram Clinical & Health Establishment (Regulation) (Repeal) Bill”, 2015 chu House hian lungrual takin a pass a ni tih ka puang e.

Pu LAL THANHAWLA, CHIEF MINISTER : Pu Speaker, i chungah leh member zahawm takte chungah engmah sawi buai lo va min pass sak avangin ka lawm e.

S P E A K E R : Tunah chuan financial business-ah kan kal ang a. Demand No. 6,12,21,23 te House-a rawn submit turin a neitu Pu R. Romawia, Minister zahawm tak sawm ila.

Pu R. ROMAWIA, MINISTER : Pu Speaker, on the recommendation of the Governor of Mizoram and with your permission sir, I move the demand No. 6,12, 21 and 23 for ₹ 2,64,22,06,000/- for meeting expenses during 2015-16 in respect of the following Departments. Demand No. 6- Land Revenue & Settlement Department, ₹ 25,17,68,000/-,

Demand No. 12 – Parliamentary Affairs Department, ₹ 51,93,000/-, Demand No. 21 – Higher & Technical Education Department, ₹ 2,28,53,47,000/-, Demand No. 23 – Art & Culture Department, ₹ 9,98,98,000/-. Total – ₹ 2,64,22,06,000/- only. Thank you.

SPEAKER : Awle, kan Minister zahawm takin a demand hrang hranga pawisa hman turte House-ah a rawn submit a, sawihona kan nei leh ang a, kan tih dan thin angin mi pakhatin minute sawm kha duh tawk ila.

Awle, Pu H. Rohluna sawm leh law law ila a awlsam zawk ang. Tunah kan Minister zahawm tak Pu H. Rohluna a demand hrang hrang House-a submit turin ilo sawm ang.

Pu H. ROHLUNA, MINISTER : Pu Speaker, on the recommendation of the Governor of Mizoram and with your permission sir, I move the Demand No. 20, 40 and 44 for ₹ 9,79,63,81,000/- for meeting expenses during 2015-16 in respect of the following departments. Demand No. 20- School Education Department – ₹ 9,09,97,21,000/-, Demand No. 40- Industries Department, ₹ 59,25,91,000/-, Demand No. 44- Trade & Commerce Department – ₹ 10,40,09,000/-. Total - ₹ 9,79,63,83,000/- only. Thank you Sir.

SPEAKER : Awle, kan Minister zahawm takte pahnih chan demand hrang hrangte sawihona kan nei ang a. Kan tih thin angin mipakhatin minute 10 chhunga sawi zawh tum ila a tha ang e. Tunge han sawi hmasa ang ? Kan awm lem loh chuan pass an rawn dil mai dawn em ni? Awle, Pu Ngurdingliana.

Dr. NGURDINGLIANA : Pu Speaker, ka lawm e. Chawhnu lamah chhiat tawhna thil avangin ka chhuah a ngai dawn si a, chawhma ka'n chuh mai ang e.

Ka sawi hmasak ber duh chu a vaiin ka tuam zo lovang a. Hei tun tum session-ah hian Bill thi tawh repeal tam tak department-ah kan nei a. Hei hi kan Legislative Assembly Secretariat te, kan Parliamentary Affairs Department changtute leh kan MLA zahawm tak takte thahnemngaihna a niin ka hria a, a lawmawm tak zet tih kha ka rawn tanna ni sela.

Session hmasaa Higher & Technical Education Demand 21-naah khan zawhna ka rawn siam tawh a. A hmaa ka sawi duh chu kan Chief Minister leh kan Education Minister term hmasaa Pu Sawta te Education Reform Commission, sum tam tak senga kan lo din kha tunah hian a rah hi kan tel tulh tulh mai a, a lawmawm ka ti a. Quality education maintain zel turah pawh College Principal tura te hi chu Ph.D Degree nei ni ngei se tih rawtna kan rawn thlen tawh a. Chumi zul zui chuan tunah hian Higher &

Technical Department hian hma tun kar lo awm turah pawh hian a la niin kan lo hria a. Lawmawm ka ti tak zet a, tang zel sela.

Tin, nakinah School Education-ah chuan ka la rawn lut ang a. Kan Higher Education chungchangah hian hei Mizoram University te kan han nei ta a. Kan student quality, kan Assistant Professor a ni emaw, Associate a ni emaw, Professor puitling, an thiamna hi a lo sang em em mai a, zirlai zingah competitive mindedness leh academic atmosphere hi a lut tha a ni. Chuvang chuan, kan vannei hi ka ti a, kan hotute hmalaknaah. Khawi state dangah emaw, University danga kal ngai reng reng lo hian kan ram chhung kan MZU hi a standard a sang tawk a ni. Chumi kal zelah chuan kan College hi thum that a thain ka hria a. Ka hriat sual loh chuan Pu Speaker, Lecturer sanction post 100 chuang a awm a, heng te pawh hi kan la fill up thei miah lo mai a. Chu chu kan Finance te leh Planning te leh kan Higher lam hotute inrawnin hnawhkhah thuai theih ni se, hei hi chu ka rawn ngen ve duh a ni.

Tin, Art & Culture Department-ah hian ka kal thui thei vak lova. Ka hre ril lova, amaherawhchu, an hmalakna ka lawm em em mai chu hemi pi leh pu sulhnu heritage humhalh kan tihah hian zokhaw lamah hma an la nasa a, a lawmawm a. Hei hian Tourism Department pawh a promote nasa hle mai a. Kan ni theuh ang a keimahni bial theuhah, hetiang hmun hma pi/pu sulhnu tam tak nei kan awm a. Kan hriat loh hian Vaiho te, Sapho te hian an lo tlawh duh khawp mai a. Hemi atana Art & Culture Department-ina sum min peka kan han chei thina te hi kan ram than chhohna zelah a lo tha tih ka hria a. Heti lamah pawh kan Minister hian hma min lo lak sak thei zel se tih kan duh a ni.

Demand 2-na School Education Department-ah, hei School Education Department changtu Minister zahawm tak leh a tawiawmtu Mobile khawih peih deuh mai, zinnaah leh Thlawhnaah pawh khawih baw, hei an achievement an rawn siam a, wawi sawm ka chhiar chhuak a (Speaker: Khawngaihin kan han in thlak lawk) a lawmawm hi ka ti khawp mai a. Kan Education Reform Commission zul zuia hma a rawn la hi lawmawm tak a ni. Department achievement an rawn siam a, hemi bu hi kan dawng vekin ka hria a. Hetatang hian an hmasawna/an hmalakna a chiang mai. A lawmawm ka ti tak zet a. Hmasawn zawngin zirnaah pawh kan kal niin ka hria a. Tuna an tih tur chu infrastructure development kan tihah hian school chhia tam tak khawthlangah, khaw chhakah a tam nasa lutuk, bang kaw hiau huau, tukverh pawh khar hleih theih loh, hengah hian tan la zawk hrih sela, a curriculum, a text book, SCERT an hmang tangkai baw si, SSA an hmang tangkai baw si, an thum tha, zirtirtu training pawh an ko hnem, B.Ed. pawh compulsory, distance education, khatiang neuh neuh hetah hian a chiang vek a, a detail chuan ka sawi lovang a. A lawmawm hi ka ti a, tun atanga kum 5 hnuah chuan Education Minister nih hi a chakawm khawp ang, ti khawp chuan hma an la tha a, lawmawm ka ti tak zet a ni.

Tin, RMSA bikah hian engtin nge kan Minister te, kan Parliamentary Secretary ten hma an lak dawn ka hre lova. Khuaah RMSA kan va dah a, a hmasa khan tlawmngaiin sikul an lo din a, khami khuate khan. A khaw bik chu ka sawi chuang lovang a. Zirtirtu appointment an lo nei tawh si a. RMSA kan va dah avang khan hnawk ti avang hian khawi khua khuaah emaw RMSA hi kan pet chhuak a. Khangho kha tunah kan han inhrilhfiah a, RMSA kan chhawr tangkai ve theih dan tur class 10 (ten) level bakah Higher Secondary School thlenga kan chhawr tangkai theih tur te, tin, kha sikul awm sa kha thiat lova a hranpa khuain sikul pahnih High School in nei dawn a, Higher Secondary School pawh in nei thei a, tia kan han inhrilhfiah hnuah hi chuan an duh leh tawh a tunah hian. Chungte chu engtin nge hma inrawn lak dawn? A chhan chu, khang khua zirtirtu RMSA Teacher thiam tak tak Post Graduate vek, tuna kan Minister tena hma inlaknaa B.Ed Degree in neih ngei ngei a ngai tia zir mek te hi a khaw than zel naah kan mamawh bawk si a. Khami kha engtin nge programme insiam tih kha min han hrilh theih chuan ka lawm ngawt ang.

Industries Department-ah hian ka'n zawh leh duh chu – A hmasa ber ah chuan mipuiin an bengkhawn, Meidum ah gas tunah kan bei mek a, Maubuang ah oil kan bei mek a, Keifang ah chutiang bawkin. A deposit tam leh tam loh hi MZU a Professor te, kan Mizo tlangval ngei te ka zawt a. Kei chuan ka lo ngaihndan ah chuan, lungalhthei te, oil te hi chu leilung upa, geographical terms ah chuan igneous rock-ah hian a tam ka ring a. Khumi middle east ram Iraq, Iran ram te pawh a upa a, keini Mizoram leilung naupang tak, sedimentary rocks ah hian a awm thei dawn em ni, hei hi kan auchhuahpui thin si a, mipui hian kan ngaihven ru bawk si a, min han hrilh Chiang Teh u tiin kan inkawmna ah ka zawt a. Chuta Professor hovin min chhan dan chu – Lei thawp pawh nisela, sedimentary rocks pawh nisela, lungalhthei te, khawnvartui te, oil te hi a tam zawk an ti a. Chu chu kan Minister -in a wind-up hunah, eng dinhmunah chiah nge tuna kan hmalak mekna hi, tih Zoram mipuite min hrilh hria se ka duh bawk a ni.

Tin, Industry ah zokhaw lama kan nghahfak em em thin leh kan hman tangkai em em, puanthui khawl kan sem thin te, tin, mistiri bungrua kan sem thin te kha chhunzawm leh theih a ni ang em, tunah hrih hi chuan a tawp hmuk niin ka lo hria a. Khang te pawh kha minrawn hrilh hre leh sela ka'n ngen bawk a.

Trade & Commerce bikah, hei lehkha fel takin anrawn ti leh a, member te pawn House a sawi vak ngai lovin. In hmalakna ah lawmawm ka ti a, Zorinpui, hei Subject – II Committee Chairman, Pu Lalrinliana Sailo hovin, Pu Zawma te, member zahawm tak Pu Vena te hovin Estimates Committee kan va kal tawh a. Hengte pawh hi la kal leh kan tum a, hma chhawp tha tak mai in lo nei a. Zokhawthar chungchangah pawh House hmasa hmasa leh a karawn zawhna kha tunah hian tihpuitlin a ni mek te pawh hi a lawmawm a. Tin, kan bazaar, AMC leh eng department nge ka hre chiah lova, mipui

tana a hlauhawm zia hria in New Market building sak na tur te pawh kar hmasa lawk khan lungphum an phum niin ka hria a, chutiang bawkin Mission Veng ah te, Vairengte ah te. Tin, hemi piah lamah Indo-Bangladesh Border, kan insumdawn tawna tura Trade & Commerce Department in a hma a chhawp na te hi, a thuk takin hre lo mah ila hma an la a ni tih hi chu paper ah black & white minrawn pe thei te hi lawmawm ka ti a. Chuvang chuan, eng party-ah pawh awm mah ila, ram leh hnam, politics a kan luh chhan ber kan hnathawh kawngah hi chuan intawiawm ila, tih kha thahnemngaih na thil ah ka'n sawi ve duh a ni e, ka lawm e.

DEPUTY SPEAKER : Hun i hmang dik chiah e. Tunge han sawi ve leh ang le. Er. Lalrinawma.

Er. LALRINAWMA : Pu Dy. Speaker, ka lawm e. Vawiinah hei Demand pahnih (2) kan Minister te chanpual kan sawi leh dawn a ni a, han sawi deuh par par ka'n tum ang a, hun ka hman rei deuh pawn min ngaithiam turin kan ngen nghal ngawt mai teh ang che.

A hmasa berin Land Revenue & Settlement Department chungchangah hian han sawi nghal pawp mai ila. Hei, hmalakna hrang hrang te an nei a, a lawmawm ka ti a. Ka bialah ka'n lut ang a. Khumtung khua khian vawiinni thlengin cadastral survey an la nei lova, LSC an la neih loh avangin, an khuaa Bank awm pawh duh angin an chhawr theilo a, an buai em em mai a. Chu chu sorkarah pawh lehkha an theh lut tawh a, chungah chuan kan Minister zahawm tak hian min lo hriat sak selangin, he harsatna hi a buaithlak ve hle a ni tih kha a hmasa atan chuan ka'n sawi duh a.

Tin, Parliamentary Affairs Department chungchangah hian thil pakhat sawi ka'n duh a. Ka Starred Question No. 137-na, Supply-a ka zawhna ah khan, 2014-2015 chhung khan buhfai excess issue engzatnge awm tiin ka zawt a. Chuta min chhanna ah chuan quintal 35302.42 a awm tiin min chhang a. Amaherawhchu, hetah DCSO hrang hrangah Director-in December 2014-ah March – October, 2014 inkara excess issue zawng zawng hi hetah hian lehkha a thawn chhuak a ni. An memo No. hi (**DEPUTY SPEAKER** : Ngawi rawh aw, lawk lawk. Khatiang a document in lek chhuah a, base a in hman chuan House ah a copy tal inrawn pe tur a ni. Chuti lo chuan kha kha chanchinbu nge pawh kanrawn hre lo a ni) Aw, Pu Speaker, karawn theh lut dawn nia. (**PU T.T.ZOTHANSANGA** : Chubakah Pu Speaker, a Demand kha a ni lo hrim hrim a, duh duh sawi na hun emaw ni le, a subject pangngai ah khan luh mai tur a nia) Pu Dy. Speaker, Parliamentary Affairs Department a nia, tah chuan in an mi chhanna kha ka sawi dawn a ni hetah hian. G 25020 a in tan niin helaiyah hian chiang takin a inziak a, karawn pe ang a nakinah. Tah chuanin, nuai dawn lai a inziak si a. Tichuan, Aizawl East DCSO leh Champhai-ah ringawt pawh hian quintal 47,799.9 lai a awm a ni.

Ka'n sawi duh zawk chu, mihring kan ni a, tisuah thei kan ni a, House ah member ten kan hriatchian loh te kan zawt a, he ka zawh hi March – October inkar a ni a, a zat ka hre silova, ka zawt a ni a, dik takin min chhang thei se a lawmawm hlein ka ring a. Mihring kan ni a kan tisuah thei, amaherawhchu, kan chhannate fimkhur ila, tih kha ka'n sawi duh a ni.

Tin, a dawt lehah Higher & Technical Education Department chungchangah Pu Dy. Speaker. Hei, College hi hmun hrang hrangah tun hun ah hian August, 2015 thleng khan teaching staff hi 85 a shortage kan nei a. Hei hi College hrang hrang te kan tih that a ngai a, khawpui kan pan khawm a, thingtlang lama mite pawh kan tihchangtlun hi a ngai tak meuh meuhin ka hria, khawpui ami nilo hi. Chuvang chuan hei hi han ngaihpaawimawh leh theih deuh ni sela a thain ka'n hre deuh a.

Tin, chu mai piah lamah ka bial chhung Chhiahtlangah khian Polytechnic din chhoh ve mek a ni a. Khing te pawh vawiinni thlengin hnathawh ala awm hleitheih lova, khing te pawh min lo enzui sak leh ta selangin a tha in ka hria a ni.

Tin, a dawt leh atan chuanin, Art & Culture Department chu a hnu lamah sawi ta ila.

School Education Department, Demand No. 20-na ah kai chho leh ta ila. Hei hi zirtirtu indaih loh na kan nei nasa em em mai a he thil ah hian. Chuvang chuan zirtirtu transfer chungchangah a bial MLA te a ni kan ti a, MLA tin mai te kan tang tung mai bawk si a. Thingtlang a zirtirtu kum rei tak tak lo awm tawh, kum 10/15 awm tawh te pawh kan chhuah phal lo a nia. Chuvangin, heti ngawt lo deuh hian MLA te min ko khawm in emaw, khatiang khan thutlukna lian tham siam tur khan in rawn tlan ni ta selangin. Transfer diltu mi hrang hrangte chungchangah pawh kan in rawn tlang theiin a kai rual zawk tih te kha ngaihtuahna ah a awm deuh a ni, tih te kha Pu Dy. Speaker, ka'n sawi duh a.

Tin, Industry Department chungchang bikah hian han sawi leh ta lawk ta ila. Niminah lehkha pakhat ka hmu a, chu ka lehkha hmuh chu Pu Dy. Speaker, tah hianin Tuikum Cluster hnuuia beneficiaries final chungchang a ni a. Ni 9th October ah an ti chhuak a. Heti hian a rawn inziak ta a, pakhat ka'n chhiar ange. Final selected list of farmer beneficiaries a inti a. District - Serchhip, Cluster – Tuikum a ti a. A piah ah hian selected by ah VLSC, MIFCO and cross checked by VLMC, MIFCO a ti ta a. As agreed by Chairman, MIFCO & MLA, Tuikum Constituency tih a inziak tlat mai a ni. Kei hi MIFCO Chairman ah min lo dah ta reng nge aw tih te pawh kha a ngaihtuah rum rum theih mai a. Tin, kan Chairman dik tak zawk hi Tuikum Constituency MLA emaw an ti ta emaw ni a tih theih ta a ni. Hetiang tihsual lian tham, thutlukna lian tham a ni a, khilai a lo hmu te phei chuanin, E, Pu Rinawma pawh an rawn a, an thlang a nih hi, min thlang

ve lo an ti mai dawn a ni, keima mimal bikah pheï chuan. Chuvangin, hetah hian keimahnï inrawlhna pawh a ni lova, rawn pawh kan ni lo ani tih kha. Vawïinah hian he House zahawm tak kaltlangin kan sawi duh a, tin, kan Chairman zahawm tak pawh Tuikum Constituency nilovin Kolasib lam zawk a ni tih te pawh kha hre tlang ta ila. Official lam te hian lal leh mai turin min hre lutuk emaw ni chu aw tih kha rilruah a'n awm deuh a, an rilru ah a cham nge ni tih kha ka'n sawi duh deuh a ni.

Tin, Trade & Commerce bikah hian Bazarah sawn seat hrang hrangah grade pek tum a ni a, hei kei pawh ka naupan laiin bazaar ah sawn ka thu ve thin a ka u te pui hian. Chuvang chuan, seat in ang te pawh hi grade in ang lo pek theih a nih avangin rotation in a kal si a. Ka zawhna chhanna ah khan in grade pek tum mek a ni a, grade pek sual te a hlauhawm a, grade pek sual khan saw laia nitin a ei chawp zawngte dinhmun a nghawng theih si avang in bazar a thu te a grade pek chungchangah rawn theih ni se thu tlukna dik kan siam theih kha Pu Deputy Speaker ka ring a ni. Tin, Trade & Commerce bik chung changah ka sawi leh duh chu tun hunah hian a pawimawh em em in ka hria a, Hortoki ah chuan hatkora an lo hralh hlei thei lo a, keini sawhthing chingtu, thingtlang lam a mi te pawh hi vawïin ni ah kan sawhthing market a Chiang thei si lo a, han in zawt ta ila, vawïin ah sawhthing i hralh dawn em? ti ila tuman an sawi thei lo a, a market a Chiang lo a ni. Chuvangin vawïin ni ah hian sawrkar in kan tihtur ni a ka ngaih chu, he market Chiangkuang lo mipui te hnena kan hralh hriat hi kan tih tur ni in ka ngai a ni. Sawhthing chu vawïin ah a rate a awm a, nakumah a rate a awm lo leh a, rate a awm kum in eng thil nge thleng a, rate a awm loh kum in eng thil nge thleng tih hi kan hriat a pawimawh a ni. Cyclone lo thleng tur pawh kan sawi lawk theih chuan he leilung thil a keimahnï mite hnathawk ngei thil chu kan sawi thei dawn lawm ni, tih ka ngaihtuahna ah a awm a ni.

Pu Nihara, Tlabung bialtu MLA zahawm tak Chairman-na COPU ah hian in ka vei deuh avangin concept paper ka theh lut ringawt mai a Bangladesh lama he rate chung chang zu en tur hian, kan sawhthing hi Bangladesh lam a kal ber a nih avangin. He lama rate a awm loh kumin Bangladesh lamah eng thil nge thleng thin a, a rate to kumin eng thil nge thleng thin tih hi kan zuk hriat theih chuan in thil hi a kaw dawn in ka hria a, kan hre fuh theilo a nih pawh in a hnu kal leh zel tur a hriat theih dawn a ka hriat avangin concept paper ka theh lut ve ringawt a, Committee zahawm takin min lo pawm sak a, a lawmawm hle a ni tih kha ka sawi duh a. Chuvangin, Bangladesh lamah luhthlak kan tum a ni tih kha ka sawi duh a ni.

Tin, a tawp ber na atan chuan Art & Culture Department ah hian lut ta ila, tunlai pheï chu ka ngaihtuahna ah a lut nasa khawp mai a Art & Culture Department pawimawh zia hi. Pu Deputy Speaker, sap hoin, mingo hoin Mizo hi A, AW, B min lo siamsak a a lawmawm hle a ni. Vanduaithlak deuh maiin kan A, AW, B hmasa berah mingo an fing ber a, an huai ber a tih kha min lo ziahsak a, chu chuan he ram fa te rilru hi a ram atangin a hruai chhuak ta a ni. Chuvang chuan kan ngaihtuahna chu he ram ah hian bet ta lo in mikhual ni a inhriatna kan nei ta tlat mai ani. Chu mikhual ni a kan inhriat na chuan kan hnathawhna hmunah te, kan nitin nunah te mahni ram nilo

ram dang a awm nia hriatna tlat kan nei tlat mai a ni. Chuvang chuan a then chu kan pem chhuak ta ringawt mai a ni ram dangah. Chu chu engtin nge kan tih ang tih ka ngaihtuah a, Art & Culture hi a va pawimawh em tih hi ka ngaihtuahnaah a awm ta a ni. Chuvang chuan Art & Culture hian he zirtirna dik lo (ti mai ila) in a min lo hrilh tawh, kan ngaihtuahna he ram a tang a chhuak tawh hi Art & Culture hmang hian kan hruai let leh a ngai a ni, chu chu kan hna pawimawh ber mai a ni tih hi ka rilru ah a awm a, a bik pawhin ka sawi duh a ni a hnung lamah hian.

Hmanni ah Mamitah ka zuk kal a, Rawpuichhip pelh chhak lamah chuan Minor Irrigation ho in hna an lo thawk a, Water Shed Committee Dhaleshwari a piah ah bracket ah Tlawng tih an lo ziak a nih chu maw le! Ka ngaihtuahna ah hian a lut khawp ah, Minor Office ah ka va kal a, “ engatinge Tlawng ziak hmasa lo a Dhaleshwari tih hi in ziah hmasak le ”? ka va ti a. Anni chuan, “ Hnam rilru in i thlir a nih chu” min lo ti mai mai a, kan lo thlak leh dawn a nia an ti. Keimahni lam ngaih ah pawh keimahni thil hmingte chu kan ngaipawimawh ta lo em ni tih te ka ngaihtuah ta a ni. Chu mai a ni lo, Bengkhuaia ten, kan Mizo Lal ten, min thlahtu ten hman a Mizoram luah hmasatu ten he ram sat chhuak a, he ram dai theu turin an ram chhuak a ni. Vawiin ni ah hian Cachar chu hla kan ti lo mai thei, mahse a hun lai ngaihtuah chuan kawng pawh awm lo, luikawr ah riah chaw paiin mahni intuam hlawm chungin an kal thla a ni. Tichuanin Sap naupang te an zuk man a, an rawn haw leh chu tunge an chawimawi in kan rin le? Bengkhuaia nge Zoluti an chawimawi in kan rin le? Tichuan, Hall te kan han siam a khawilai ah emaw chuan, Zoluti Hall kan sa daih mai a ni. Kan hnam rilru chuan, ama hnam thilte chu a kalsan mek a ni, chu chu hruaikir leh kan ngai a ni vawiin ni ah hian. He neitu thinlung pu a, kan ram luah tur hian Art & Culture hian tih tur a van ngah em tih hi ka sawi duh a ni.

Kan hlaah te chuan, kan pangpar ten kan rilru a hmin ber tiraw. Hla pakhatin engtin nge a tih kha “ Ainawn par, ka ngai che, ka chun leh zua hnehin” kan tih chuan nula te pawh kan hmin zung zung mai a ni. Mahse, vawiinah hian, ‘Anthurium par kan ngai che, ka chun leh zua hnehin,’ han ti chiah ila chuan, i ti e, min tih ka ring kan nulate hian. Chuvangin, Pu Deputy Speaker, kan ram thing leh mau te hi tu ta nge ni ang le? Nang leh kei, Zofate ta hi alawm. He lai hmun atang ngei hian in kan tan dawn lawm ni. Khawthlang ka zuk kal a, kan skill development te chuan ram pawn a hawi avangin kan lei let ah te chuan hnamdang an lo thawk a, chu mi thawk tur chuan kan thlalaite hi kan hmin thei dawn lawm ni? Zalenna sual tur pawh a kan ram tana kan chawh thawh thei chuan engatinge kan ram siam tura kan chawhthawh theih loh ang tih hi ka ngaihtuah a ni. Khawthlang kan kalna zawng zawngah chuan kan leilet zawng zawng hi Mizo in neitu nihna kan nei a, a thawh tak tak erawh chu ram pawn atangin an rawn thawk a nih chu maw le! Kan sawi duh zawk a chu, he ram development pawh hi he ram atangin kan tan dawn lawm ni? Art & Culture Department hian vawiin atang hian tih tur a va ngah em, Department pawimawhtak a va ni em! A department tih len leh zual a va ngai em tih hi ka sawi duh a ni. Kan ram pasaltha te, kan hnam pangparte pawh kan chawimawi loh chuan tunge min chawimawi sak ang? Aizawl nu ho pangpar khawite hi en ta ila, Sap hming leh hming dang vek a ni, kan pangparte chu zokhaw lamah kan um liam tawh a nih hi. Chuvang chuan hla thu ngei pawh in kan thinlung te chu hnamdang

pangpar tehkhin thu in min hneh thei tak tak chuang lo a ni. Chutiang zel chuan kan hnam pasaltha, kan rama thing leh mau zawng zawng te hi neitu nihna nena en kawl tur chuan he kan zirtirna hmasa ber lo dawn, kan rilru lo hruai chhuah tawh hi i pianna ramah kir leh rawh tih ang deuh khan hruai kir leh turin Art & Culture Department a pawimawh a ni. Tun aia lianleh zual hian an Department hi tichak in, ti lian leh zual ang u, tih hi ka sawi duh a ni. Pu Deputy Speaker, ka lawm e.

DEPUTY SPEAKER : A lawmawm e, tunge han sawi ve leh ang le? Pu R.Vanlalvena a phar hmasa a, a dawtah Pu John Siamkunga.

Pu R.VANLALVENA : Pu Deputy Speaker, ka lawm e. Hun kan ngah lutuk loh bakah kan sawi tur department hi a tam deuh hlek a, tam tak hi kan sawi hman dawn lo in ka hria a, ka rilru a lo lang zawkah chuan, an department hma lakna fakawm leh an tihthat te tam tak a awm a, chulam chu thlur hman vak lo turah ka inngai a, tlem tlem in a department hrang hrangte kha suggestion ang deuhin, ti zawng hian kal ila a tha ang a tih rawtna ka rilru ah a awm a, chu lam chu ka sawi duh a. Kan Minister zahawm tak, Pu Rohluna te chan atang hian tan ila, an thawhrimna te kan hria a, Education ah te, Trade & Commerce ah te, Industries-ah pawh, hma an sawn na tam tak kan hmu a. Chanchinbuah te sawi chhuah sen loh in kan hmu a ni. Education ah bik pheii chuan an hmalakna nasat zia te, kan ramin hma a sawn zia te kan hmu a, nimin piah lawk ah pawh Education Centre Building kan Minister zahawm tak hmalakna in a foundation kan Chief Minister zahawm takin a phum tawh a, an hmalakna hi a tam hle a ni.

Chutihruual chuan, education bikah hian ngaihtuahna ka neih len em em he ti zawng hian kal ila a tha ang em tih ka ngaihtuahna luahtu hi a awm ve a. Chu chu he House zahawm tak ah hian han sawi hmasak ka duh a. Kan hria a, kan ram ah education ah a bik takin sawrkar school ah hma kan sawn lo hle a, sawrkar primary school ah hian. Kumtina education department in publication an tih chhuah thin hi ngun takin ka study thin a. Govt. School-a naupang awm zat te, private school a awm zat te, Govt. Aided te, Govt. Primary School leh Middle School awm zat, naupang awm zat ka chhut ka chhut thin a. Chung kan chhut kan chhut thin atang chuan sawrkar school, Govt. Primary school leh Middle school ah te school naupang kan neih tlem chak zia hi ka ngaihtuahna ti lian tu tak a ni a. Hei hi engtin nge sawrkar school ah hian naupang kan kal tir tam zawk theih ang a, engtinge sawrkar school hi kan tih chang tlun theih ang, sorkar school a tlakhniam duai duai hian sorkar hi mawhphurtu kan ni hian ka hria a. Tah te chuan siamthat theih ani ang em tih ka ngaihtuahna ah a awm a ni. Thui tak kan sawi hman dawn lova, a bik takin hemi keimahni khawpui chung Aizawl bik ah hian SDEO 'E' leh SDEO 'W' huam chung a government primary school bik hi he House-ah hian rampum tehkhin atanah sawichhuak ta ila tha in ka hria. SDEO Aizawl 'E' ah hian government primary school hi 83 a awm a, 'W' ah hian 71 a awm a ni. Heng school belhkhawm School 154-ah hian naupang 8021 an awm a, SDEO 'E' leh 'W' hian kumtin in school naupang hi 400 bawr velin kan tlakhniam ziah thin a ni. Chutiang chuan

sorkar school hi kan hniam chak em em a, hei hi enge a chhan ni ang aw tih hi ka ngaihtuahna ah hian a awm thin a.

Chuvangin, heti hian ti ta ila a fuh ang em tih rawtna kan minister zahawm tak hnenah leh he House zahawm tak atanga rawtna ka siam duh chu kan sorkar zirtirtute hi census ah leh electoral roll khawihthu atan hian kan hmang nasa lutuk a; hei hian kan zirna hi a ti chhia niin ka hria a. Electoral roll phei chu kan hria a, MP roll a awm a, MLA roll a awm a, Village Council roll a awm a, sawlam autonomous council district ah phei chuan District Council roll an awm leh a. Hetah Aizawl ah local council roll a awm a, AMC roll hian an belhchhah leh nghal a. Electoral roll siam hi a ngai reng mai a ni. Kan zirtirtute hi kan chhawr nasa si a, zirtir na pe hman lo hian kan dah hnem lutuk niin ka hria. Chutah census an kut ah kan dah leh a, election duty ah kan hmang leh a. School naupang tha taka zirtir theihna hun hi kan pe lo deuh ni hian ka hria.

Chuvangin, Pu Dy.Speaker, zirtirtute hi hetah hian hmang tawh lo ila, election department ah hian department dang ami te pawhluh dan hi a awm lawm ni? Election department hian contract basis in emaw, engemaw a lak theihna an nei ang em? Tichuan, school naupang te hi kan nei tam leh deuh thei ang em aw tih hi ka ngaihtuah a ni. Sorkar school a naupang hi han en ta ila, an school te hi kan han tlawh a, kan kal ve zauh zauh thin a. An zirtir tute pawh hian an naupang te tan ah hian beisei hi an nei sang lo. Ka tawng mawilo nilo se, sorkar school a naupang dah ho hi economic ah pawh a hniam lam zel hi an lut khawm leh nghal a. Chuvang in, kan sorkar school hi a tlahniam chak em em ani tih hi kan chiang tlang in ka hria. Tuna kan hriat dan in primary school 14 te phei chu kan minister zahawm tak tak te hian school 7-ah an lo chhunfin tawh a. Hei pawh hi school naupang an neih tawh loh vang niin a lang a ni. School zirtirtute hi theihtawp a zirlai te zirtir thei tur hian siam ta ila, kan primary school leh kan middle school te hi kan khaichhuak leh thei ang em.

Kan House zahawm takah hian nimin piah lawk kan minister zahawm tak in a kan member zahawm tak tak te zawhna an chhannaah khan school lut lo Mizoram pumpui ah 2665 an ni a ti a. Ka hresual em ka hre lova, nimin ah Zalen chanchinbu ah khan 1714 school naupang school lut lo an awm tih chanchinbu ah alo chhuak leh a. Zalen chanchinbu mi lampang te ka phone-a anni in SSA atanga information dawng an ni tih min hrilh a. SSA lam ka phone leh a, chuti takin an chiang lutuk lova mahse alo nih hmel a. Kan SSA leh kan Education department inkar hi siamrem deuh angai ani tih hman atanga ka rilrua awm tawh a belhchhah a. Tiang a kan minister zahawm tak in a ni 2/1 lek liam ta a helai House zahawm taka a sawi nimin chanchinbu a a sawi ang lova lo lang leh ta kha a pawl mange aw ka ti a. Information hi a rualkhai hian a kallo nge an hmalak thinna hi a rualkhai hian a kal chiahlo em maw ni chu aw ka ti a. SSA leh Education inkar hi tunhma atang pawn chanchinbu ah te pawh neuh neuh te kan hmu ve thin tawh a, kan la hriat reng ka ring. Tahchuan, rawtna kan siam duh a chu SSA a SPD (State Project Director) kan han tih ang chi ah te hian Education Dy.Director te hi awm ta se'ng rualkhai zawk hian SSA leh Education pawh hi an kal thei awm mange aw tih kha ka ngaihtuahna ah a awm tel bawk a ni.

A dawt lehah chuan Pu Speaker, Higher ah hian luh tel ka duh a, Education kan kal lai law law in. Higher hi an che tha khawp in ka hria a tunah hian. Higher ah hian in kan result te a tha tawh em em a ni. Tun 2014 Graduate, BA, BSc, BCom, BSc (Horti) leh a dangte a kan result te han en khan 2014 khan mi 3085 vel Graduate thar kan nei a, regular ah ringawt. Regular lo repeater te exam leh te nen pheh chuan a pass thar kan ngah em em a ni. Rawtna kan siam leh duh a chu kan higher minister zahawm tak tak te purview chu ani chiah lo mai thei a. Mahse, hma kan lak chuan tih theih niin ka hria. Hetiang a graduate thar 3000 chuang kumtina kan neih lai hian Mizoram University ah hian admission hi 700 bawr vel chauh kum1-ah an nei thei a ni. Tun kumah pawh khan 700 vel an nei a, 3000 chuang an pass lai a helai keimahni state chhung ah 700 tih vel chauh admit theih annih si chuan state danga kal theilo chhungkua tam tak hi an awm a. Tun kumah ngei pawh khan 1st division a pass te pawn admission an hmu tawh lo a ni. Chumi anih avang chuan Pu Dy. Speaker University dang hi a awm a ngai a ni. Lunglei lamah te pawh beih mek a ni a. Hei hi engtik ah nge a hlawhtlin dawn kan hre lova, a nghahhlelh awm khawp mai a.

Chutih rual chuan Pachhunga University college ah hian awlsam takin admit theih an ni. An zirtirtu lecturer ho pawh khulai university te nen a inang tlang vek qualification inang tlang vek advertisement thuhmun a lak vek board thuhmun a lak vek an ni a. PUC-ah khuan awlsam zawk a admission an hmuh theihna turin seat hawnsak theih dan hi he House zahawm tak atang hian a tih theih ang em? Kan Chief Minister zahawm tak hian hun hmasa lamah pawh Pachhunga University college khu alo tanpui tawh a. Hei hi Mizo hnam issue a ni a. Vawiihah graduate thar tam tak admission nei lo in an awm laklawh a ni. Mizoram University hian PUC ah hian MA admission hawn hi remti se, engmah sum senbelh a ngai bawk si lova, a lawmawm ngawt in ka ring.

Tin, Land Revenue & Settlement department hi an che tha em em a, kan budget ah te pawh khan kan hmu a. An tih tur tax an lak theih dan tur te, tunah mai pawh khan hei paper tha tak mai an rawn present leh a, hengte hi tangkai taka hman anih theih na turin mipui hian kan thlir thupin ka hria a, an hmalak na hi a tha kan ti tlang hle in ka hria a ni.

Tin, Industry department hi a zau em em a, hei kan minister zahawm tak tak te leh kan parliamentary secretary zahawm takte hi education alo hautak bawk si a. Industry alo awm bawk nen a hautak a ni tih hi alang reng mai a. An hnuai ah hian ZOHANDCO te, ZENICS te, MIFCO, ZIDCO, Bamboo Development Agency, Food processing te, Geology & Mining tih thleng hian kan awm a. ZOHANDCO leh ZENICS, MIFCO leh ZIDCO te chu tihian kan kal liam dawn niin alang a. Chutih lai chuan, Bamboo Development Agency te, Food processing mission te, Geology & Mining lamah te hian an rilru hi rawn dah nasa deuh hlek se'ng a lawmawm awm mang e aw ka ti a. Khu keimahni awmna lai ve Venghlui ah tun August thla, tun ruahsur tam avangin lei a khi nasa em em a, chhungkaw 40 laiin an tuar a. Mahni in te riah chhuah san in mangang takin an awm a, chutih laiin Chief Minister zahawm takin min tanpui a, kan lawm hle a, side drain siamna tur PWD atangin min tih sak a, chubakah kan Disaster Management Minister zahawm takin a

hmunah minrawn tlawh a Aizawl DC te, Mining a kan officer te, kan director te, PWD a kan engineer ten a hmunah min ensak bawk a. Kan sawi duh tak lai chu Mining a kan director leh kan officer ho in minrawn tlawh a, a hmunah a lei ngheh leh ngheh loh, a chhungrila lei awm dan te, tui awm dan te, en Chiang a khawl han hmang tur khan pawisa an nei miah lo mai a, cheng khat mah hi an neilo tak tak a, chu chu kan mangan pui khawp mai a, Industry Department atang hian an tan hian pawisa a dah tam deuh theih em tih te kha ka rilru ah a awm a. Industries Department atanga peng hrang te te ho te hi tlemin rilru pe deuh hlekin minrawn en sak theih em tih kha kan ngenna pah a ni.

Trade & Commerce hi ka sawi chak khawp mai a Pu Dy.Speaker tlem te in. Hei an hmalakna zahawm tak tak mai, Vairengte te, Bairabi leh Kanhmunah te checkgate an neih thu alo lang a. Ka ngaimawh em em chu Zokhawtharah khian checkgate tha zawk kan neih hi a ngaiin ka hria a, Zokhawtharah khian checkgate a hawn theih em? Burma lam atangin bungrua alo lut nasa em em a tunah hian, nitinin nuaih tam tak man alo lut thla a. Khing ah khian checkgate fel tak neiin import leh export license te pe in chhiah tam zawk land custom station hawn a nih hma pawh hian a lak theih lawm ni. Kan state in sum hnar kan mamawh hle si a, tih kha ka rilru ah a awm tel bawk a ni. Pu Dy.Speaker hun min pek belh a kan lawm e. Heng kan department vawiin ni a kan minister zahawm tak tak te department chan hi vawiinah hian pass turin karawn thlawp e, ka lawm e.

DEPUTY SPEAKER : Pu John Siamkunga ilo sawm ang.

Pu JOHN SIAMKUNGA : Pu Deputy Speaker, ka lawm e. Hei vawiinah Minister zahawm tak tak pahnih te chan kan han sawi dawn a, department pasarih lai mai a ni a, chuvangin uluk deuha han sawi dawn phei chuan a tam ang reng a, awmze awmlo a han sawi mai hi a hlauhawm thin avangin ka theih ang ang te kan sawi ve ang a.

A hmasa berah chuan School Education ah hian tan lawk ka duh a. Tunah hian Education department hi a changtuten nasa takin hma an la a, school mapping and school information system te computerize a tih an tum chho mek tih kan hria a, 85% te an zo tawh a, khami a nih chuan a mapping chungchang ah hian nasa taka hma an lak phei chuan school information hi an website ah te, a nih loh pawhin online system in awlsam takin kan en thei tawh dawn a. Zirtirtu engzat nge an neih, student engzat nge an neih, student teacher ratio engzat nge, chu lai school ah chuan tih te kha awlsam te te a kan hriat theih tawh a rinawm a. Helama hma theih tawpa an lo lak hi a lawmawm hle in ka hria a, chumi a nih avang chuan helaiah hian lawmthu kan sawi duh zawk a.

Tin, hei salary component hi a lian em em zel a, a loh theih loh a, kan budget ah hian, school education ah pawh hian a lian hle a, a bikin Primary teachers-ah te. Tin, hnathawhna lampang tur hi tih tham a awm mang lo a, kumin a work programme atang kha chuan Elementary

school building 2 sak tum a ni a, tin , school building dang sawm kha repair tum a ni a, nuai 30 vel a rawn lang a. Helaiah hian tlem han sawi duh ka nei a, nikum lampang tawh zawk mah kha a ni a, khimi Bualpui H ah khian thli na deuh mai a rawn tleh a, a nat dan a kha bing deuh maiin a rawn tleh a ni. Kan High School a rawn ti chhia a, a chung zawng zawng a herh tla vek a, brick awm lohna chin zawng kha chu a herh tla vek a ni. Thil dang kha chu a ti chhe chuang lo, tichuan a thlang lampang ah thawk thla leh in Primary School building hlui ve tawh tak mai kha a nam sawp leh vek a, chutiang chuan kan tuar a. A sakna tur hi department ah te minister ah te kan thlen thin a, amaherawhchu sum awmlohna vangten kan ti thei lo a. High School building erawh chu BADP hmangin kan sa tha leh tawh a, Primary school erawh hi chu kan la ti thei lo a, tunah hian Hall ah naupang ho la kal tir an ni a, hei hi kan minister zahawm tak hian min lo chhinchhiah sak leh sela.

Ka sawi duh leh chu kan school kaldan system leh kan teaching system hi a thalo nge ka hrethiam lo a. Kan fate school kal nan sawrkar school kan han duhlo deuh zel ta mai a hi a pawl hle in ka hria a, school naupang nei manglo, zirtirtu awm si kan tam em em mai a ni. Chumi chuan kan zirna system hi a ti chhe thui hle a, vawiinah chuan english medium kan pan chum chum a. english medium awmlohna hmunah pawh thingtlang khaw kilkhawr deuhah pawh din tawk tawk a ni a, nu leh pate pawh an hah phah hle a, sawrkar school belh tlak loh a a awm ta hi a pawl hle in ka hria a. Hmun thenkhatah belh tlakin awm mahse belh tlak loh hi a tam zawk a ni tih kha kan Chiang a. Hei hi alo in tan na hi a rei hle tawh a ni tih erawh chu kan hre vek a ni. Kum 1980 bawr chho vela zirtirtu qualified teh chiam lo, pre-teachers tih kan lak chhoh lai atanga lo kal chho kha niin vawiinah hian a rah kan seng a.

Mizoram State hi zirna lamah sang in ti in literacy percent sang viau mahse tawng dang thiamlo hi kan tam a ni. Mahni tawng chhiar tawk tawk thei, ziak leh chhiar thiam chu kan tam, amaherawhchu state dang te ang lo takin Mizo tawng tih loh tawng dangah hi chuan kan hnuful fal em em vek a, chu chu kan harsatna a ni a. Hmun dang state dangah a ni emaw, khawvel danga kan in expose theih loh na a ni tih kha kan sawi duh a. Hei hi engtin nge hma kan lak ang tih pawh hriat thiam har tak a ni. Amaherawhchu hei hi alo in tanna rei tawh , vawiinah VRS hmanga kan hotuten a chhuak duh (Pension chhuak duh) te chhuak sela, tha zawk i la teh ang u, kan han tihna kal chho ah pawh hian helaiah hian engtik ni ah nge kan siam that theih ang tih erawh hi chu ala Chiang chuang lo in ka hria a. Chuvangin kan fate kalna tlaka siam chhoh theih hi a nghahlelh awm hle in ka hria tih kha kan sawi duh a.

Tin, teacher student ratio hi kan buk dan hi a dik em, dik lo em ka hre lo a, keini ang thingtlang bialtu te tan chuan school naupang za chuang 120 or 130 awmna ah pawh pahnih chauh min pe a ni. Ka lo hriat dan hi a sual loh chuan class room pakhat ah teacher student ratio hi 1:40 a ni. Zirtirtu pakhat in naupang 40 a control thei tura ngaih a ni. Mahse primary school ah chuan class tam tak a awm a class I, II, III & IV khan a awm chho a, khatianga classroom hran hran awm si ah kha chuan zirtirtu kha an awm ve nual chu a ngaih hmel tlat a ni. Class in ang si lo, pawl khat, pawl hnih, pawl thum te hmun khata han chhun khawm ringawt maia zirtirtu pakhatin han enkawl

ringawt mai kha chu kan education system kha chu tha tur chu a nilo hrim hrim tih erawh kha chu a Chiang. Chuvangin class hrang hrangte enkawl turah Khan class pakhat, section pakhatah Khan student kha 40 aiin an tam tur a nilo, a ratio ah tihna awm tak zawk a ni in ka hria a, ka lo hriat ve danah pawh a ni a. Amaherawhchu, ka lo hriat ve danah chuan harsatna avang te in kan kal tawk tawk a ni a, kha kha wawin ni a kan dinhmun chu kan hre tlang theuh a, engtin nge kan siam that ang tih erawh hi chu sawi thiam har tak chu niin ka hria a.

Tin, transfer and posting ah wawinah kan minister zahawm tak te hmalakna hi tha in ka hria a, a MLA hriatpuina lo chuan transfer and posting hi tih nilo se an tih hi a tha a ni. A vang chu VRS ah te zirtirtu an han la a kum 2 kum 3 pawh tling manglo an han awm a, transfer an khelh nghal ngat ngat ringawt mai a ni. Thingtlanga thawh an duh lo, thingtlangah Khan naupang zirtirtu mamawh ngawih ngawih awm mahse tlanhhiat san an tum deuh vek a ni. Khami a nih avang Khan bialtu MLA ten thu neihna kan lo neih loh si kha chuan an pawt phawi zawk zawk mai a ni. Khami a nih avang Khan a tuartu chu thingtlang naupang tlema fianrial deuh sawrkar hnathawk in tlema an awm duhlohna hmun hi a tuartu kan ni thin a, chumi a nih avang chuan MLA ten hriatpui ngei nise tih atang hi chuan zirtirtu pahnih emaw tal hi chu an awm ve vek tawh a, hei hian tlem chuan zirna chu tlem chuan a ti sang deuh lo maw aw tih erawh chu ka ngaihtuah deuh a.

Tin, a in pawh bawk a Higher & Technical Education hi han sawi leh lawk ka duh a. Tunah hian kan bial ah Hnahtial College-ah sawn Geography Department hawn sak kan ni a, kan sawrkar chak tak in kan pu kaihhraina hnuaiah sawlai a college lo awm ve ta chu tiin kan hun hmasa lam Khan nasa takin min develop sak a. Building thar te kan sa a, a kawng te pawh jeep road ni thin kha, truck-able in laih ani tawh a, black top vek a ni tawh a. Tin, girls hostel mai bakah field te laih sak kan ni a, auditorium te pawh sak a ni a. Khatiang Khan naupang pawh kan ngah tawh a, bus pawh Hnahtial khua mai ni lovin khaw thenawm a mi te school naupang te phurin a service ve vat vat thin a ni.

Chutih lai chuan harsatna lian deuh mai kan nei ta a. Geography saw permission min pe mahsela zirtirtu nghet kan nei tlat lo mai a ni, zirtirtu nghet kan neih loh avang sawn kan buai hle mai a. Kuminah phei chuan Mizoram University atang in an rawn enfiah a, an rawn inspect thar a, school naupang thar a fresh chuan lo la tawh suh u min ti nghe nghe a. Tuna alo awm sa te hi chu lo exam pawh ni se in lo la anih chuan Lungleiah an exam tawh ang an ti a. Chumi anih avang chuan affiliation kha kan ti thei ta lova, school naupang thar lak pawh kha min phal ta lova. Chutih lai in a feeders school te kan han en chuan geography la hi an tam em em mai a ni college ah geography department a awm tawh tih hria Khan, kan college tiropui tu ber pawh geography students an ni.

Chumi anih avang chuan kan Minister zahawm tak hian min lo chhinchhiah sak se ka duh chu college sawm kan han la chhuak a government Aizawl north college te, Hrangbana, Serchhip, Kolasib, Lunglei, Champhai, J.Buana, Lawngtlai, Saitual ah te. Heng ah te hian

geography zirtirtu tam tak an awm hlawm a, keini hi chu part-time pathum min pe a. Tuna Mizoram University in min thurawn dan chuan a nghet pakhat hi chu nei thei ula, affiliation lampang hi rawn dil nawn leh rawh u tiin min rawn a. Hei hi min lo chhinchhiah sak sela, a nghet pakhat tal min dahsak a part-time pathum ni lo hian pahnih min pe se, pakhat hi hmundang a sawn ni se, khatiang khan min tihsak thei em aw tih kha ka rawn sawi tel duh a ni.

Tin, Industries Department ah hian tlem sawi ka duh a. Helaiyah fabrication industry hi Mizoram ah a lian chak em em a, iron & steel lampang nasa takin an kal tawh a. Tin, tunah phei chuan aluminium industry hnuaiah windows te, shutters te leh thil dang dang te an ti nasa a, hetiang lamah hian thenkhat a thawk nasa phei chuan a crore tel kumkhat ah hian an thawk ve tawh a ni tih te kha kan sawi duh a.

Tin, kan sawi duh leh chu helaiyah kan Food Processing Industry erawh hi chu eitur lampang ah erawh hi chuan Mizote hi kan product kan ngaisang thin lo erawh hi chu a paw ka ti. A chhan chu mahni hnam thil kan ngaihsan loh chuan kan ram chhung ah hian processing industry hi a ding chhuak ngai lovang tih ka sawi duh a. Mahni hnam thil hlu leh tharchhuah kan ngaihsan loh chuan a market hi a awm lo nghal ringawt mai a ni. Chumi anih avang chuan MIFCO a awm lai pawn kan sawi tam ber chu MIFCO tharchhuah chu Zoram mipui hian in ila, kan in zo anga, a bak excess emaw surplus chu hmundang ah thawn chhuak ang kan ti thin. Chutiang rawtna te pawh chu committee ang te pawhin kan pe thin a ni tih kha ka sawi duh a.

Geology & Mineral Resources-ah tlem te han sawi ka duh a. An ni khu 1980-ah din an ni tawh a, industries hnuaiah hian peng pakhat in wing ang in rei tak an awm a, 2010 khan Directorate hran in an lo ding ve tawh a. Anni hi revenue pawh an thawk chhuak nasa a, minor mineral investigation and development hnuaiah hian kumin kan budget ah pawh hian 3.55 crores lai an rawn thawk chhuak a. Anni hi quarry lam enkawl hna te an thawk a, balu te an la lut nasa a.

Heng avang hian anni hi ngaihtuah an ngai khawp in ka hria a. A chhan chu mining engineer pakhat chauh an nei a, mining department ang a kan ngaih hian. Tin, Assistant Geologist te khu appointment atang a chhut chuan kum 15 te an lo ni tawh a, gap a thui em em mai a ni. Nakinah phei chuan hetiang zela a kal a kan ngaihsak loh phei chuan department hran, Directorate hran mah ni se lak tlak vak loh in an la chhuak mai ang a tih te a hlauhawm a. Chuvangin an ni hi Industry department hnuaia awm mah ni se ngaihsak an ngai hle a ni tih kha kan sawi tel leh duh a.

Tin, kan sawi tel leh duh chu Trade & Commerce hi tawite in Pu Deputy Speaker. Kan House Leader zahawm tak hian tunhma in Thingsai-ah khian Weekly Haat, Border Trade kha a hawng tawh a, ama kuthnu te hi ala tam hle mai a ni. Chungte chu ama tanpuina hnuaiah hian kan han chhonzawm leh a, tunah hian project lian tak central lamah te thehluh a ni a. Khimi alo puitlin chuan Lunglei lampang saw khi lampang atanga rawn feed in nasa takin hma kan sawn thei ang tih

kha ka sawi tel leh duh a ni. Hun ka la hek lutuk ange ka lawm e Pu Deputy Speaker, a vai hian ka support a ni tih ka rawn sawi duh a ni.

DEPUTY SPEAKER : Tunge han sawi veleh ang le? Dr. K.Beichhua.

Dr. K.BEICHHUA : Pu Deputy Speaker, ka lawm e. Nichin khan kan member zahawm tak Pu Rinawma speed kha a chak lutuk a, speed down ka han tum dawn a mahse member dang te an lo inzep hlauh a. Pu Deputy Speaker, hei a hmasa a ka sawi duh chu hmanni Transport demand kan sawi khan keini pian hnulam a full budget-a demand ka sawi vawi hnihna a ni a, enge tha a tha lo ber kan hre lova. Chutih laiin thahnemngaih na khan head account a pawisa kan dah tlem chungchang ka sawina ah khan kan Minister zahawm tak khan a tlem deuh pawn kan dil belh zel anga a ni mai alawm tih kha a sawi a, a thlamuanthlak hle in ka hria a. Chuvang chuan a tlem deuh pawhin kan dil belh zel turah ngai ila.

Land Revenue & Settlement Department ah hian Pu Deputy Speaker, ka lo vui ve deuh na thin chu kan ram hi hma a sawn chho anga, kawng hrang hrang ah kalkawng ah te leh thil dang dang ah hmasawna kan nei chho zel anga, ram hlut na hi a pawimawh chho zel dawn a. Chutih lai chuan kan department lam thawktu te hi an thawk nasa a, a mangangthlak in a luhai thlak pawn ka ring a. Chutih laia pawimawh deuh a ka hriat chu tun dinhmuna LSC inbawhthuah nasa lutuk hi eng angin nge solve an tum kan hotute hian, hetah hian hmathar lak na te pawh an nei ngeiin ka ring a, hengah te pawh hian eng ang in nge ke pen an tum tih te pawh kha hriat a chakawm hle in ka hria a. Tawi te te in ka han sawi mai anga ka ngaih pawimawh zawng, chunglai chu a pawimawh hle in ka hria a.

Tin, Higher & Technical Education Department ah hian tlem in sawi tur ka ngah deuh hlek anga. Pu Deputy Speaker, kan hriat angin zirna lamah hian khawvel ah competition hi a sang nasa tawh mai a, kan Zoram ah ngei pawh competition a sang a, hma kan sawn chho zela, kan hotute hmalakna a zarah hma kan la sawn chho zel turah pawh ngai ta ila. Chutih lai chuan kan district lama kan college, kan zirna sang te dinhmun han en hian nasa taka tan lak lehzual hi chu ava ngai dawn em tih hi ka rilruah a awm thin a ni. A bik takin keini chhim tawp lampang Saiha atanga rawn kal tan pheichuan kan college dinhmun te saw han sawi ta ila. Ka starred question july ni 9-a ka zawh ah khan kan Minister zahawm tak hian Saiha College building sak nan sawn nuai 106.04 ania, tin, physical achievement kha 68% tiin min chhang a. Tun session ni 16-a ka zawh leh khan nuai 73.69, physical achievement 99% a ni tiin min chhang a, khalai kha engpawh nise kan Minister zahawm tak hian min lo enchian sak se, engemaw tihsual palh te nge ni ang a, thil dik kha hriat a chakawm hle in ka hria ani. Chutichuan kan College a bik takin Saiha saw han ti ta ila, hmundang han sawi vak na hun a awm loh avangin ka bial Saiha Government College saw, senior college ve tawh tak a nia. Tunah sawn student 500 chuang kan awm ta a, zirtirtu saw 20 bawr vel an awmin ka hria a. Building saw la zawh loh a ni a, thutna tha kan la nei lova, tawt deuh sawn student ho sawn class an nei ve tawk tawk ani. Chung avang chuan saw saw khawngaih takin kan

Minister zahawm tak hian, a hla ber kan nihna ang hian duhsak deuh hlek a priority min pe thei se tih kha ka ngenna a nia. College-ah sawnin student in a activity an han neihna tur engmah saw a awm lova, chulovah chuan han thut khawmuanna emaw han chawlhna tur tak ngial te pawh saw a awm lo a ni. Tin kan hostel RUSA atanga Boys Hostel an sak te pawh saw a hmunah ngei ka va tlawh a, luahtlak mang loh sawn a awm a, chutiang dinhmunah chuan kan awm a ni.

Chutih lai chuan tun hnai hian Sociology a lecturer pakhat kha heti lama sawn tur ang deuh ten kan lo hria a, chuti anih chuan Sociology lecturer pakhat te chauh kan nei dawn a, loh theih loh a helam a awm a ngaih thil anih erawh chuan, sawlai ah Sociology MA (NET) chhuak tawh te pawh saw kan nei ve nual a, sawng te pawh saw alternative angin min ngaihsak thei ula tih kha ka ngenna a ni bawk a. Tin, tun hma chuan kan college ah sawn Science stream te pawh kan nei a, tunah hian Science stream lak chhuah in a awm a. Engtikah nge kan neih leh ang tih hi kan nghakhlel hle ani tih kha kan Minister zahawm tak hian min hriatsak atan ka sawi duh bawk a. Sawi zung zung ila.

Art and Culture kha han sawi ta ila, Art and Culture hi thildang han sawi vak ka tum lem lova, a hminga thalai hruai tute kan lo nihve na angah, thil pawimawh deuh a ka hriat chu, heng zo hnahtlak te te ho hi kan insuih kawmna tha leh kan inpumkhatna min ti tha tu em em a ka hriat ve chu Art & Culture through a Cultural Exchange, Cultural Meet kan neih ang te te hi niin ka hria a, chuvang chuan kan hnam leh kan ram kan pho chhuahna ber chu Art and Culture kan tilo thei lova. Hengah te hian Zo hnahtlak hmun hrang hranga awm ang te hi kan Art & Culture ang a intawhkhawm a, meet han neih thin a, cultural meet han neih anga organized thin nise, kan inpumkhat na kawngah pawh hian hma kan sawn phah ang a, chu loah kan thalai te hian Art & Culture ril taka a pawimawhna hi an hriat phah ka ring a. Chuvang chuan helaiah hian, kan Minister leh thawhpui te pawh khanin, a theih pheih chuan kumtin, a theihloh pawhin, kum hnih danah emaw, kum thum danah emaw te tal hian chuan Cultural Meet te pawh hi min neih pui theise a tha hlein ka hria a.

School Education Department Demand No. 20-na kha han sawi leh ta ila, hei mipui mimir chuan kan lo nghahhlel bera chu World Class Education kan hotuten min lo kawhmmuh kha thlen vat vat hi kan chak viau ani. Chutih rual chuan vawiin a kan dinhmun ngaihtuah hian, a englai hi nge ni, tu Sorkar pawh nise langin loop hole kan neih kan school education kan kal chin angah hian tihna hi rilru lian takin ka nei thin a. Tun kan dunhmun ah chuan Mizoram a school awm zawng zawng kohhran emaw, pawl emaw, private emaw anga kan neih chhun hian ka hriatsual loh chuan 34% vel hi Sorkarin School kan run awmin ka hria a, chutih lai chuan Sorkar School a awm hi, a tlangpuiin keini ang a, berh te te, rethei te te deuh vek hi kan nia, chu aia rilru tina leh zual a ka hmuh chu, zirtirtu ten an mahni School-ah pawh fate dah duh tawh lova private school a kan in dah teuh teuh ang chite ka hmuh hian a englai hi nge insiamthat na lai tur kan neih pawimawh ber niang aw tih te hi ka rilru hian ka ngaihtuah thin a ni.

Tin, Central Sorkar in India mi kan nih angin, Hindi thiam tir ve hi a tum dan ani. Chutihlai chuan hindi in zirtirna lamah hian nasa taka hmalak na pawh a kal chho a, chutiang anih laia hindi zirtirtu te thlasarih lai hlawh pek theih loh te pawh hi, kan hotute pawh hian tun aia nasa leh zual hian tang ta se, Central Sorkar te pawh zuk dawr ta se hindi thiam tura min tih, heng pawisa min pek siloh chuan, engtingge Hindi kan thiam ang tiin thiam tak hian zuk nawr ta se kawng a awm ngei ka ring ani. Chu loah SSA zirtirtu te pawh nita se, chhungkaw pa chhungkaw enkawltu ber in a thla hnih thla thum hlawh han lak theih lohte hi chu a zirtirna kawngah khan a duh angin a zirtir hlei thei lovang tih hi a chiang a. Hengah te pawh hian kan hotuten thahnem ngai takin hma lo la ta se, a tha hlein ka hria ani.

Industry Department han sawi leh ta ila, kan hriat angin State danga Industry an hmalakna te kha sawi sawi ngai lovin kei aia hmu tam zawk leh a hre tam zawk vek in nia. Industry atang hian revenue tam tak hi State dangte chuanin an la nasa ani. Chuti lai chuan keini ah erawh chuan hnam naupang kan nihna leh kan State naupan vangte pawh ani bawka a. Tin, kan hmalak na hi a fuh lohna lai te pawh a awm mai thei bawka a, chung avang chuan heng laiah pawh hian kan in bihchian a ngai hlein ka hria a. Heng Corporation kan neih ang te te Industry hnuai a kan neih ang te te pawh sick unit-ah kan chhuah deuh vek a. Tunah pheih chuan, Sorkar atanga abolish a ngai ani tih hial te kan lo nia, heng avang hian a pawimawh hle in ka hria a, churang chuan tuna kan ram hausakna te hai chhuak tur leh industry hmasawn na tur hian, tun aia chak zawk a hmalak hi a va tul dawn em, hman niah Meidumah kan zuk kal a, khunglai a drilling khu an zo tawh a, chutih laia Meidum khaw miten an sawi danah chuan truck lianpui 10 vel hi chuan thil engemaw ni a phur chhuak tawh ani tih te pawh kha kan zuk hmu a. Khungte pawh khu chiang leh zuala zir nise a va'n tha awm em tihte kha ka rilru-ah a awm mai mai a.

Trade and Commerce Department hi han sawi ve leh ta ila, a tawi thei ang bera sawi kha Pu Dy. Speaker ka lo tum ang a Trade and Commerce hi nichina kan Member tam takte pawh khan an lo sawi tawh a. Tuna international trade border kan neih ang te te te pawh hi tun aia changtlung zawk a kan thum that hi chu a pawimawh hle in ka hria ani. Thil tha a lo luh lai hian a hrulah hian thil sual tam tak a lo lut tih hretu vek kan nia, tuna Champhai lam pang khitah Zokhawthar dinhmun te pawh khi a hrechiang tu vek kan nia. Kan hmasawn na tur chuan in kal pawhna tha a ngai si a, chutih rual rual chuan thil dang ngaihtuah tur tam tak kan nei a ni tih kha tuman kan hai lova, a bik takin chhim lamah sawn, inkal pawhna tur hetah Tlabung kan tih te Zochawchhuah kan tih te leh Pang khua atanga kalna tur te Lungbun te Chappui te saw international trade border atana tha tak tak te vek an nia. Sawnglai te pawh saw kan hotute hian rilruah min neih tel sak thei hlawm se a van lawmawm dawn em tih kha sawi tur tam tak a awm laiin tawi te te ka rawn sawi nise. Pu Dy. Speaker ka lawm e.

DEPUTY SPEAKER : Minute 5 pawh a awm tawh mang lova, chumi chhunga han sawizo thei tur kan awm hmel silova, churang chuan kan chawlh hun dar 1:00 p.m. a nia, a la hma hret na a kan chawl hma hret mai ang a, dar 2:00 p.m. ah kan thukhawm leh dawn nia.

2 : 00 p.m.

SPEAKER : Awle, demand sawihona kan tan leh ang a, chumi hmian tukin khan tlemin draft sem te a awm avangin chair atang pawh khan tu thusawi ber nge a hriat theih lova. Kan han enchiang ang a, ngaimawh awm te alo awm a nih chuan kan la tidik dawn nia, member zahawm tak te khan lo hria ula. Kristian kan nihna hi kan thusawiah te hian tilang ve ila, a mawi a, chu chu kan tih tur a ni a. Khaile, sawi leh tur kan awm em, Pu K. Sangthuama.

Pu K. SANGTHUAMA : Pu Speaker, vawiinah hian Minister pahnih demand kan sawi dawn a ni a, department pakua lai a ni a, a vai hi chuan kan sawi hman lovang a.

A hmasaa kan sawi duh chu Demand No. 20-na School Education Department ah hian Education Minister fel tak kan nei a, thil ngaihtuah nasa tak mi a ni a, a lawmawm khawpin ka hria a. Bial lam chungchangte pawh han sawipui ila ngaihtuahna tha tak min lo hmanpui zel thei a, chuvangin a chungah hian lawmthu kan sawi hmasa duh a. Primary School chungchang hi tunhma atanga buaipui tawh a ni a, kan Primary School neih angah hian, sorkar school-ah hian hmasawn a har khawp mai a, U.T. hunlai atanga kan duhtusam theilo kha vawiinah chuan Primary School-ah hian, kan sorkar school-ah hian lut tur an tlem tulh tulh mai a. Hei hi ngaihtuahna ka lo neih ve ah chuan kan rilru hrim hrim hi a lo changkang chho zel a, chuvangin Primary School-a kan in zirtir dan hi mipui hian kan duh tawklo deuh ni a hriatna ka nei a.

Kan Primary School-te hi English Medium-ah hian a leh theih ang ang chu let chho zel mai ila. Tichuan kan naute pawh hi tui takin kan dah thei mai awm mange aw tihna ka nei a. Harsatna tam tak chu a awm thovin ka ring a, thingtlangah phei chuan harsatna lian tak a thleng thei tho maithei a, thingtlangah chuan naupang hi kan la ngah deuh hlek zawk a. Aizawl-ah te phei chuan kan Veng Electric Veng-ah te pawh zirtirtu chu kan thahnem khawp mai a, mahse naupang kan ngah thei tlatlo mai a, a buaithlak khawp mai a. Mipui 4000/5000/6000 lai awmnaah Primary School pahnih kan nei a, kan Primary School upa zawkah pawh sawn naupang 30/40 vel pawh kan tling manglo tlat mai a, zirtirtu erawh chu kan nei teuh mai a. Chutiang ang chuan Aizawlah hian school tam tak kan neiin a lang a khatiang ang khan kan sorkar hian rilru a put theih chuan hmasawna kan nei thei mai awm mange aw tih ngaihtuahna rilru ka pu deuh a. Chu chu kan Minister zahawm tak hian rilruah lo nei ta se a that ka ring a.

Tin, zirtirtu leh zirlaite ratio hi hetia han chawhrual ringawt chuanin a tha tawk khawpa zirtirtu pawh kan ngahlo hnan lova. Primary School-ah 1:15, Middle School-ah 1:7, High School-ah 1:19, chawhrualin 1:10 a ni a, hetiang ang te hi chu zirtirtu kan nei tha tawk tih a chiang a, a tam tawk tih a chiang a, a sem rual vek theih loh hi kan buaina

pawh a ni thin a. Chuvangin, zirtirtu kan lak chang pawh hian ka rilrua lo awm thin chu thingtlang lam te hi duhsak ta ila, a theih ang tawk tawk ah kan sorkar hian thingtlang lam rawn dil ve te an awm anih pawhin a khua a mi emaw, a hnaivai a mi emaw, awm ngeth tha duh deuh tur te leh transfer dil dil lo tur ang chi hi duhsak ni thei sela, an thiam ve tho bawk a. Kha lamah khan kan Minister hian rilru lo pu leh bawk se tih kha kan sawi duh a.

Tin, High School-te, Middle School te, Higher Secondary-ah te chuan a tlangpuiin kan naupangte tan nachang lo hre tawh te anni a, a tha thawkhat viauin a lang a an zirna hi. Hengah hian zirtirtute leh naupangte an in chawhpawlh tawk viau a, a tha thawkhatah ngai ta ila.

Tin, Aizawl rau rauah pawh hian ka bial lamah te khuan Class-XII zirna hi a awm lova, a buaithlak khawp mai a, School kalna hi a hla ang reng hle mai a. Amaherawhchu, sorkar-ah te sum lama harsatna tam tak a awm avang hian pangchang takin kan dil ngam hranpa lova, harsatna erawh chu Aizawl West-I pumpuih khuan Higher Secondary hi a awmluh avangin kan buai khawp mai tih erawh chu kan hrilhnawn leh duh a, hmanah khan ka sawi tawh a. Vawikhata fel duak tur phei chuan kan ring chuang lova, amaherawhchu lo hre ve leh hrim hrim se tih kha vawiinah hian kan sawi duh bawk a.

Tin, ziak leh chhiar thiam chungchangah hian Assembly Question chhannaah khan Mizoram pumpuih ziak leh chhiar thiamlo kha kan la thahnem ang reng viau a, mahse nichin khan a in mil lo an ti a engpawh nise, question chhanna kha dikah ngai ila 2665 lai mai School kallo kan la nei a. Pu Speaker, tunhma kha chuan Adult Education khan theihtawp an chhuah thin a, India ramah pawh pahniha te kan kai pha a. Tunah hian anni lamapang hi an chawl ta deuh nge ni, hei hi thahnemngai taka la tih zel nise ziak leh chhiar thiam tam hrim hrim pawh hi a hlu em mai a, thil ziak kan chhiar thiam te, kan ziak thiam te a pawimawh a. Chu chu vawiina puitling si, ziak leh chhiar thiam lo engemaw zat la awm hi kan Minister zahawm tak pawh hian ngaimawhah lo la neih leh sela, chhiarpui lehah chuan pakhatna kan nih em loh pawhin pahnihaah kha chuan chuang chho leh thei ila a lawmawm ngawt ang. Chuvangin, adult education lampang hian tan an la leh thei deuh em aw, tih kha vawiinah hian kan sawi duh bawk a.

Tin, SSA lampang hi central atangin pawisa rawn tih tlem a ni ta vak mai a 2015 leh 2016 ah hian vaibelchhe 5858 lai mai a tih tlem a ni ta bawk si a. Tin, RMSA ah hian vaibelchhe 3565 chauh a lo ni a, a hma aiin 1435 in a tlem ta bawk si a. Tin, Mid-Day meal pawh hi vaibelchhe 10000 dawn laiin a rawn tlahniam ta bawk si a, hengah hian harsatna tam tak chu kan state hian kan tuar dawn niin a lang a. Engpawh ni se, central lama rawn tih a nih miau si chuan hengah hian hun kal zelah pawh ngaihtuahna chu hman a tul hle dawnin kan hria a, chu chu Education-ah kha chuan ni mai sela.

Higher Education-ah College lamah hian, college hi kan ngah viau rual hian, luhna hre lo tam tak kan la tangkhang ve thei nual thin a. Tunah hian evening shift lampang nge morning lampang an tihbelh niawmtak in ka hria a, heng pawh hi a tha khawp mai a. Naupang zir ve duh si, harsatna tawh tam tak te kan awm thin a. Higher Education ah hian theihtawp kan Minister ten an chhuah ngaiin ka hria a.

Tin, nichinah kan MLA zahawmtak Pu Venarawn sawi ang khan, hemi Graduate zo University a han lut chho turah hian seat chungchangah harsatna tam tak kan la nei a tih kha a dik chiah a, hengah pawh hian ngaihtuahna thui zawk hman theih a tha khawp mai a. Lehkha kan zirlaiin keini ang rual tan chuan seat hmuhloh a awm lem lova, mi kan la tlem a, kan duh duhna ah kan lut thei a ni mai a Mizoram ah chuan. Amaherawhchu, tunah chuan chung chu a ni ta lova. Seat in a daih lova, competition sang tak a awmna ramah hian sorkar hi kan nu leh pa-te engkim min tihsaktu a nih avangin, hetiang lamah hian tan kan lak zel a ngaiin kan hria a, chu chu kan sawi leh duh bawh a.

Tin, Trade & Commerce chungchang hi han sawi leh ta daih ila. Trade & Commerce ah hian hei kan Minister hian sawlai New Market ah sawn building lianpui sak an tum niawmin ka lo hria a, a lawmawm ka ti khawp a. Tuna chawhmeh zawrhna thenkhat saw a hlauhawm riau mai a, chuvangin tha zawka an sak a, mawihnai tak leh thatak a an sak theih chuan (SPEAKER : I hun i hmangzo ti tih mai) Pu Speaker, minute 1 chauh hmasawna thuitak kan neiin ka ring a. Tin, hemi Chhimlam panga sak an tum Mission Venga sak an tum saw, ka rilru in ka lo lawm ve khawp a. Ka kal apiang sawn khawlaiah sawn chawhmeh zuar harsatna tawh saw an tam em em mai a. Kan Trade & Commerce Minister in sawlaia building sakna tur ruahmanna a lo nei saw lawmawm ka ti a, a fakawm hle in ka hria. Awle, tawh mai sela, sawitur tamtak a awm a, kan MLA Pu Rinawma te angin kan sawi zung zung thei silova, kha kha ka sawi theihtawh ni mai se, ka lawm e.

S P E A K E R : Awle, Pu Robiaka.

Pu LALROBIKA : Pu Speaker, hun min pek avangin ka lawm e. Hei waviinni a kan Minister 2 Demand kan han sawi a te hi a mi na zawng, mipui khawih chi deuhhlir mai a ni a, sawithiam a har rualin sawitur a tam hle a ni tih kha kan sawi hmasa duh a.

Land Revenue & Settlement chungchangah hian han sawi ve ka'n duh chu, an pawimawh dan te, tin, tun tuma tax tam tak han lakluh theihdan tur an han chhawpchuah a te kha a ropui hle in ka hria a, a lawmawm kan ti a. Chutihruah erawh chuan ka sawichhuah duh chu, anni hian an tihthat duhloh chuan thenawm khaw vengte kan inchem

har mai a nia. Dawhkana an survey te an tihthat loh a dawhkana an tih chuan mahni lam chan ve ve kha kan tan tlat si chuan kan sawifel hleithei lova. An chan hi a pawimawh hle a ni tih chu a te ber atanga lian ber thlengin staff-te pawhin in inhriatnawn hi a pawimawh hlein ka hria a. Hetiang chungchang hi thenawmte avangin hetiang chungchang hi ka lo hre nual tawh a. chungte chu ka'n sawiduh a.

Tin, hei project lian tak takte kan nei chho zel a, hengah te pawh hian a hma a hmun nei lem lo, kawng an lai dawn tih hriat avanga engtin tin emaw a hmun lo zuk in pe ta mai te, a surveyor leh Staff-te zingah pawh hian tam tak an awm a ni. Hetiang chi pawh hi ram hi kan zavaia ta a ni a, Christian ram kan ni lehngal a, chutiang tan chuan kan tih chi a nilo a ni tih hi kan hriat fo a tha in ka hria a, chungte chu Land Revenue & Settlement chungchangah hian kan sawiduh a.

Demand No. 23-na ah Art & Culture Department hi an sawifo thin a, sawitur a tam hle in ka hria a. Vawiinni-a kan thuam chi hrang hrangte, tin Upa zai kan han tih ang chi promote a, kan identity min chhawpchuah sak tute an ni. An budget han en hian a te tham hle mai a, amaherawhchu, engtin tin emaw hemi lo a pawh hi tihsak dan hi la awm theise tih hi kan sawi duh a. Vawiinni-ah Lam chi hrang hrangte, tin Mizo khawvela min phochhuaktu, Cheraw-te pawh kha World Record kan han break ve a. Chungte pawh chu Art & Culture hnuai atanga kan hmuh theih te an ni. Chuti chung erawhchuan, Staff ah leh sum leh paiah te nasatakin, an dinhmun hi a harsa a ni.

Tin, vawiinah hian an tihthat em em chu Mizo te mizo-na an rawn chhawpchuak a. Kan dress ah a ni emaw, kan ngaihtuahna thlengin min rawn siamthat sak niin ka hria a, lawmawm hle in ka hria a. Tunhma khan western music zirna te kha a awm thin in ka hria a, keipawh Republic Veng Pu C. Pahlira In an luah lai khan ka zir ve a, ka thiam hlei lova. Vawiinni-ah hian an la nei em aw, khangte pawh kha a zuihral ta deuh nge tihte pawh kha kan sawiduh a, chutih lai chuan a awm tawh lova Pu Joseph Zokunga-te, Pu Zorampela te ho in min zirtir tang tang thin a ni. Anni hi hmun hrang hrangah keini bialah pawh, rual u zawkte leh history atana pawimawh ang chi hrang hrangte min humhalh sak a, hengah te hian lawmthu kan sawiduh a. Sawi hmaih hauh loh tur chu anni through in State Library te, tin, Archive kan tih te, chumai piahlahmah chuan sawi hmaih hauh loh tur pawimawh em em mai chu khawtin deuhthaw-ah Raja Ram Mohan Roy fund atangin Library Fund te min han pe a. In sakna tha tak tak te kan han dawng a. A khua in a kan neih theih hauh loh tur te kha vawiinni-ah hian hmun tam takah kan nei tawh a ni. Hengte hi nasa zawk in anni department hian tan han la zel sela, tuna neilo te pawhin an neih theih zel na turin tih kha kan sawiduh a ni.

Tichuan, kal zung zung mai ila, School Education Department ah hian kan sawiduh hmasak bera chu hei zirtirtu kan lak dawn te hian MPSC te kan ti chho ta zel a,

a that viau rualin he House-a kan sawiduh chu, keini bial angh chuan tha kan ti ve vak lova. Engtingge hma min laksak theih ang tih hi kan ngaihtuahna a ni. Kan bial-ah hian minority bial khaw engemawzat kan nei a, chungah-te chuan Zirtirtu hnaruk a lo awm chuan an dil duh a. Amaherawhchu, thawh hi an duh vak lo, hna hmuhna atan hian min duh ringawt mai a ni. Tin, competitive a lo nih chuan a thiam a piang lak an ni a, a thiam apiang kan lak dawn chuan Tlawng thlang atang chuan har tak a ni. Chuvangin, heti lo zawng hian tihdan a awm lawmni ? Tin, Doctorate Degree zirtirtu nei mahila, an rawn thawh duh chuan si loh chuan a khua ah a qualified tawk tawk an awm chuan, chu chu kan duh ber zawk. Hei hi kan sorkar hian min hriatsak sela, a Minister ten min chhinchhiah sak sela ka duh khawp mai . Vawiinah hian kan harsatna chu a khaw against ten zirtirtu kan la a, amaherawhchu, competitive te a nih avangin, a khuaah karkhat te an awm hnuin Aizawlah transfer an kherh leh a. Ti vel kha kan dinhmun a ni thin a ni, a buaithlak khawp a ni.

Tin, kan bial hi a buaithlak khawp mai a, lui kana thui tak kal ngai a ni a. Chuti chung chuan zirnaah te hian hma kan sawn ve em em a, kan rualawhna chu kan bialah hian secondary school pakhatmah a la awm lo a ni. Hei pawh hi Session apiang hian ka la sawichhuak ziahin ka hria a. Pu Speaker, heng te pawh hi Pu Modi-a tih ang deuhin ‘Achha din’ a la awm turah ngai ila, chung hunah te chuan min pe turah ngai ta ila. A pawl em ema chu matric an han chhuak a, drop out tam tak an awm phah a ni. Mirethei te te kan nih si avang leh loneitute kan nih avangin tam takin Aizawlah indah ngaihna an hre lo. Tih dan kan han zawng thin, mi ina awmna tur te kan inzawnsak a, a MLA nihna angin kan ti thei vek bik si lo. Chunglaiah chuan mittui tla chungin kan inthlah a ni, a then an kal lova, tiang khan drop out tam tak hemi avang hian an awm a. A bik takin pakhat tal te chu han nei ve thei ila higher secondary ang chi te, nasa takin kan harsatna min solve sak thei dawn a ni tih lai kha ...(SPEAKER : I hun i hmang zo titih a nia.) ..minute hnihkhat lek, Pu Speaker.

Sawi hmaih hauh loh tur Industry leh Trade & Commerce hi tawi tein Pu Speaker, ka’n sawi leh zawk ang a. Industry-ah hian nasa takin hma te kan sawn chhoh rualin hmasawna tur tam tak kan neiin ka hria a. Tin , thilsiamna lamah te, a kawhmuhtu kan nihna laiah nasa zawka tan la turin ka’n duh che u a. Industry hnuaiah la ti hram ila Geology & Mining hi Mizoram kan future Department tak tak an ni chho mek a, thuam that an mamawh em em a ni tih hi ka hriatpui a. Tunah hian oil leh gas exploration kan han ti chho mek a, hengah te hian anni hi a banpui pawimawh tak an ni lo thei lo a ni tih hi hriain nasa zawka tan la turin ka’n duh a.

Chutihrual chuan, Trade & Commerce ka’n sawi leh lawk ang a, Pu Speaker. Geology & Mining kan sawi ang khan vawiin niah hian Look East Policy avangin Sittwe lawngchawlhna thlengin hma lak chhoh mek a ni a. Hemi tan hian anni kutah hian thil thui tak, kan ram hnuk a awm a ni tih hi kan hre theuhin ka ring a. Chung atan chuan nasa zawka thuam thata, chu mai ni lovin hmun hrang hrangah border area hrang hrangah te pawh Land Custom Station te

pawh tam zawka kan neih theihna tura te pawh hi hma lak ni se la. A bik takin keini te pawh khung Marpara-ah te pawh khuan a remchang em em a ni tih te pawh kha ka'n sawi bawka ni e.

Tichuan, a tawp berah chuan heng kan Demand Minister pahnihte chanpual hi ka rawn support a ni e. Ka lawm e.

SPEAKER : Midang sawi leh hmian kan House Leader zahawm tak hi a hritlang a reh hleihtheih loh avangin chawlh a dil a ni tih kha House-in hria ila a tha awm e. Khai le, sawi leh tur dang, Pu Lalrinliana Sailo.

Pu LALRINLIANA SAILO : Pu Speaker, ka lawm e. Demand No. 20-na School Education-ah hian ka'n lut ang a. Hmannia General Discussion-ah khan kan sawi tawh a, engemaw chen ngaihawh zawng. Amaherawhchu, vawiih Demand a ni a, a pawimawhin ka hria a. A hmasain ka'n fak ang a kan Minister leh Parliamentary Secretary te, an ti tha hlein ka hria a. Ka lo ngaihtuahna ve thin kan sorkarin kan ti tha em em nia ka hriat chu Education-ah leh Police-ah hi chuan politics hi inhnahnawih miah lo se, a fit fit hi la ila tih hi ka lo ngaihdan ve thin a ni a. Tichuanin, tunah hian MPSC-in an han la ta hmak mai a, kha baka channel fuh MPSC bak chu a awm chuang lova. A lawmawmin ka hria a. Dik tak chuan ka vei ve em em thin, tuhnaiah pawh ka sawi a, khawi khawiah emaw kan han zin a, ka han hmuh ve thin te ka sawi tawh a. Elementary education hi kan tihfuh a ngai ka tia ni.

Vawiih hian lawmawm deuh, chanchinbuah te kan han hmu a, tunhmain kan Minister hlui kha, a hming pawh ka han sawi ang a, Pu Zosiana Pachuau kha, Congress thalaia kan awm lai a ni a, zirtirtute hming min hrilh kim theih chuan ka fak ngawt ang che, ka ti a, min pek kim theih chuan, ka ti a. Nakinah ka pe ang che a ti a. Kumkhat leh a chanve ka nghak ang che, ka ti a. Kumkhat leh a chanve chhung khan a ti thei lo a ni. Ka va kal leh a, a har khawp mai, a ti a ni. A bak chu sawi ta lo ila. Tunah hi chuan zirtirtute pawh hlawh lak dawnin nge ka hre lova, voter ID an ti ta thlap thlap mai a ni awm e. A kal dik dawnin ka hria a. Ka hriat sual loh chuan khawi khawi emaw atanga ka hriat danin khawi emaw lai SDEO lo hnufum hret te pawh an awm a ni.

Tichuan, RMSA tih te, CSS fund, SSA tih zawng zawngah hian leh Hindi chenin, kan ti vek dawn a ni a. Hei hian kawng dik hi chu a sat chhuak dawn hrim hrimin ka hria a. Engemaw hi chu kawng tha hi chu a rawn hawngin ka hria a, hmasawna nasa tak a ni. Chutih rual chuan, engati nge maw ni, ka'n sawi thin hian elementary leh thil ka'n sawi thin hian tlem hian Finance hi ka va nek deuh thin a. Pu Speaker, thahnemngaihna a ni a. Ka duh ai hian tun kan Budget-ah pawh hian an dah tlem hret thin a. A bikin khawpuia zirtirtute hi chu an ngaihtuahawm loh pawh ni se thingtlangah hian kan chhe tak meuh meuh tih hi hriatsa a ni a. Kan Minister pawhin a hresa a, kan Finance Minister zahawm tak hi Minister hmasa pawh kha a ni a, hetah hi chuan sum hi nakinah RE-ah te pawh dah leh se. A ratio han ena inphu lo lutuk maia zirtirtu hah lutuk ho hi tih dan a awm leh lo em ni ka'n ti deuh a. Kan ram hi kan siam tha tak tak dawn a nih chuanin hetah, a

bulthut atanga kan tih a ngai a ni. Hmanniah ka sawi tawh a, high school-ah, college-ah kan man zo tawh tak tak lo a ni. Chuvang chuan elementary atanga kan inuluka kan tih a ngaiin ka hria.

Tin, i veilama mi pawh an lo sorkar hun a awm ang, vawiinah pawh ka la ti duh a, kan MLA theuh te, member te, transfer and posting-ah hian insum teh ang u ka ti tlat a ni. Zirtirtu hian an duhdanin ti rawh se, Education hian ti rawh se, chhungkhat, worker kan ti fo mai hian kan ram a tichhiain ka hria a, thingtlang miin an tuar lutuk. Chuvangin hei hi chu eng party pawh ni ila Headmaster kha thu hle mai rawh se, DEO te leh Directorate kha thu hle rawh se. Chu chu tha ka ti. Chu chu uar deuhin ka'n sawi a nih chu. Thil tha an tih rualin kan thawktute, kan Minister leh Parliamentary Secretary te hi ka fak tak meuh meuh a.

Hun hmasa lamah Golden Handshake te an ti a, tunah hian Pu Modi-a hianin a rawn plan fuih fuihah chuan, kan hre thovin ka ring a, sorkar hnathawk zawng zawng hi kum 33 an thawh chuan ban tir vek a tum a ni. A ti puitling ang em aw, ka hre lova. A sawi fuih fuih tawh a nia. Kum 33 an thawh chuan a tawh a ni, a ti deuh buk tawh mai a, 'heta chin chu kan thawh chuan a tawh a ni' a ti deuh buk tawh mai a. Pu Jairam Ramesh, kan Congress hotupa phei chuan, tukinah pawh news ah in hmuh ka ring a, kum 60 chin chunglam hi chu politics-ah hian inthiarfihlim rawh se a ti hmiah mai a ni, thangtharte era a ni a. Tichuan, pakhat chiah ka sawi leh duh chu, zirtirtu, tun dinhmun ah hi chuan rationalize a har hle a nih pawh in enggemaw a vangin aikal hi lak awih tha in ka hre tlat, aikal la mai rawh se. Tin, tawng mawilo ni lo se, kan aia u deuh phei chu 1st March a piang deuh vek kan ni mai a, kha kha kum 4/5/10 dawn kha an lo ei bawh si a. Chuvang chuan, rawn man tak tak tawh lo te pawh an awm in ka hria a, a then inzir peih leh tha tak tak chu an awm rualin. Chungte chuan thingtlanga kal an hreh tlat. Chuvangin, Pu Speaker, aikal hi Rs 10000/- aia tlemlo hlawhin la hmiah tawh mai se, an tha zawk lehngal, fair takin. In ban ngawt te a theih tawh lo, court-ah an kal ang a a buaithlak, chu ai chuan aikal hi la mai se, phal mai ila tih hi Cabinet pawhin ngaihtuah leh se, hmanah pawh Cabinet-in kan pass tawh a, chu chu ka'n sawi a ni.

Industry-ah ka'n kal leh ang a. Industry hi a pawimawh a, heng zawng zawng hi han en vek ila a vai hian industry vek a ni. Kan Minister leh Parliamentary Secretary an fit veh vawh bawh a hei ai hian han tang hlek teh se ka ti deuh a. Achhanchu, tunah hian ka duh ber chu Pu Speaker, hand holding a ngai tawhin ka hria. Kawng kawhhmuh a, kawng sah sak a, a hnunga dawm bawh a, ban a kaih a, hand holding hi a ngai in ka hria, chuti lo chuan Mizoram hi, nichinah member-ten an rawn sawi a mahni kutchhuak, kan ram kutchhuak duhsakna tura dan siamte pawh a awm ve reng a, kan hmang tha em tih te pawh an rawn sawi a. Kan kutchhuak hi uar tur kan tih rual khan a tak takah chuan quality thalo zawk hi kan thlang hreh a ni e, a dik takah chuan. Chuvang chuan, industry-ah chuan, sum pawh a rawn effect theuh ang a, hand holding, bana kaia kawng kan kawhhmuh tak tak a ngai. Single windows system te pawh hi a state angin kan ti theilo deuh a nih pawhin hetiang rilru te hi kan put tawh a ngai in ka hria a.

Tun ang tleng tleng lo deuh hlek hian, term hmasa khan industry-ah hian hmasawna ropui tak ka hmu vak lo a ni. Chuvang chuan, tunah hi chuan beiseina thar kan nei a ni tih kha ka sawi duh a ni. Tin, Trade & Commerce hi ka sawi lo theilo a Pu Speaker, a hmingin term hmasaah te kan lo la tawh a, ka Minister-te leh enkawltute hian an zo in an ti tha hle in ka hria a, kan lo tui ve lo thei lo a, kan lo mitthla zui lo theilo a. An ti tha tak meuh in ka hria a.

Hmanniah Land & Port Authority a Chairman te pawh kha Central Minister tenen khan an zuk kal a ni a. An ti tha hle in ka hria a, hmun hrang hrangah unfinished portion hi a tam mai a, heng scheme te pawh hi an rawn review tawh a. Amaherawhchu, duh chuan State govt. priority la pek theih a ni. Heng pawimawh lutuk mai hi kan member-te pawhin an sawi tawh a, hei hi chu kan tih leh a ngaiin ka hre tak meuh meuh a. Chutih rual chuan, thil pakhat lek sawi leh ka duh a, ka vei em avangin, amaherawhchu, hei kan House Leader zahawm tak a awm lova, a ni awm se tha in ka hre zawk a. An purview a ni lo mai thei a, nih erawh chu nih nalai a awm a. Kawrpuichhuah hi tuna kawng awm hi fuh loh deuh hlek na a awm in ka hria a. Jan 19,2013 khan kan member zahawm tak Pu Nihar-a ho hian kan zu kal a. Bangladesh office pawh kha an rawn sawn chho a ni deuh ringawt mai a, Land & Port Authority a an chairman te, Shipping Minister -te a rawn kal a tin, khulai a Bangla incharge Pu Dipankar Talukdar, Chittagong Hill Track Minister-te kha an lo kal a ni. Tin, Chief of Army Staff, General General te, an tam mai. Tah chuan an sawi chu, “Tuna Kawrpuichhuah tak hi trade point a in rawn duan leh ruahman hi kan han en thin a, sitting deposit hi a tam dawn lutuk a Chuvangin hei helai hian tilo ta ila a ti ta a ni. Kum tin emaw, every 5 years ah emaw luidung hai fai a ngaih reng dawn avangin tah hian lawng lian a kal thei dawn lova, a thlang hi ti hram rawh u” an rawn ti a. “Ngawi rawh u, hei kawng te kan lo lai laklawh tawh a, kan lo ti tawh si a” kan ti a . Keini chuan helai chu trade point atan chuan kan ti theilo a ni an rawn ti thlawt a ni.

Chu chu kan CM zahawm tak hnenah pawh ka sawi a, hei hi chu a thlangah I ti mai ang u. Khumi sazuk lui zawn, khumi Horina-ah khuan I ti zawk ang u an ti a. A pawimawh ka ti a, hei, tunah hian Rs 18/ 19 crore nge ka chiang chiah lova, PWD hianin black top an bei leh dawn niin ka hria a. Chutiang anga pawimawh si kha rilru sen leh deuh a tha in ka va hre em ka ti ani, achhan chu a pawimawh em mai a, kan counter part te an tui miao lohva, keini chuan helai hi chu engti zawng mahin kan ti thei lovang an rawn ti si anih chuan a kawng kha kan sawn a ngai in ka hre tlat. Chutah chuan development thar a wm em tih erawh chu ka hre hauh lova , ka hriat loh vanga sawi ka ni a. Tunah hian PWD-ah work schedule ah te leh hmanniah budget presentation ah khan crore chuti zat chu Tlabung to Kawrpuichhuah a awm a tih kha a awm bawk si a. Aw, kan va’n seng thlawn mai mai awm em te ka ti deuh a ni. Chu chu a pawimawh hle in ka hria a. Pathianin rem a tih chuan Estimate Committee- te ship route-ah te kan va kal dawn a, thlaleh lamah hian. Hetiang hian, Trade & Commerce hi hma an la tha ka ti a. Ka hriat sual loh phei chuan tunah hian hma an lakna ni lo mahse an in link zela, Rs 2900 crore lai mai hi hemi transitor route atan hian an rawn dah chho a ni a. Scope sang tak kan Zoram tan hian a rawn her chhuak dawn a, chung a right person an awm hi a lawmawm ka ti tak meuh meuh a.

Pu Speaker, 2 minute ka la nei tihna nge ni ? Art & Culture pawh hi Deptt. te a ni a, a pawimawhna alang chho tial tial a. INTACH-te nena an thawhhona te a in zawm chho a ni a, a lawmawm tak meuh meuh in ka hria a. Ti ila tha ka'n tih chu, hei, thangthar te hian ram hmangaihna leh kan thinsung tak tak a ram tana han in Baptist na ang hi a awm tawh lo ang tih ka hlau khawp mai. Kan pi leh puten ram an lo ven nasat zia, sap ho pawh an lo kap, vai ho pawh an lo kap nasa lutuk ringawt. Ram kha an lo vengin an lo humhalh nasa lutuk ringawt mai a, chung chu tunah hian kan tih nun leh a ngai in ka hria.

Hmanniah kan naute London-a lehkhaw zir awm chu Russian pa nen kan inthian thaa a ti a. Russian chuan indo an sawi tawh chuan ban hi a hlim peih reng mai a ni a ti. Chutiang chuan an ram tan chuan khawiah pawh insual an ngam a ni. Israel-te awmzia chu kan hria a, Palestine, englai pawhin an ram tan khuan an inpe a ni. Khang khan an ram an veng a ram an hmangaih tlat mai a ni. Ram hmangaihna hi kan tuh leh tha in ka hria a, chumi kawng atan chuan kan pasalthate chawimawina leh an thlanmual emaw tih te a tha in ka hria a. Hei Chawngtlai in, kan bialah han ti ve ta ila, khitiang khianin Village te kan han puang a, a sawt em em mai a, visitor khi sing chuang kan nei tawh a ni, khi lai vel hrang hrang kan tihna ah khian. Tiang deuh hlek hian pasaltha mual emaw ni hi, sum tam tak, hmanlai kan pasaltha Zoram vengtute kha, vawiin niah hian tihnun sak leh tha in ka hria; an lo hlu em mai. Ka ti thin a, tunah pawh kan lo hmu a, TV ah kan hmuh tlan vek ka ring a, Israel-ah chuan mitinin pistol neih tur ani tawh mai a ni. Khatiing khanin ram hi kan hmangaih tur a ni a, kan ram tan pawh kan inpe tur a ni a. Chutiang ang tak tak kan neih hunah chuan chulai khu chu kan kalpel mai ang. Trade & Commerce-ho in helamah sea outlet changtlung-te an lo siam ang a, Sittwe lam a ni emaw, Kawrpuichhuah a ni emaw, an lo siam ang a, khu lai khu chu tute emaw dan takah kan phin nawk nawk tawh mai ang chu. Chung ang chuan ram hmangaihna thinsung kan thalaite a tuh lehzuat na turin pasaltha mual emaw, pasalthate hriatrengna leh chawimawina ang hi Art & Culture hianin, kan Minister hi hetiang zawnga a fit ber tur pawh niin ka hria a, han ti hram se ram tan pawn hmasawna te, thalaite ah kan tuh lawng maw kan ti a ni e. Ka lawm e.

SPEAKER : Midang sawi leh tur, Pu Zoram Sangliana.

Pu P.C. ZORAM SANGLIANA : Pu Speaker, tawi te tein kan sawi ang a. Vawiina kan Minister zahawm tak pahnih demand-ah hian han sawi ka duh a. Demand no. 6-na Land Revenue & Settlement ah hian tawite kan sawi ve duh mai chu, Aizawl a awm man pawh chawi thin hnam kan ni a, Aizawl khawpuite hi a hlu em em thin a, tunhna chuan. Chuvang chuan, khua leh tui kan nihna anga chhiah kan chawi tur ang hi phur taka kan chawi theihna tur atan hian awareness-te, inzirtirna te, tun aia uluk a siam a.

Tin, hei AMC-te kan han nei tawh a, Aizawlah pheih chuan, helai bawrah hian 'thunehna hi la inchuh' tih hi, tawngkam mawi ani lo maithei na a, chu ai fiahin ka sawi thiam vak lova, deuh ni hian ralkhat atanga lo thlirtute tana lo ngaihtheih tur hian a awm thin a. Helai bawr

takah te angte hian han en uluk a pawimawh em aw kan ti a. Chutih rual chuan, chhiah kan la anih pawhin vawikhata percentage a sang vak vak ni lova, a awm tawka duh leh tih zin zawk hi, chhiah pun hi, a tha in ka hria a.

Thildang tam tak sawitur a awm a, anni hi tute nge kan nih, engang ram nge kan nih, engang in nge kan neih, tih min vawnsaktu te an ni a. An Deptt. pawimawhna hi mipuiten kan hrechhuak zo lo fo thinin ka hria a, chutiang chu an ni a. Chutih rual chuan, hei tunlaia tuallai titi kan ti dawn nge, han ri velah hian awm a awm a, chu chu VC Pass-in awmzia a nei lo tih lai bawr hi, thingtlang lamah leh khawpuiah pawh hian mi hi a ti phawklek deuh hlekin ka hria a. VC Pass kan lo hum a, kan khawtlang neitu, min awptu, hnaivai bera democratic principle-a kan thlan lal te ngei mai ina hmun leh hma min lo pek, awmze nei lo anga han tlangthang leh han ri hian mi tam tak, Aizawl nu leh pate ngei ngei pawh, thingtlang chu sawi loh, a ti phawklek in ka hria a. Helai hi a awmzia, nakinah kan Minister-in min hrilh Chiang se la tha in ka hria a, chu te chu kan sawi duh a. An hnathawh dan hi ropui ka ti a, fak tlak an ni e, chung duh khawpna te, duh khawp lohna a ni zawk ang chu, beiseina te pawh ti ila, han sawi pah chuan.

Demand no. 12-na Parliamentary Affairs Department hi sawi a hlawh lo hle thin a, session-ah hian. Vawiinah pawh tawi tein ka sawi duh chu, hei tunah chuan Parliamentary Affairs Minister tur diktak kan nei ta anih hi aw ka ti a. Session-ah pawh tlem a thu inchuh leh engemaw deuh a awm pawn, Pu Speaker, i Chair rawn venpuuin, chutiang tur chu a ni lo maw, an ti thlap thlap thinte ang hi zahawm ka ti a, a role hi play tha ka ti a, as a Minister ang pawhin.

Tin, chumi mai bakah hmanni lawkah Deputy Chief Whip nen Vishakapatnam-ah All India Chief Whip Conference an zu neihna te, chung resolution zawng zawng Hindi leh English in copy min rawn pe thlap maite kha; Hindi lam kha kan chhiar a, a ngaihnam hle a, saptawng lam kha kan chhiara, a ngaihnam lehzual a. Khang angte kan han hmuh khan, kha kha amahin a rawn bawhzui anga, helai kan ram tana All India Chief Whip kalkhawm tena an resolution kha, hetiang hian hma ka rawn la dawn a nia aw ti a, min rawn warning-na, min rawn aware-naah ka'n ngai deuh a. Chuvang chuan khang angte kha kum danga kan lo hmuh ngai miah loh mai, hei engemaw chen Pathian leh mipuite zarah kan lo thut ve tawhna pawh, khatiang lehkha kher kher kha Parliamentary Affairs Minister hnen atanga kan dawn anih avang pawhin lawmawm ka ti a. Chuvang chuan khangte kha helai demand han sawi rual hian, House chhung min enkawl dante leh Committee hrang hrang a han enkawl dante hi ropui ka ti a, kan sawi lang duh a ni.

No. 21-na Higher & Technical Education chungchangah hian tawite kan sawi duh chu, keini ang, Third Division-te kan han ti ve thin a, chutianga pass vel mai mai hun angah kha chuan khawiah pawh luhna hi a har lo emaw tih mai tur kha a ni thin a. Vawiinah chuan thiam berte pawhin, kan hriat laia thiam ber division ami te pawh hi an chuang ta nual mai le. Sawrkarin tihur kan nei a ni, he Department hian tihur a nei a ni. Chawhma lama member zahawm tak tak ten, Pu Speaker, an sawi ang khan, heng ho hian college luhna institution luhna, nei lovin an awm a thianga

lo. Vawiinah he House chhunga i kaihhruaina hnuai member awmten zirlai leh thalaite zinga thu kan sawi reng reng a kan lam hmah miah loh chu 'Nangni, nakina kan ram hruiatutur' tih a ni, Sept. 5 phei hi chuan chu chu a thunawn a ni ringawt. Chutiang anga graduate rawn ni chho a, University-ah ka la sawi pha lo mah mah zawk mawle, kei phei chuan, college level-a seat an hmu lova, anmahni avanga pawl ropui tak MZP-ten a chung ang an hmuhtheihna tur atana nuar dawn lek leka an chet ngai lo hian, vawiina evening shift kan tih ringawt mai pawh ni lovin, kan khawpui lian deuhah te hi chuan heng angte hi kan ngaihtuah a ngai ta hle mai. Chutiang tur chuan kan Minister leh amah puibawmtu, Parliamentary Secretary leh Department te pawhin tan rawn la se le, keini zawng zawng hian kan lo support duh zawng tak ani ang tih ka ring a, chu lai chu kan sawi tel duh a ni.

Demand no. 20-na School Education-ah hian kan Minister hian MLA-te hi min han chhawr thiam khawp a, ka ti ve thung a. MLA tello chuan zirtirtu pakhatmah hi transfer hi a tum miah lo ta mai a. MLA chu lehlahmah chuan kan pawimawh ve riauvin a lang na a, amaherawhchu, helai bawrah hian, chawhma lama sawitu pakhatin, Tuikum bialtu zahawm takin a sawi ang khan ama ho ngei hian duhtawka sawihona, House-ah mai ni lo, thingpui ina min sawm pah a, heng thlingtlang a bikin, khawpui pawh in ni ve tho anga, zirtirtu transfer tur nei thin, buai em em thinten kuttha kan tih chak theih dan tur hi sawiho ta ila tih hi kan rawt duh a. Chu chu, vawiinah chuan MLA tin hi mawh min phurhtir vek mai a, kan biala posting & transfer thil a lo rik leh an beisei in, helai bawr hi kan sawi duh a. General discussion-ah hian uar takin ka sawi duh a, thingtlanga kan la tan thei lo anih pawhin khawpuiah hi chuan kan tan a hun ta, state capital leh district capital-ah hi chuan, Middle Section chin na na na hi chu Mission school a leh hi kan ngam a hunin ka hria.

Khawpui chhunga kan veng theuhah, helaia khua leh tui nihna nih duh kan nih pawhin, kan chenna veng theuhah i ti teh ang, chunga kan sawrkar sikul Middle Section hnuai lam hi in en teh ang u, kan zirtirtute leh naupang inzat nawkna hi a awm an ti, a hrechiang ten. Enge a chhan? Zirtirtute lah ni se an fate an sikulah, an tute an sikulah luhtir ai chuan mission school-ah luhtir an chak bawk si. Kan rama mission tinte hi, ti mai ang, church tinte pawh hi, ti zawngte hian sawi ta ila tha in ka hria a, zirna sikul chungchangah hianin Pathianin a ko vekin kei chu ka hre tlat, hlawhchham tak tak hi an awm lo reng reng. A vengah Department hotuten zir Chiang ta sela, he sikul hi miin la sela, an thawh chhung zawng leh an pension chhung chu sawrkar pawn hlawh lo pe ila. Chungah chuan English medium te pawn kaltir ila, helai lawkah sawrkar sikul tam tak hlawh an awm laiin, MA 1st class a pass te, BA chutiangina, private-ah leh mission sikula an thawhna, thlakhata 3000/4000 hlawhin tha em em in, kan hriat laia division awm pawh kan hriat loh, nichina ka sawi ang khan keini huna 1st division chunglam kan hriat ngai miah loh, O te an rawn tlar that that ta mai a nih hi. Chung avangin, helai chu ngaihtuahna, Pu Speaker, kan sen a hun tak takin ka hria a, vawiinah pawh a demand bikah hian, tah hian kan cheng leh duh a ni.

Tin, hemiah hian kan tih rualin a kohhran, tupawh khata changtu turte pawh khan thuneihna an neih tel chuan, a dik takin, tunhma kan rama zirna sikul tantirh ah Head Teacher,

zirtirtu, chu kohhran upa an nih loh pawn mite zah an ni. Vawiin a kan Education Minister leh a thawktu Officer-te, Directorate leh Secretariat lam pawh, an luhaina ber chu zirtirtu, tawng mawi lo ni suh se, chhuanawm vak lo, enge ni kan tih ang, tlai dar 3 hnu lama biak pawh nuam tawh vak lem lo ang chi te, sikul an lo thlen pawha an zirilaibu, nimina an zirtir pawh theihngihlh thinte hi an enkawl a ni si a, an khawngaihthlakawm a nia. Kha kha kohhran in kohhran an nihna atangin, an thuneihna in han enkawl ta se a tha ang kha ka ring tlat a, chu chu kan sawi leh tang tang a ni.

Tin, demand no. 40-na Industries-ah hian a Industries lawng lawng ai chuan a peng anga miin an ngaih hial tawh Geology & Mining ho thiamna hi kan pawchhuak tawh si a, engatinge kan hman zui loh ka ti a ni. Aizawl chhuahlamah leimin nasa tak kan tuar a ni, hetah hian Engineering Division dangten ngaihloh lamah lo ngai lo se ka duh a leh a enkawltu Minister-te pawhin, kan geologist-te sawrkarin an rawih atang chiah, an thiamna kan han hman atang hian chhuahlam leimin hi a ziaawm tih hi kan mitin a hmu a, kan hria a ni lawm ni. Engatinge Hunthar pengah te, Rangvamualah te hei chen kan buai tawh a, VIP lo kal dawn avangin, RBI Governor lo kal dawn avangin, chutiang khatianga motor intlan chhawk tur ti a news-ah leh thupuan kan lo ngaihthlak thin awm toh lo hian, anni chhawr ta ila, ka rindan chuan chhuahlama an thiamna bawh hi kan hmang ang a, hetiang hi kan tawh ka ring tawh lo. Chuvang chuan hengah te ang pawh hian kan hmang tangkai tawh lo a ni maw tih theih hi anni ah chuan han tarlan mai ka duh a.

Trade & Commerce sawi hlawh lo takah hian vawiina an hmalakna chi hrang hrang han hmuh hian a va lawmawm em. Amaherawhchu, Pu Speaker, hemi House-a Committee peng pakhat atanga Pu Nihar Kanti Chairman na hnuai (SPEAKER : Hun i hmang zo) Committee in, heng kan thlai thar sawthingte leh hmarcha Mizoram ngeih em em mai, heh tak si, kan khawthlang lam amite tlawhpah leh, nichina ka hmaa member zahawm tak Minister hlui ina a rawn sawi ang khan, chungah te enge tih ve theih kan neih ti a kal kan tum naah chuan Trade & Commerce Deptt. a hotute hi, anni a khawihthu berte an ni bawh a, he team-ah hian tel ve se la a tha ang a kan tih lai chuan chhanna kan hmuhah chuan, 'Zinna tur pawisa kan nei lo'. An thil mamawh zirchhuak tur pawha pawisa an neih loh chuan engtingge he Deptt. hi a tangkai theih ang. Anmahni pawha ni lo, Assembly Committee ruala kal tur pawha an harsatna tawhna tur chu sum an nei lo tih thu han ngaihthlakte hi tihtawp a va tha em. Minister-in special-in lo ngaihtuah sela a tha awm hle mai ka ti. Israel ram kal, Thailand lam kal a ni ve lo, Pu Nihar-a hova kal kan tumna chu, Bangladesh-ah ropui taka kan mipuite thar chhuah, engtingge man man zawka hralh a nih ang a kan ti thei ang tih thil ang kha a ni a, a ropui ka ti.

Pu Speaker, pakhat tawi tea ka sawi leh duh chu Demand No.23-na Art & Culture Department-ah khan, vawiinah News-ah te, Times Now-ah te NDTV-ah te an nungchang hi a ni chiah lo mai thei na a, mahse hemi department kaltlanga sawilan duh a awm a. Faknaah a lo lang thin a, cheraw kan lai niawm tak, khawchhak tribal hnam thenkhatten an tih hi a ni si a, kan cheraw hi a nilo ropui si a.

Chutih rual chuan hnam dang state 7/8-a hnam chi hrang hrang lam dan a rawn lanna, khalai kha Mizo Hnam Lam angin an rawn tarlang. Hei hi chu khawngaih takin kan Cheraw Lam dik tak a hi zu thlak dan zawn nise la. Anmahni chan a nih loh pawn Minister, a changtute hnenah min lo hrilh sela, hma lo la sela tih hi ka duh a, ka ngaimawh ngawih ngawih a. Fakna hmunah engemaw karlakah an rawn tilang ve chhen si a. Hei hi hmalakna atan pawimawh ka ti a.

Kan hnam incheina, kan hnam lam mai mai hi he department kaltlangin kan hnam lam mawi tak Cherawa World Record siam hi thudangah i dah ang. Chumi rual chuan kan hnam incheina, a bikin kan nula kan hmeichhiate incheina tatu nihna nena khawvela kan inpho chhuak hi ropui ka ti. Mahse ziakin heng kan hnam hmeichhiate incheina hi tatu kan neihna, Patten kan nih hi hi a hun ta tlat hetah hian. Pu Speaker, helai bawrah hian anni hi hma la tur an ni em ka hre chiah lo. A nih loh pawhin hma latu turte hnenah House-a member-ten kan ngaihawhna kaltlang hian lo hriattir ta se.

Tunhnai lawka kan hriat chu India hmarchhaka nula pakhatin tuipui ralah Mizo hnam incheinain sum tam tak a lalut a ni tih hi, keimah ngei pawhin ka mita ka hmuh chu Pu Speaker, Arunachal, Itanagar khawpuiah meeting pawimawh tak mai kan nei a, kan meeting chawlh laklawhah, an emporium-ah thil in lei duh lawm ni, kan kalpui ang che an ti a, kan va kal a. Chuta ka hmuhah chuan – puanchei, kawrchei, vakiria nen lam hian duh tawk lei tur hi an lo nei nia mawle. Kolkata-ah, Delhi-ah kan emporium-ah lei tur engatinge a awm theih loh. Hengte pawh hi Industry Department-te nen tang tlangin vawiin niah hian ti sela. Kut ni vang thla a lo thlenin thalai rualin vawiinah inchei nan an hmang ta. Kan hnam incheina hi an zahpui lo.

Naktuk mai atang hian Bairabiah Mizo Thalaite inkhawmpui lian a awm dawn. Chutah pawh a hotutena an thuchhuahah chuan, ‘Rorelnaa palai zawng zawng chuan Mizo hnam incheiin inchei ang aw’ tih te hi member kal turte hnena an thu thlen a ni.

Pu Speaker, sentence hnih/khat chauh a ni tawh ang, chutiang a nih avang chuan heng ang thil zawng zawngah hian lawmthu ka sawi duh rualin tunhmaa lo awm thin High School leh Higher Secondary School, i bial naupangte pawh telin, Mizoram tangka helai Speaker kaihhruaina hnuaia ‘remti’ kan tih tel miah lova High School leh Higher Secondary School naupang chuangten Kolkata-a tlawh theihna chance an neih ang kha haichhuah leh hram hram nise, a lawmawm ngawtin ka ring a. A titude kha a la ngai reng in nia, tho anna, Kolkata amite kha.

Tin, chutiangin Library-te pawh RRR LS atanga Library tam tak lo sak tawhte kha vawiin niah hian YMA branch, Library la neilote hian an va nghakhlel ve em. Khangte kha chhunzawm leh ni thei sela a lawmawm ngawtin ka ring. Heritage Village ruahmanna awm te, Peace Memorial Park ruahmanna awm te, thil dang dang ang chite pawh kha bawhzuia kan ram kan hnam midangte laka kan huaisenna, Pasaltha Khuangchera te leh Mizo Lal 56, (a number ka sawisual mai thei a) chumite inthlung khawmina Vailian lo do tura Changsil kaia an lo dona

hmunte hi Tourism-in vawiinah min humhalh sak a ni thei e. A aia chianguang zawkin kan Art & Culture Department atang hian Ministerial culture hnuaiah khuan a awm ni hian ka hria a. Hengte hi chhunzawm ni thei sela tih hi thahnemngai takin ka'n sawi a.

Chutih rual chuan kan Minister zahawm tak takte pahnih an Demand rawn tih te hi pawisa duh khawp chu nilo mahse, lawm taka pass pui turin ka rawn support a ni e.

*Speech not corrected

SPEAKER : Pu T.T. Zothansanga.

Pu T.T.ZOTHANSANGA : Pu Speaker, ka lawm e. Demand kan sawi hian mahni bial chhungah tam tak hi kan lut a. A then hian in lo hrethiam lo deuh hlek niin ka hria a. Amaherawhchu, ka ngaihdan chuan MLA 40-in mahni bial chiang taka kan sawi vek hi chuan kan ram hi kan sawi a ni mai lo maw, tih ngaihtuahna ka nei a. Chuvangin ka bialah hian tlemin ka lo lut na deuh hlek a nih pawhin min hriatthiam ka duh a.

Demand 6-na Land Revenue & Settlement chungchangah khan han sawi duh ka neih chu Champhai constituency-ah House site Advisory Board angin district pumpuiaah tunah hian kal turin kan in ruahman mek a ni. Amaherawhchu, kan tum angin kan chak hlei thei lova, a chhan chu staff kan mamawh ang kan nei lova. Tunah khian surveyor 4 nei tur kan ni a, 3 kan nei a, 1 Aizawlin an la rawn release si lova, tichuan a rawn kal hunah chuan 4 kan ni dawn a. Chu chu Champhai constituency 5 zet awmna a lo ni bawk si a, 2 vel min rawn dah sak thei se chuan mumal takin hna kan thawk thei turah kan inngai a. Tunah SAB bakah hian hna dang tam tak hi a lo awm ve tho mai si a. Khalai kha Revenue-a chak deuha hma kan lakna lai karah kan mamawh zual tak meuh a ni tih kha kan Minister zahawm takin min lo hriat sak ka duh a.

Tin, Revenue chang tur hian kan MCS hotute hi an tha viau tak na a, a thar lutuk hi chu min pe lo thei se ka duh. Entirnan – MCS-a han inziak tlinga an tih zawh veleh an first posting hi chu thaa ka rindan mai maiah chuan D.C Office velah hian training a thain ka ring a, an outlook pawh a tizauin ka hria a. Independent post-a va dah nghal nawlh ang chi te hi nilo thei se ka duh khawp mai a. Kha kha min lo hriat sak se ka duh a. Champhaiah phei chuan mipa hi ni thei se ka duh lehzuat a ni. A hmun khi kar a hla si a, ke a vei vei vah te hi a ngai a, kal a ngai tam si a. Hmeichhia thar tak mai min han pe te hi chu chhiat kan tawk hi a ni ringawt mai a ni. Chuvang chuan min lo hriat sak thei hram se ka duh a.

Tin, Pu Speaker, pahnih naah chuan Demand 21-na, Higher & Technical Education chungchangah khan Champhaiah khian vanneihthlak deuh maiin kan Chief Minister-in min duhsakna azarah 2010 khuan NLCPR atangin College sakna 9.51 crore kan hmu a ni. Tunah khian a building khi kan sa tha tawh khawp mai a, kan zo mek a ni mai a. Tunah khian 3rd Installment kan la dawng lova, 57 lakhs a ni awm e. Chu chu Planning atangin a chhuak tawh an ti si a, PWD

atangin kan la dawng lo an ti si a. Khalai te kha kan hotute khan min lo ensak ta sela. Tin, a pawimawh ber mai chu tunah khian In tha tak neia riltam ang vel kan ni. A building khi kan nei tha tawh khawp mai a, amaherawhchu, a chhunga a zirtur zirlai ho khi zirtirtu tur kan indaih loh avang khian harsatna kan tawk a ni.

Entirnan – Economics angah te chuan kan zirtirtu Pu Thianga te, Pu Kaia te an han pension a, tin, Bs-i police lamah a'n kal leh ta bawk a. Tunah khian kan neih dan chuan a nghet lo 2 chiah khi kan nei a ni. Chuvang chuan Economics Department-a kan tlakchham leh kan mamawh em em mai khi min phuhruk theih hun khi dingdihlipin tunah hian kan thlir a ni tih kha ka'n sawi duh a. Tin, chubakah Pu Speaker, English Department-ah khian zirtirtu 4 kan awm a, UGC norms ah chuan nia adik e 4 a ni tur a ni a, a nghet 1 leh a nghet lo 3 kan nei a ni. Amaherawhchu, anmahni ina an hnathawk tur ruahmanna piah lamah khian BCA leh BSc te khi an la tel vek mai si a, chuvangchuan an phur khi a rit extra khawp mai si a. Chuvang chuanin pakhat tal te khi chu min han pekbelh leh nghal se chuan BSC leh BCA tena an lo mamawh zel lai karah khian an hah lutuk lai te khi min rawn chhawk thei dan kha awm ta sela tih kha duhthawh takin kan Minister hriatah kan sawi ni sela.

Tin, kan history subject te pawh, history a kan hotupa pakhat Principal ah an chhoh tak bawk siah khian kan indaih lo hle bawk a. A nawlpui a han sawi chuan College building tha tak kan nei a, a chhungah hian meialh khi kan en lo chauh a ni. Chuvangin zirtirtu min pe thei hram hram turin ka rawn sawi a ni a.

Tin, nichin khan kan hotute khan an rawn sawi tawh a, Mizoramah kumtin B.A. kan chhuak a, MA zawmna a awm bawk si lova, tih lai takte kha ka rilruah keipawh kha kha a lian khawp mai a. Hei tunhmain NEHU-in Shilong-ah hmunpui an nei thin a, NEHU, Shillong atangin Mizoramah Psychology Department leh Forestry kha an rawn dah thin a ni. Tin, Nagaland, Medziphema lamah Agriculture College te an rawn dah a, tin, Geology & Mining te kha Nagaland ah an dah a ni. Khatiang ang khanin keimahni sorkar ina a tum leh ruahmanna ina a tum leh puitlin ngawt thei lo, theih ni lo mah sela, hei Lungleiah te, Champhaiah te leh hmundangah te pawh hian University-in Department hran a hawn ve theih hun te hi kan nghakhlel em em a ni tih kha ka'n sawi duh a.

Ka sawi fo thin angin kei hi 'Aizawlah engkim hi dah intum en ni' ti thin hi ka ni a. Hmun hrangah Thenzawlah College of Agriculture a awm hunah phei chuan Thenzawlah te pawh kan dah ang, Champhaiah te pawh kan dah ang, Kolasib ah te pawh kan dah ang chu. Tlema kan khawpui hi kan pawhdarh deuhhlel loh chuan thil thar lo awm turah hianin ngaihtuahna nasa tak kan sen a ngaiin ka hria a, kha kha ka'n sawi nisela.

Tin, Demand 23 na – Art & Culture Department-ah khanin, hei Mizorama Museum hmasaber Champhai Government G.M. High School ah khian kan nei a ni. Khi khi

kan Minister te hian an hria angem aw ka hre lo a, kan term hmasa atang khan kan Minister tumah hian an la sawi rik ka hre lova. Khi khi Pu Thanseia Headmaster anih hun lai atanga Mizorama Museum hmasaber kha ani a. Raja Ram Mohan Roy Foundation hnuaiiah khan kan sa tawh a. Tunah khianin enkawl angai khawp mai a, tin, Pu Speaker, G.M. High School phei khi chu i kalna kha a ni lehngalin ka hria a. Ngaih pawimawh hi chu a ngai a ni ti raw? Art & Culture hian Look East khawchhak lam hi kan en a ngai hrim hrim a. Khilai khi culture prone area khi kan ni ve a. Chuvangin min han ngaihsak em em lai karah khanin min ngaihsakna piah lamah kan ngai pawimawh lehzuai ani tih kha ka'n sawi duh a.

Tin, Art & Culture hnuaiiah hianin tunhma khan cultural dress te kha subsidy khan kan la thin a, Mizo tah hrang hrang ang te kha, khatiang te kha la tih theih dan a awm mial em tih kha nakinah min wind up hunah khan kan pu ber khan rawn sawi tel sela ka'n duh a.

Tin, Raja Ram Mohan Roy Foundation hnuaiiah khan library te kha sak theih a la ni reng em? Ni ta sela enge ni? A inchhawk theih dan te kha a awm em? Term hmasa khan ka bial chhungah khan kan sa mang tlat lo mai a. Kan tawp ta mai em ni ? tih te kha ka rilruah a rawn awm a, kha kha khawngaihin nakinah min rawn chhang sela. Ka duh khawp mai.

Tin, Pu Speaker, School Education Department, Demand No. 20 na chungchangah khanin, nichinah khanin ka sawi tur tha Pu Vena khan a rawn sawi tawh a. Zirtirtute kan hmang phar nasa lutuk a hi ka ngaimawh khawp mai a ni. Roll buaipuia, census-ah, election-ah engkim maiah khian kan hmang khi a ni ta mai a. An zirtirna lam duh anga in concentrate thei lek lo khian kan pawt phar a ni a.

Hei hi a kawng dang kan zawn hi a hun ta mang e aw, ka ti a. Naupang tan a tha lo, zirna chhe khawpa hetia kan pawt phar hi a thalo ka ti a, dik tak chuanin kan ram awm dan zel tura hi kan zirlaite kutah a inngat e kan ti a, kan zirlaite hian a tak takah chuan an class chhungah hian Mizoram awmdan tur hi an duang a ni. He an duanna kawngah zirtirtu te ber khatiang thildanga an pen an pen si kha chuanin kan zirna hi a thuanawp lo thei lo a. Chuvang chuan hetiang sorkar zirtirtu kan hman nasat lutuk vang te hi a niang ka ring a, private school an that tak zawk zel hi. Private School zirtirtute kan hmang ve lova, an ni chuan a full swing-in an zirtirnaah an in concentrate a, chu chu kan tluk loh tanna kha a ni mai em aw tih ka ngaihtuah a ni.

Tin, tuna kan Education Department- ina an hmalakna tha deuh mai ka tih chu, 'zirnaah a bulthum atang hian English hian bul kan tan a ngai a ni e', an han ti a. Tunah hianin K.G. 1 atangin english medium-in bul tanin zirlai 3000 vel zet hi an han nei thar ta a ni tih ka hriat hian lawmawm ka ti khawp mai a. Hetia K.G. 1 kuminah 3000 vel an han neih chuan, nakumah K.G. II class 1, class 2 an han chho zel a nih chuan ka hmaa kan Member zahawm tak Pu P.C. Zoram Sangliana'n a rawn sawi ang khan heta middle level hnuaiiah hian

tawng mihringina kan man chak vang lai tak hi a lo ni baw si a. Helai hun teah hianin kan tan a ngai a, chuvangin hei hi kan ngaih pawimawh hi a thain ka hria a.

A tawp berah chuan Pu Speaker, pakhat chiah Trade & Commerce chungchangah khanin Hnahlan leh Zote Far tlang kai bulah khianin Trade & Commerce khan multi-shed kha min sak sak an tum a, kha policy kha dealing zingah khan a lo tel ve mial em tih kha nakinah kan Minister khan min hrilhfiah thei se ka'n duh a. Chubakah Melbukah khan quarter engemaw zat kan sa tawh a, khi khi luah theih hlan kan nghak hlel khawp mai a. Khimi chungchangte pawh khi nakinah wind up naah minrawn hrilhfiah sela a tha awme. Vawiinnia kan Minister zahawm tak tena anrawn demand a hi lawmtakin karawn thlawp a ni e, ka lawm e.

SPEAKER : Pu Joseph Lalhimpuia.

Pu JOSEPH LALHIMPUIA : Pu Speaker, ka lawm e, reilote (SPEAKER : I chan a ni a) ka puihna hi ka sawi dawn lova, Pu Speaker, hmanni deuh lawk khan Lungleiah Pachhunga University College leh Lunglei Government College leh J.Buana Government College te tang tlangin Serkawn Concert zir chianna an nei a, chutah chuan Pachhunga University College atanga an thusawi ka ngaihtuahnaah a awm reng a, chu chu pakhatnaah ka tar lang duh a. Mizo tawnga master degree kan zir theihna tur atana kan Chief Minister zahawm takina hma a lak nasat zia, amah avanga Mizo subject master degree zir thei kan nih zia NEHU hnuuia kan awm laia NEHU ina pawisa min pek theih loh harsatna tam tak kan neih, kan Chief Minister zahawm tak, vawiina kan House Leader ni baw ina a lo tanpui a, chumi atanga Mizo tawng Master degree zir thei kan nihzia an sawi a, lawmthu te an sawi a, tunah hian Higher & Technical leh Art & Culture budget kan sawi lai hian chulai chu tawite rawn sawi ka duh a. Mizoram record a chuang reng tawh tur a ni.

Hmanni lawkah Pune leh Delhi ah ka zuk kal a, zirlai ho nen hun kan hmang a. National leh International programme ah Mizo hnam lam entir tura sawm an nih thin thu leh chuta harsatna kan neih te min hrilh a, culture dress min dil a, kan lo ngaihtuah dawn nia kan ti a. Art & Culture Department-ah subsidy kha an la nei thei em? ka ti a. Kan hmang zo vek tawh an ti a. Term hmasaah khan MLA te ngaihpawimawh hi kan inzawt thinin ka hria a. Engpawh nisela Delhi leh Pune kha chu 'ka pe ang che u' ka tih avangin ka pe tawh a, an lawm viau nghe nghe a. An hmang tangkai turah ka ngai a. Khatiang thil te kha a la awm thei a nih chuan kan Minister-in MLA te min ngai pawimawh thei anih chuan a lawmawm viauin ka ring a, ka'n han tarlang duh a.

Tin, Revenue chungchangah hei, hmanni lawkah Tlabung ICP tur kha Minister of State for Home in a rawn tlawh a, centre leh state sorkar hmachhawp te a tahtawlin siam fel a ni a, proposed ICP area kha siamthat /redemarcation a ngai a, district level atang chuan an tehfel tawhin ka hria a. Hei hi sorkar ang pawha kan nghahhlel tak project lianpui tur a ni a, ramdang nena kan indawr tawna tur a nih avangin kan Revenue Minister hian a hma thei ang berin hei

hi chu min tihfel sak sela, chhim bial tan pawh a lawmawm lehzualin ka ring a, chulai chu ka han sawi duh a.

A tawp berah chuan College zirna kan indaih lo tih kan sawi thin a, Pu Speaker, Higher & Technical Minister in Lunglei ah College hawn phalna permit te min pe a hmanni lawkah khan min rawn rawn ve a, an rintlak ang ngem a ti a. Kan han zawt Chiang a, ka bial mite an lo ni hlah va. Lunglei-ah pawh khatiang private College han hawn belh tur te permission min pe hi a lawmawm ka ti khawp mai a, lawmthu ka sawi a ni. Chutih lai chuan term hmasa atanga hmalak chhohna Lunglei a Mizoram University a subject thenkhat zir theihna tur hmalakna hi tun ai hian chak thei deuh se ka duh khawp mai a. Term hmasa ah khan hemi chungchang bawhzui hian Delhi lamah ka zuk kal a kan hotuten min tir a Chief Minister Office atangin an lo biak vang anih ka ring a, UGC chairman kha kan RC-in appointment an lo dil a, hemi chungchang sawipui tur hian keiman Pu Joseph ka rawn hmu ang a ti a, Mizoram House ah min rawn hmu a. Chutatang chuan Mizoram University leh State sorkar nen an indawr tawn dante min hrilh ve ta fo a, hei 12th Plan chu a zo dawn a hei hi na deuh hleka kan umzui loh chuan UGC an in hawng chhung hian kan nei hman lovang tih ka hlau khawp mai a ni.

Ka hmaa mite sawi ang khan Mizoram University ah seat kan indaih lo hle a, Pachhunga University College-ah department tlem zirna a awm a chu pawh chu kan indaih lo hle a, Lunglei ah hian hemi kawnga hma lo lak tawhna hi chak thei ang in a Department ang hian hma min lak sak sela, a tul a nih chuan UGC ah Mizoram University te nen a sawi ho leh Delhi a kal ho te thlengin a ngai a nih pawhin lo tang na deuh sela kan Minister te hi chuan tun term chung ngei hian Lunglei ah sawn master degree zir theihna hi min hawn sak thei sela, ka duh khawp mai a, theihtawp chhuah turin ka ngen a ni. Tichuan kan Demand te kha ka rawn support e, ka lawm e.

SPEAKER : Pu Nihar Kanti Chakma i lo sawm ang.

Pu NIHAR KANTI CHAKMA : Pu Speaker, ka lawm e. Vawiinah kan senior pahnih Demand kan sawiho meka a a lawmawm ka ti khawp mai a. A bikin Education changtu leh Parliamentary changtute an fakawm ka ti a, an hmalaknaah. Amaherawhchu, ka bialah hian harsatna neuh neuh kan nei nual a. Pu Speaker Mizoram ah bial 40 lai mai kan nei ve a, Education a problem tam berna chu ka bial a ni a. Zawhna leh chhannaah Minister-in min hrilhfiah tho mai a, ka biala zirlaite mamawh vangin tunah pawh ka sawi lo thei lo a ni. Examination centre chungchangah a ni a, kan hriat tho angin 2014 ah HSLC candidate chu 225 lai maiin an exam ve a, 2015 ah 215 laiin an exam bawka, ka hriat sual loh chuan kumin ah phei chuan chu mi aiin an tam dawn a ni a. Chuvangin centre pakhat chiah kan nei a, hetiang zat exam theihna chu a accommodate theih loh hrim hrim a ni. Engpawhnise, Minister a awm bawka, official te pawh an awm bawka, zirlaite

dinhmun te Mizorama Education-in hma a sawn theihna turin exam center min dah belh sak theih chuan ka lawm khawp ang.

Pu Speaker, ka bial hi education-ah chuan a hnufum ber a, helai hi tawi te kan chhiar ang e, “Medium of instruction - the Commission recommend the elementary education should be imparted in the child mother tongue. And this should be permitted to be used as medium in instruction from class 6 onwards. In the school that have educate number of teacher particular teaching in English” a lawmawm ka ti khawp mai heti hian a inziak a “ In school where there is concentration of minority community children, mother tongue of the child should be used for instruction from class 1,” Pu Speaker, kan bial hi ngaihtuah ila mother tongue of the child in kan zir thei miah lo a ni. Chakma tawng in zir thei ila kan duh khawp mai. Chubakah Mizo te pawh zir kan duh a, mahse engtinge kan zir ang? I phalna in example kan pek duh chu Primary level-ah hian zirtirtu an indaih lo nasa khawp mai a

SPEAKER : Chawlh rih a, a that leh hun a tih kha kan ti em? (Member : Chawl mai ang) a nih aw. Kan chawl rih ang a mike a that veleh dar kan vaw leh ang a.

3:20 PM

SPEAKER : Engpawhnise, wawiina kan tih tur hi zawh ngei ngei a ngai a, member zahawm tak te khan lo hrethiam ula. Kan mike lah hi a dik lohna lai tun thlengin an la hmuchhuak thei lo va. A dik lohna hmuhchhuah loh kha chuan siam vak ngaihna kha a awm rih lo va. Mahse, an la bei chho zel a. Nichin khan Pu Nihar Kanti khan a sawi zo lo va. Sawi zawh hram i duh em ? Ti khan i duh tawk thei mai em?

Pu NIHAR KANTI CHAKMA : Pu Speaker, tawite sawi lawk ka duh a. A laklawh a a paw ka ti khawp mai. Ka sawiduh chu ka bial chungah Primary level-ah harsatna hrang hrang kan nei a. Entirnan sawi ila – Aizawl atangte, Lunglei atangte in zirtirtu engemaw zat hi primary level-ah an transfer a. Problem pakhat an neih chu zirtirtute chuan Chakma tawng an thiam miah lo va, an naupang ten Mizo tawng an thiam vak lo baw a. Chuvangin, zirna tak tak hi a kalpui theih lova. Hei hi problem lian tak a ni a. Chuvangin zirtirtu pawh la ni ilangin keimahni bial mi, local mi ngei hi lak theih se. Chutiang anih chuan education pawh hian hma a sawn theih ka ring.

Helai education report-a Model School chungchang tawi te kan sawi lawk duh chu, hei Model School hi Government of India norms in an pe thin a. Educationally backward block hi Lungsen Block-ah Mizoram hian kan nei thei a. Hei hi tunah a building sak zawh tawh a ni a. Ka bial pumpui pawh Lungsen RD Block hnuaiah an awm ve a. Model School sawi ta ila, Model chiah pawh a ni lo hei Kastaloka Vidyalaya sorkar hmasa hmasa leh khan an din a, a lawmawm rualin SVP (Sardar Valabhai Patel) school hmunah din a ni a. A buaithlak khawp mai a, a ram chu Middle East School ram a ni a. Mahse anmahni ramah hian Kastaloka Balika Vidyalaya an din ve a, an

buai reng a. Chuvangin, khumi Kastaloka Balika Vidyalaya hmun atang hian sawn theih se a tha ang a tih hi ka ngaihtuahnaah a awm a.

Pu Speaker, Demand No.23 – Art & Culture tawi te sawi ka duh a. Hei term hmasaah a lawmawm ka ti khawp mai a, Karna Puli Festival hi Minister hmasa khan a buatsaih a. Tlabung pheih chu hnam hrang hrang awmna hmun a ni a. Chuvangin, festival buatsaih chu kan duh khawp mai a, National Integration atan pawh a tha hle ani tih ka rilruah a awm a ni.

Land Revenue chungchang tawi te sawi lawk ka duh chu – entirnan kan hre vek a, ka bial chhungah hian Indo-Bangladesh border fencing hi tunah an hung mek a, 80% lai an zo tawh a. Helai hi ka sawiduh chu, tam tak hi ka bial chhungah khaw tam tak hi fencing pawnah hian a awm dawn a, tuna a lan danah chuan. Chuvangin, fencing pawn a khaw awm zawng zawng hi fencing huamchhungah sawnluh ni theih se. Revenue Minister zahawm tak hian ram hi min buaipui sak se kan duh khawp mai a ni. Chu zawng chu ka sawi theih ni se, ka lawm e.

SPEAKER : Awle, Pu Pianmawia.

Pu R.L.PIANMAWIA : Pu Speaker, tawite chauh ka sawi duh a. department hrang hrang an sawi tawh kha chu ka sawi zui vak lovang a. Higher & Technical Education-ah hian an hmalakna nasa tak a awm karah khan thil pakhat chiaah ka sawiduh a. Hindi Training College hi an harsatna a hmunah ka han en ve tawh a PWD ho te pawh hruaiin. An mamawh leh harsatna tipuitling tura tan lak theih dan hram awm se ka duh a.

Tin, Art & Culture-ah hian YMA Library sak tur hma nasa taka lak tawh hnuah hian, a zar kan la zo mumal lo khawp mai a. Hei hi theih dan kawng a awm anih chuan min hriatsak turin kan Minister ka chah duh a.

Tin, Education-ah tuna a lan dan chuan zirtirtu a harsatna hi khawvel tawp hma chu thingtlang chuan kan tawng tawh dawn niin a lang a. A lak dan te kan ti danglam anih loh chuan. A chhan chu MPSC in a lak a, a thiam thiam an tih chhung hian chuan thingtlang tan chuan sorkar hi a hla tial tial dawn a ni. Chumi tihrehna tur chuan kan sorkar hian ngaihtuahna a hman a tul tawhin ka hria a. Thingtlang harsa zual bikna atan hian reservation tih dan te hi a ngaihtuah theih a ngem? Anih loh pawhin a sub-division wise a mamawhna a kha a sub-division wise tan chauh a dil theih tih ang chi emaw a tih dan kawngte dap dan a awm a ngem ? Chutiang a nih loh chuan a thiam thiam zawng a kan kal dawn a nih chuan thingtlang education chu kan tichhe vek dawn a ni tih ka sawilang duh a. Chuvang chuan, beiseina, thingtlang bialtute tan chuan tun ang ringawt hi chuan a bo a ni. Amaherawhchu, tun dinhmunah kan hotute hmalakna zarah zirtirtu lak tlem tlemah te min han dah sak zeuh zeuh a. Tunah pawh mamawh zual eng emaw zat ka thlen tawh a. Kan Minister hian tun tuma lak thar turah min lo ngaih pawimawh sak leh hram se la tih ka'n sawiduh a.

Tin, keini bial khi Hmarthimpui tih a ni a, zirna kawngah leh thil hrang hrangah pawh kan hnufum hle a ni tih in hriain ka ring a. Tuna kan officer/official hote pawh hi Zokhawthiang te, Mauchar te, Sunhluchhip te la hmu lo an tam ka ring khawp mai a. Chuvang chuan, a ngaihtuah tur ber sorkar mite pawhin a hmun an tlawh loh chuan a changkang lovang tih a Chiang in ka hria a. Chuvang chuan, Mauchar te pawh khi high school an neih ve theihna tur sorkar hian thapuih min neihsak se la. An kalna hnai ber Zohmun khi a hla lutuk a, a namailo khawp mai a. Chuvang chuan, khing atan te pawh khian ngaihtuahna a bik tak pawh in min lo sen sak se tih ka duh a. Tin, hmundangah thil ropui tak tak leh hmasawna lang tham tak tak, chhuan tur leh sawi tur tam tak a awmlaiin, headmaster la nei lo te dah kim tur kan la nei a. Tin, High School kan neih ve Zohmun leh Ratu te exam centre-ah kan dah ve bawk si a, LDC neih loh chuan exam centre han lek kawh harsatna chin a awm ngei ang tih in hrethiamin ka ring a. Chuvangin, a pawimawh zual bikna angah te hi chuan hna lak theih tawh loh tih pawh hi a lak theih dan ngaihtuah a tulin ka hria a.

Tin, zirtirtu indaihlohna zualpui phu hrukna tur pawh hian tun hma khan aiawh lak phalna te a awm thin a. Hmeichhia zirtirtu te an tam tawh em em a, nau neih chawlh danin a lo phal rei ropui si a, aiawh lak phal si loh chuan a awmna sikul te khan a tuar tawp mai si a. Education Department tan hlawh tur daih pawh budget-ah sum a awm tak tak chuang lova. Mahse, hei leh chen hi hlawh pein kan kal chho tawh a. Chuvangchuan, aikal te pawh hi lak tawp tawp mai a, hlawh tur a daihlo a nih pawhin Finance khan tun thleng pawh hian an la pe tho va, tlachhamin an la awm chuang lova. Chuvangchuan, huaisen deuhva kal ngaihnaah pawh khan kal deuh hrawk a tha mai lawm ni?

Tin, Industries Department-ah ka bial Sawlengah leh a chhehelte pawhin an hlawkpui theih turin Handloom training te min buatsaih sak a, mi 70 lai mai khilalah zirtir turin ruahmanna minrawn siam sak a, a lawmawm hle a. Hetiang anga bul min han tan sak a hmasawn zel tura min han puahchahnaah hian lawmthu ka sawi a ni. Tin, kan Minister te demand-ah hian ka thlawp a. Ka lawm e.

SPEAKER : Pu J.H.Rothuama khan nichin khan a phar ve em? E... a nih Pu Sangkunga.

Pu T. SANGKUNGA : Pu Speaker, ka lawm e. Vawiinah kan Minister pawimawh tak takte demand sawina hun kan han nei hi a lawmawm ka ti a. India ram pum pui pawh hi film star-ah pawh a da lam, a qualification Chiang kuanglo pawhin University leh UGC thlengin India ram hi a enkawl kawlw thei a, Mizoram chuan Education Department hi pahnihah kan then tlat a. Chuvangin, sawi kawp loh theih loh a nih thin avangin Demand 20-na leh 21-na, School Education leh Higher & Technical Education Department hi an han sawi kawp ka duh a. A bik takin School Education-ah han sawi

hmasa ila. Anni hi Minister leh Parliamentary Secretary active tak mai helama experience nei ve ve, mithiam kan neih ten an enkawl bawk a, an hneh hlein ka hria a, thil thar tam tak an tichhuakin ka hria a.

Pakhatnaah chuan thingtlanga high school headmaster kan neih hleih theih lohna tam takah headmaster min pe a, panel atangin a zawm duhlo ai pawh kha min rawn pe leh mek dawn ni tein ka lo hria a, lawmawm ka ti tak tak a.

Tin, subject-wise teacher hi kan mamawh ngawih ngawih a, graduate pangngai lak an nihin science teacher leh mathematics teacher awmlahnaah tihngaihna a awm der lova. A bik takin thingtlang high school chhiatna a ni a. Tuna subject-wise-a a teacher lak dan a lo chhuak leh a an han fill-up tur hi lawmawm ka ti tak zet a. Chutih ruala ka sawi duh chu an mawh ni lemlo, headmaster te quarter awmlo avang hian headmaster tam tak mi in hnuai luah tur leh mi in nam puk rawn luah tur khan an hna an zawm hreh phah niin a lang a. Chuvangin, Gazetted Officer, an khuaa hlawh tam ber ni mai tur mi in hnuai han luh phei ringawt kha sikul naupangte pawhin an zah loh phah ang tih a hlauhawm a. Chuvangin, hei hi tih theih a nih ka ring khawp mai a, he lai hi uluk deuh hleka enpui ni ta se la. Entirnan, ka veilama thu ka pu nen kan thawh dun lai hian Vety hospital leh dispensary zawng zawng sak thar nan project kan siam a, 100% grant-in an rawn sanction vek a ni. A hnuah, 'RH Centre 100 chuang fe awm sak that nan project rawn siam rawh u an ti mai a. Chuvangin, nawr dan a zirin heng hi an dinhmun, Zoram in kan harsat phah zia te Chiang taka zu sawi hian engtin tin emaw, a sak theih ka ring. India ram sum leh dinhmun hi a tha em em a ni. Chuvangin, quarter sak hi rawn nawr sela zirtirtu tan te pawh a tha khawpin ka ring a.

A dawt lehah chuan Higher & Technical Education, School Education chan bawk a la ni a, kan sawi pawlh palh pawhin min ngaithiam se la. Hei Higher Secondary School hi kan neih ve hlawm a ngai a, oclege nen a inzawm loh hi chuan thingtlanga a awm a ngai ve tlat a ni. Hmun tam takah, HSSLC hi an hawng a. Ka bialah pawh khian Farkawn-ah leh Khawbung-ah a awm a. Khatiang kha constituency tinah college-a PUC kan tih ang chi a awmlah chinah hi chuan thingtlangah high school ang deuha an hawn a ngai a, a buaithlak em em mai a. Ni 100 inhlawhna atang ten zirtirtu hlawh a building nen an tuak a. Tunah ni 100 inhlawhna kha a tlahniam nasa bawk si a, ni 40 awrhah te a han tla tla a, an mangang tak zetin ka hria a. Hei pawh hi sorkar-in a bik taka min ngaihtuah sak a tulin ka hria a.

Tin, an pahnih atanah hian Human Resource anih ang hianin Human Resources-ah hian kan kal nat loh chuan engtikah mah keini industrial state nilo tur hi chuan agriculture ti dawn ila, lei leh tur phaizawl a tlem bawk si a, chuvangin, Human Resources lamah hian kan kal nat a thain ka ring a. Youth Commission te pawhin kan han

ngaihtuah a, naktukah pawh hianin navy an la dawn a, chawlhni khan a latu tur an lo thleng der tawh a. Hengah hian kan thalai tam tak te navy zawm turin interview se, Youth Commission-in scrolling-ah han tlan tir nghal ringawt rawh u ka ti, document mamawhte tarlangin tunah khuan a tlan mek ka ring. Kan thalai tam takin navy lak tur hi hria se kan ti a ni mai a.

Police-ah te pawh, Delhi Police tur te, CRPF te Region Northeast a sang tel CRPF an han tih te pawhin advertisement kha Sainik through-in emaw Employment through-in emaw an ti lo va, an tih dan channel hi a lo ho lutuk a, an agent dawrkai te kha an ring mai mai a, annin an publicise tha si lova. Kuminah pawh khan an lak tur kan hriat chuan a last date deuh thaw tawh si a. Khatiang khan tidarhtu kan awm lova, kan Youth Commission Member, Sainik Director ni bawk Pu Tluanga, 'A tih dan tur lo zawng teh, an tih leh hunah kan thalai za tel luhna tur ngaihtuah a ngai a lawm', ka ti a. Chuvangin, Education atang te pawh hian human resource lama kan kal nat loh chuan a tha lo ang.

Manipuri hi hmun tinah an awm ringawt mai a ni. Ministry-ah kal ula an awm vek ang a, Rajya Sabha-ah pawh an Secretary-General ni mai tur khu Manipur mi a ni a. Ministry tinah an awm a, India ram hotel thaah zuk kal ila an lo awm deuh zel a. September 11-a America a chhiatna rapthlakah pawh khan Meitei pakhat a thi hman ve tho. Kashmir-ah indona a awm pawhin an sipai officer a lo thi. Chuvangin, thih hi a tha ka tihna nilovin, hmun tina awm hi keini ang state pachhe tan chuan ngaiin ka hria a. Chuvangin, human resources lama kan kal nat a tha a.

Tin, kan Member zahawm tak Pu Piana te rawn sawi ang khan MPSC a hna lak hi a tha ka advocate-na a rei tawh lutuk, a fair bawk. Amaherawhchu, zirtirtu hi mahni khuaa mi la turin one time relaxation emaw a thingtlang keini ang bial ho hi min tih sak loh chuan kan buai a nih hi mi state-ah te pawh one time relaxation tih hi a awm fo mai a. Hmanah khanin District wise-in hna hi lak ni rawh se an ti a. Ka hriat reng chu Taxation Department-a UDC lak turah kan nau Saihaah a awm ve hlah mai a, a dil a. Aizawl miin dil se U.D. direct kha a hmu dawnlo reng reng a. Saiha District chauh an tih avang khan a hmu ve vang mai a, kan lawm em em a ni.

Aizawl mi nena in compete tur chuan a ngaihna a awm lo. Transfer dil an tum hauhlo. Amaherawhchu, Aizawlah hian tam se ka tih thung chu college hi a ni. Thingtlang mi pawl 12 an pass hian Aizawl-ah college an rawn kal a, tha bik em em a. Keini hi Champhaiah PUC kan kal chhung zawng khan text book hi college-ah a awm tih kan hrelo reng reng. Chutiang khawp chuan thingtlangah chuan kan bo. Mamitah leh Zawlnuama college an hawn tirh khan ka zuk kal a, naupang admit tur an zawng chawp tak tak a ni. Ka zuk hmuhsitna ni lovin. Aizawlah hian naktukah college thar din ta se a tha leh ringawt ang. A chhan chu teacher tha tur an nei a, engkim facility a awm a. Higher & Technical Education

Minister leh a thawhpui ten zinglam emaw zan lam emawa college naupang seat changlo tan an han ti pawh hi thingtlang college-a nitina kal ai chuan a tha daih ang. Kan college kalnaah chuan English-II-a kumtluana kan zir chu write the précis tih zawng hi a ni a. Kan precis ziah kha endik tu an awm leh tawh chuang lova, kha khan kan kumtluan ve deuh thaw mai a ni. Chuvangin, college hi Aizawl ah hi chuan a theih hram chuan tih tam nisela tih ka'n sawi duh a.

Tin, Industries Department Demand No. 40 ah khan sawi ka'n duh leh chu, hmanni ah khan thingpui ka sawi tawh a. Thingpui khawl hi anni tih chhuah leh Industry Minister te ruahmana din an ni a. A changtu ber pawh hi kan chiang tawh lova. Hei, Pu Gandhi-a pianni ni 2.10.2015 ah khan Times of India ka'n chhiar a. Tlangsam a Pu Lalzawna pawl inthlan dawn apianga tlawn an ngai ang deuh hian thingpui huana thawk ho hi inthlan dawn apiangin an tlawn a. Times of India a ziah dan chuan thingpui huan a thawk zawng zawng chu 20% bonus pek turin sorkarin a puang a. Central lamah Tribal Affairs lam an che ve leh thung a, Minister Jual Opam chuan Tea Tribe ho chu Scheduled Tribe ah nakum April thla hma in kan puang vek ang che u an ti ve thung a, Tea Tribe ho khuan MLA bial 33 ah an duh duh ti tling thei an ni tlat a ni. Chuvangin, an hlau tlat a, keini thingpui sih that peih loh huna Tea Tribe an lo luh ve loh na tur hian, Home Scale lama kan kal loh chuan tuna Tea India lo lut hi a hlauhawm lutuk avangin, Champhai District level Monitoring & Vigilance Committee kan neih pawhin ka sawi nasa a ni. Ka bial khua ah te pawh thingpui chin tum an lo awm nual mai a ni. Nakin zelah tu pawl pawl emaw ang tlawn ngai an awm lohna turin tan a ngai tawh. Times of India 2.10.2015 Issue ami chu ka chep thla nghe nghe a. Khatiang ang khan, tute emaw politic awmze nei lova tlawn ngai ho hi an awm lohna turin kan siam ngaiin ka hria a.

Tin, chu chauh nilovin, Assam sorkarin tuna tih ngei ngei tur an tih te chu bonus bakah Tea Board hian drinking water te, health te, hostel, school naupang tan scholarship te an ruahman ngei ngei tur a ni an ti leh tawh a ni. A chhan chu April, 2016-ah an inthlang mai dawn a, tan an la a ni. Khatiang ang a awm loh nan, kan politic a thianghlim zel theihna turin heihi ka sawi duh a ni.

Tin, a dawt lehah chuan Demand No. 23-na, Art & Culture hi ka sawi duh a. Art & Culture Department hi ti tha ka ti khawp mai a, Pipu sulhnu hlui humhalh te, India ram level a ASI aia recognize tura national importance a puan an han ti chhuak te hi a tha a. Ka bialah pawh Vangchhia a Pipu sulhnu te chu Zoram-a hmasa ber turin ASI chuan national importance-ah a puang tawh a. Vangchhia leh Lianpui khi a inang deuh reng a nia, Lianpui ami hi puan leh an tum mek a, Dungtlang leh Farkawn ami te nen. Thil hlui pawimawh tak tak mai, lungphun te hlai pui pui mai lungrem te a awm a. Khatiang ang an lo buaipui hi tha ka ti. Amaherawhchu, nichina kan ngaihthlak tawh ang khan Raja Ram Mohan Roy Foundation hnuaiia State Share Library sakna an han neilo thin te erawh hi chu a

pawi khawp mai a, an theih tawk tawk ah an thawk tha hle in ka hria a. Hetiang a an theih tawk a hma an lak chhoh zel hi tulin ka hria a, Pu Speaker.

Industry-ah hian han let leh lawk ka duh a. Oil & Natural Gas Commission leh Oil India ten oil exploration an nei tan a. Hmanniah kan Chief Minister-in a sawi ho naah min telh ve a. A thawk tur Group 'C' leh 'D' chu Mizo vek la rawh u tih te kan sawi ve nasa a. Helama tan kan lak chuan a theih zia chu a hminga tling lo tak chung a CYMA President ka nih lain Vety College an rawn din dawn khian Mizo vek la rawh u tiin an University Vice Chancellor, Vanhela, Imphal a mi kha ka phone reng mai a, tun thlengin hmel chu kan la inhmu miah lova. A tang nasa, 'za a sawmruk bak kan la ngai lo', a ti a. Mizoramah chuan tumah in la la ngai hleinem, za a za rawn la teh u ka tia. Hmun dang a mi daih te kha heta vacancy ah khan an rawn transfer a, 'heihi kan vacancy a in chhiar loh te chuan kan qouta in ti khat zo dawn a lawm,' kan ti a, kan dang leh a. An han chhiar tha leh a, cent percent Mizo an rawn la tlat a ni.

Tin, NEEPCO ho khan Tuirial an khuah tan khan chutiang bawk chuan kan ti a. Kan phone ngun lutuk kha an lo chho a, State Guest House-ah kan meeting a an hotute nen. Za a za chu kan la mai ange an tia, Vairengte ah IV Grade an la a, J.E. HPC in an kidnap zinga mi an tih te pawh kha khami tuma an lak zinga mi an ni a. Mizo vek kan lak tir tlat a ni. Chuvangin, Industries Department te leh a NGO thlengin vau hauh lovin, tha taka kan sawi khan tha takin min pe mai a ni. Za a sawmruk bak kan ti ngai lo an ti na a, kan dil kan dil kha chuan 100% min pe ve mai. Hmanni a kan kal pawhin Vety College ah pawh kha ta lak te kha H.A. te an lo kai tawh a, hmuh a nuam khawp mai. Kan tih vanga lak an nih chu an hre miah lo. Mahse kan lawm ve tlat a ni. Chuvangin, hetiang a Industries Department-in hetiang a hna tha taka an thawh lai hian Oil Exploration ah te thil chi hrang hrangah an tan chuan kan ram tan thil tha tam tak an la tih theih ka ring a. Chuvangin mike chhiat avanga mahni thutna ah sawi theih loh mahse Pu Speaker, luhlul chhuahin i phalna in thiante thutna atanga ka han sawi lui hram a ni e.

Tin, kan Minister zahawm tak tak pahnih Demand rawn putluh hi an thawh that em avang te hian leh an Demand te hi pass awm ngawih ngawih a nih avangin ka rawn support a ni e, ka lawm e.

SPEAKER : Awle, sawi tur dang kan awm tawh lo a nih chuan kan Minister zahawm tak Pu R. Romawia'n sawihona kha han khaihawm sela, chhan ngai a awm leh a chhang anga. Pass rawn dil nghal mai sela, amah i lo sawm ang u.

Pu ROMAWIA, MINISTER : Pu Speaker, hei vanduaithlak takin kan mike a thalo hlauh mai a, official lam te pawn theihtawp in min han buaipui a. Kan chawlh lailawk chung khan minute reilote ah a that te pawh kan beisei a. Amaherawhchu, a

pumpui in a tha thei lova, ruling lam chu hei kan han tha thei a, opposition lam an tha thei lova. Heti lamah an sawi chhung chuan mike nung an rawn hmang ve ang chu tih kan beisei a. Amaherawhchu, anmahni thutna han pelh an hreh a nih ka ring a, a pawl khawp mai a. Tuma thiamloh a ni lova, heng ang khawl thil te hi, zaipawl te pawn hla urhsun sak an han tum te hianin hetiang a chhe ta tlata sak theih tak loh te pawh a tam a. Amaherawhchu, hetu lamah a tha engemaw zat kan neihah hianin kan han kal thei hi a lawmawm ka ti a, kan chawlh chhung te a rei tham deuh a. Member te pawh sawi duh tam tak nei an la awm ka ring a, amaherawhchu, an inthlahrung tawh deuh a nih ka ring a.

Member te kha ka Demand hrang hrang, han sawi kha member 14 kan ni a, 11 khanin ka demand an rawn sawi a. A tlangpui thu in ka department chan ah te lawmawm an tih thu te an rawn sawi a, min ti hlim in min tiphur khawp mai tih kha ka han sawi hmasa duh a.

Tin, mi hrang hrang sawi kha hetah ka chhinchhiah vek na a, a hlawm deuh hlek in ka'n ti dawn ang a, min ngaihthiam ka duh a.

PAD kha chu mi pakhat chauh khanin a rawn sawi a, a sawi dan pawh kha a lawmawm khawp mai a. PAD hi a department a te a, development lam a khawih lo bawka sawi hi a hlawh vak lo thin a. Tun tum erawh chu mi pakhat khanin lawmthu sawi nan min rawn hmang hlauh mai a, min ti lawm khawp mai.

Tin, Demand No. 23-na, Art & Culture ah khan modern music zirna hi theih ang angin kan la kalpui zel a. Tin, Gandhi Memorial High School Museum, Mizoram a museum hlun ber kha Indian Museum, Kolkata tanpuina in sak that a ni a. En san/ngaihthah a ni lo a ni. Tin, Grant in Aid a subsidy kan han tih te pawh kha kan la pe ve hram hram zel a, amaherawhchu, tunah tak hian fund a awm loh avangin khami mamawhtu te khanin min ngaihthiam kan ngen a ni. Tin, RRLF ah khan in Rural Library sakna kha a theih ang angin kan la chhunzawm zel a, kan Minister kal ta khan thahnem a ngai em em a, hmun tam takah khan in an sa a. Tin, lo sak hmasak tawhte kha building te a lo chhe leh a, sak that rawn dilte pawh an awm a, heng ang te hi sum kan neih hunah kan la ngaihtuah dawn a ni.

Tin, Art & Culture hianin Mizoram Publication Board ang ah te pawh hian lehkhahu tha leh thuziak tha te pawh hi a chhutna te kan han pui a, kan han subsidise ve a. Amaherawhchu, sum harsatna avangin tah pawh hian chak takin kan kal hleithei lo a ni tih kha member ten min hriatthiampui kan duh a.

Tin, Art & Culture hi kan hnam robawm vawn thatna a ni tih member ten an rawn hria a, a pawimawh reng bawka, hei hi kan hnam zia engkima kan pholanna tur a ni a. Tin,

member zahawm tak ten min hriata kan duh chu, hmannah khan Arunachal lam nula in kan puanchei ni awm tak te Paris-ah te a zuk lantir a, khatih lai ah khan Mizoram chungung ngeiah pawh mi tamtak kha heng patent/geographical indication-ah te hian kan harh thar a. Amaherawhchu, Art & Culture hian kum 5 liam tawh atang khan kan han um zui ve daih tawh a, mahse kan kal chak hleithe i lo a, tunah hian chak deuh hlek a kal kan tum a, ZOHANDCO lam kan Managing Director in thahnem a ngai em em a, Art & Culture te nen kan tiho zel a, tunah hian Geographical Indication tur ang te pawh in hma kan la a, hlawhtlin ngei pawh kan inbeisei a, tah chuan kan puan design hrang hrang te pawh chutiang ang a hmalak ve mekna chu kan nei a ni tih kha he House hi kan hrilh duh a.

Tin, Higher & Technical lamah hian kan member ten in rawn ngaih pawimawh thliah thliah kha Serchhip District chungung Chhiahtlang ah tunah Polytechnic kha tan tum mek a ni a, a hma khan a hmun thu ah buaina deuh a awm a, Thenzawl lamah tihte, Serchhip ah, Chhiahtlangah in pawhna deuh a awm avang khan tih mai theih a ni lova, tunah hna kan tan dawn mek ta a ni. Tin, Lungleia Mizoram University Campus chungung kha UGC kutah a awm mek a ni a, hei hi Mizoram University thuneihna a ni a, kan officer te zuk kal hi chuan UGC-ah an theih ang angin an zuk remind ve zel a ni a.

Tin, Post Graduate zirna hi awm se tih hi kan duh em em thin a, tunah chuan Pachhunga University College lam hian ti thei se kan duh a, chu pawh chu Mizoram University peng kha an ni a. Tin, keini tuna kan inenkawl na mek ah hi chuan kan la zuam lo deuh hlek a, mi thanhnemngai te pawh in a subject zawng zawng ni lo, subject engemaw bikah te hi chuan M.A, MSc zirna hi College ah hian in attach chhoh theih ni se an rawn ti a, kan rilruah pawh a riak nghet khawp a ni. Amaherawhchu, chumi rual rual chuan kan ram zirna ah hian B.A., M.A, han chhuah belh zel hi a that rual rual in eizawna tinzawn lampang hi kan hnam hian a mamawh lian tawh zawk a ni lawm mawn le tih hi ngaihtuahna ah a awm a. Durtlangah khian Women Polytechnic kan nei a, kan zir chhuak te pawh hian in beautification lamah te, designing tih ah te, eng engemaw ah hian mahni a in tunnunna tur atan an bei nghal thei zel te hi a lawmawm kan ti a, chutiang chuan achievement a awm chho mek zel a ni.

Tin, Hospitality lamah te pawh hian in tih chhoh theih zel te pawh hi kan ram mamawh takte nin kan hria a, engpawh niselangin, hetih lai a zirna tluang kan tih mai te pawh hmalak chhoh zel hi kan duh em em a, sum lam harsatna avangin kan beisei ang erawh chuan in kan kal chak thei lo a ni.

Tin, Hnahtial Government Higher Secondary School-ah pawn Geography kha offer anih avangin Geography zir zawm zel duh engemaw zat an awm tih hria in rem leh remlo khan Hnahtial College-ah Geography kha han hawn a ni a. Amaherawhchu, in hriat theuh ang in Sorkar hian Sanction post te a siam thin a, sanction post nei lo chungung han tih a nih avang khan a sanction post turte hi kan dil ngar ngar a, mahse a sanction post hi neih a lo har em em mai a, kha

mi avang khan kan hriat reng pawh kha ti hleithe i lovin kan awm a, regular teacher pakhatmah an awm loh avangin affiliation te paih dawn ang a a lo lan ah phe i kha chuan keini department lam kha kan buai thei hle a, midang va awm tur an awm thei em tihte pawh kan dap nasa a, mahse lo indaihlo em em vek mai kha an lo ni a, kan Geography neihna ah te pawh khan. Mahse, tunah hian theihtawp chhuah in Hnahthial College a an affiliation paih loh nan, zirlai lo in admit tawhte beidawng taka an awm lohna turin tan lak chu kan tumin kan la mek baw k a ni.

He mi chungchang ah hian sorkarah wawi thum lai kan dil tawh a, mahse Finance Department lam atang hian sum awm loh avangin min lo hnar thla leh thin a, mahse kan bei dawng duh chuang lo a, vawiinah pawh kan dilna chu a la kal zel a, kan Finance Minister pawh in min lo hriatpui kan duh hle a ni. Tin, heti lai ah hian han sawi zau deuh ta ila, ram pumpui chungchangah hian college hrang hrangte kan nei neuh neuh a, kan college hrim hrimah te pawh hian zirtirtu kan indaihlo em em a, sanction post pawh kan luah khat lova, Highr & Technical bikah hian in Sanctioned Post 1260 kan neihah hian 1073 kan luahkhat thei a, fill up theih loh hi 187 kan nei a ni a, chungte pawh chu ka han sawi ve nghal duh a ni.

Tin, Revenue Department chungchangah hian ka rin ai khan kan member te khan in sawi lo zawk khan ka hria a, hengah te pawh hian sawi fe tham kha a awm a, minute 10 vel hun in neih ah khan han hman zawh vek na chi pawh a ni a. Tin, Khumtung problem kha bialtu zahawm tak Er.Lalrinawma khan a sawi a, keini ho hian kut kan thlak theihna hi town te, sub – town te, he mi chin aia hnuai ah hi chuan kan thlak hleithe i lova. Cadastral Survey an tih lai khan Baktawng Sub –Town chhung a awm kha an duh tlat lo mai a, tichuan Cadastral Survey ah khan Khumtung kha kan ti thei ta lova. Amaherawchu a hnu ah khan Baktawng Sub Town huam kha an rawn duh ve leh a, nimahsela, kan survey kha hmundang ah sawn zel a ngai a, Lungleiah kan tan a, Serchhip ah, Champhai ah, tunah Aizawl District ah, Mamit leh Kolasib pawh kan la lut hleithe i lova, khawmal va ti mai tur khan in kan remchang lova. Tin, Serchhipa kan thawktu te an indaihloh em em baw k si avang khan Khumtung kha an mamawh kan hre reng chungin kan la tih sak theilo a ni.

Tin, compensation pek chungchangah surveyor leh staff-te an lo tel leh thin a tih kha report kan dawn chuan action kan lo la ve zel a department in. Khatianga lo inrawlh leh action lak loh te an awm a nih chuan member zahawm tak te khan min rawn hrilh u lang kan lo enzui dawn a ni. Tin, heti laia SAAB kan tih hi a pawimawh em em mai a, a pawimawhna hi kan hre taw k lo a. Site Allotment Advisory Board hi khaw tamtak ah te hian an siam duh lo a, siam se tha kan ti a, heng ang kan sub-town te, kan town te, Aizawl khawpui ah ngei te pawh. Chungchuan ram mamawhtu tak tak te leh ram pek tlak an tih te kha rawn thlen se langin saw ti laia lo umzui kha keini Directorate te tan pawh khan a awlsam em em a ni a. Mahse, chutih lai ah chuan rin ai khan min phurpui lova, avang chu khawpuiah khan a Chairman-ah SDO emaw tin, a aia thingtlang deuh ah BDO te maw kha ruat kan duh deuh tlat a ni. Thil an tih dik loh pawh a Sorkar hnathawk kan hrem theih te ngei kha chair-ah a mawhphurtu ah tang se kan duh a ni, chu chu sorkar kalphung a ni. VC ringawt mai te han tih khan anni kha sorkar hnathawk an nih loh avang khan an chungah

action lak mai na dan kha a awm siloh avangin SAAB ah pawh khan VC te chairman leh VC tena an rel ang ringawt a kha pawm har kan la tih avangin kan official te ngei kha chair a dah ngei kha kan duh a. Chumi te ho ngei a khati lai khawtlang hruaitute pawh khatianga committee member an nih a khatiang kha kan duh a. Amaherawhchu, kan beisei angin tilai ah pawh hian an rawn kal chak theilo a ni. Tin, thuitak ka sawi lo ang a Pu Speaker, keimahni department ho ina hma kan lak ve na a bik takin revenue-ah hian han sawi duh ka nei a. Mipui te hriat tur he House kaltlangin kan chah duh a.

- 1) VC ten inhmun chauh lo chu 1953 Mizo District Act atang khan an khawchhunga in hmun chauh lo chu agriculture land emaw kha pek theihna an nei lo.
- 2) Tin, Aizawl khawpui chhungah bik chuan restricted order puan a ni a. Hei Mizo District Council Act Section 3(1) in a sawi ang khan khawpui chhungah bik khan hemi dan hmang hian in Lunglawn Lunglei district te Zohnuai, Zotlang, Lunglei district te, Aizawl ah Chaltlang 'S' ('N' Chaltlang a awm avangin Chaltlang kan tih khi Chaltlang 'S' tih ani) Tin, Melthum, Zemabawk te kha tah khan executive committee Mizo district council phalna la hmasa lo in tumahin inhmun an pe thei lo ang tih kha 1960 June ni 9-ah khan notification chhuah a ni. 1960 June ni9-ah khan heng khua Lunglawn, Zohnuai, Zotlang, Lunglei district te, Chaltlang 'S' te, Melthum te, Zemabawk ah te hian VC khan inhmun an pe thei tawh lo a. Tin, ram phei chu an pe thei lo leh zual a ni.
- 3) Tin, chumi hnu ah chuan 1971 December ni 23-ah khan hemi dan tlawhchhan bawk hian Mizo District Council House Side Act, 1953 tlawhchhan bawk hian protected area ah Luangmual, Tanhril, Sakawrtuichhun te kha puan leh a ni a. He 1971 December ni 23 atang hian VC in Mizo District Council phalna la hmasa lo chuan inhmun pawh huan, lo ram reng reng a pe thei lo a ni. Tin, hemi hi dan dinglai hlawm a ni a. Dan a ding a inva um chak lo ve inti anih chuan dan hi zawm tlang ila chuan um hran pawh ngailo hial tur a ni a. Engpawhnise, tilaiah hian ram te a hlu a, mihring duhamna te a nasa a, heng ah hian dan kha zawm theilo kha kan lo tam thin a ni.
- 4) Ram emaw inhmun emaw lei turte reng reng in Revenue Department-ah an hmun lei tum kha pass dik anih leh nih loh fiah hmasak ni thin se. Record kan nei vek a, kan Revenue Department ah hian chungah te chuan tu pawhin ram an rawn zawrh thei a, kha a ram zawrh a kha a lem ani em? a him em? a dam em? pass a nei em? tih kha kan Revenue Department ah khuan vengtin khu register bu hranin kan siam vek a, khang ah khan ram neitute an Chiang em em a ni. Chung atangte chuan en hmasak ni thin sela, tun ang buaina kan tawh tam tak hi pumpelh theih a ni. Tin, land lease lo hralh mai pawl hi an awm a, abik takin kohhran hian anlo ching leh deuh thin a, land lease hi englai mahin hralh phal a ni lo. Mi in a hmanna tur dik taka a hman tawh loh chuan sorkar ah a surrender leh ang a, chuan free land alo ni leh te te ang a, Sorkar in a mamawh tu hnenah a pe leh tur a ni. Heng hi Zoram mipui ten hrechiang ila tih kha he House kaltlang hian ka rawn ngen tak meuh meuh a ni.

Tin, Pu Speaker, a tawp berah chuan.....

Pu P.C. ZORAM SANGLIANA : Pu Speaker, khawngaihin point of clarification a rem chuan khatia VC pass te district council hun atanga 1953 te, 1960 te, 1971 te tuna kan Minister zahawm takin khang dan tlawhchhan kha tha tak kan lo nei si a. Tunah hian khang dan bawhchhia kha kan han sawina veng hrang hrang angah te khan tam tak awm hi engtin nge kan tih tak ang? Hetia an awm ang ang hian kan kalpui mai dawn em niang?

*Speech not corrected

Pu R. ROMAWIA, MINISTER : Chumi vang tak chuan ania mihring duhamna hi harsa deuh ania, Kristian Vanram kawngzawhah pawh khan lungngaihna chirhdup ah leihlawn dawh an han tum thin a khawvel sualna te a nasa a, alo chim pil leh thin a tih kha ni a, khatiang deuh kha kan ni. Engpawhnise, tikhan ka'n sawi kha hria ila, a tha in ka hria a.

Pu Speaker, ka thu kharna atan Revenue Department hi mipui hian min zuam in min ngam hle a, a thlawn a ram kan pek te hi lawm tak aruanging min khin a, min chawi tir tawk hi an tum zel niin a lang a, a vanduai thlak khawp mai. Sim vek tlan ni thei se a lawmawm hle ang. Awle, Pu Speaker, ka demand No.6 – Land Revenue & Settlement department - ₹ 25,17,68,000 crore te, 12-na – Parliamentary Affairs department - ₹ 51,93,000 lakhs, Demand No.21 – Higher & Technical Education department - ₹ 2,28,53,47,000 crore, Demand No.23-na Art & Culture department - ₹ 9,98,98,000 crore, A vaiin - ₹ 2,64,22,06,000 crore te hi he House hian min pass pui turin ka dil e.

S P E A K E R : Awle, tunah khan kan minister zahawm tak Pu R.Romawia'n a demand 4, Demand No.6-na, 12-na, 21-na, 23-na a pawisa hman tur a zavaia belhkhawm in ₹ 2,64,22,06,000 crore pass pui a dil a, pass remti zawngin 'remti' ti ru le, remti lo kan awm em? Awmlo. Tichuan, Pu R.Romawia department chan 4 atana a pawisa hman tur ₹ 2,64,22,06,000 crore chu he House hian lungruual takin a pass a ni.

Pu R. ROMAWIA, MINISTER : Pu Speaker, ka lawm e.

S P E A K E R : Tunah hian Pu H.Rohluna, minister zahawm takin a demand No.20-na, 40-na, 44-na pawisa hman tur kan discuss na kha han wine-up sela, pass rawn dil nghal ve mai sela a tha ang e.

Pu R. ROHLUNA, MINISTER : Pu Speaker, ka lawm e. Member zahawm tak takten ka department enkawl te ngaihthlak hrehawm zawng leh engemaw zawnga han sawi awm miah lo in tha takin min han sawi sak a. Chutih lai karah kan mike te an chhia a, kha i veilam a thu kan member te an thu tluan thei ta lo niin ka hria a Pu Speaker pawl ka ti khawp mai a. Hei vawiina ka demand hi a hmasa berin Demand No.44-na – Trade & Commerce department ah han lut ta ila, member 9-in Trade & Commerce department min sawisak a. New Market chungchang kan member

zahawm tak tak ten an sawi building sak that tur chungchang te, seat grading chungchang te sawia, department in hma kan lak chhoh zel na ah chuan seat awmna in ang lo lutuk chu nitina an thil hralh chhuah te a in ang lo a, seat tha leh tha lo te a awm avangin siam that dan a awm lawm ni tih ngaihtuahna kan neih avanga kha thil kha ti kan ni a, amaherawhchu tunah engmah thutlukna kan la siam rih lo a ni. Enchhin a, thli thlai kha kan han duh deuh vang a ni.

Tichuan Pu Speaker, member ten an han sawi tam tak hi han react tehchiam tur a awm lo a, amaherawhchu a department in a hma kan lakna tlem han tarlan ka duh a, Trade & Commerce Department ah. Tunah hian Trade & Commerce Department hianin market 224 hi Mizoram pumpuiah kan enkawl mek a, tichuan mi sang tel in helai kan market, kan bazaar enkawl ah hian eizawn nan an hmang mek a ni, tichuan kumin July thla thleng hian sawrkarah revenue nuai 139 leh sang 2 leh 840 an chhung lut tawh a, member zahawm tak tak ten an han sawi rik market building chungchang te pawh kha theih ang ang in department in hma an la mek a tunah hian Aizawl New Market ah NEC atangin ₹ 1300 Nuai sengin sak that tum a ni a, chu chu tun hma a sa zawrh nan te, second hand zawrh nan te an lo hman thin a kan avang khan thiah loh theih loh in a awm a, nikum ah kan thiat a, tichuan a sak thatna tur NEC lamah kan Chief Minister zahawm tak in a ngaih pawimawh a nih avangin a ni kaltlangin sanction kan hmu a, tunah hian first installment hi cheng nuai 468, 16th June khan kan hmu tawh a. A sakna tur, a bul tanna, a lungphum te pawh kan phum tawh a, sak thuai tum a ni a.

Tin, Aizawl New Market hi kan hmun neih that ber a ni a, tuna kan building hlui ti mai ang, kan main building ber hi LAD atanga Trade & Commerce Department in kan rochun a ni a. Tuna a main building pawh hi a him tha tawk tawh lo a ngaihna te a awm a, foreign lane lampang, Chhinga Veng hnaih lampang te pawh kha, a building a hlui tawh hle a, tin a chhak lama mi A- Lane te pawh. Chuvang chuan sak that tumna kan sawrkar in nasa takin a nei a, hmanni lawkah tun thla ni khat khan kan Home Minister ho in Finance Minister te, UD & PA Minister te, Planning Board Vice – Chairman, Chief Secretary te leh a kaihnawih department Commissioner leh Secretary te nen Chief Secretary conference room ah hemi chungchang hi sawi ho a ni a, hei hi a theih ang ang in changkang takin sak that nise, ti in rel a ni a. Tichuan a sum estimate ah pawh hian ₹ 500 vaibelchhe aia tlem lo hianin ruahman ni sela, tichuan tunlaia shopping mall changkang tak an tih ang te pawhin hei hi sak that tum nise tiin rel a ni. Tichuan a theih ang angin bawhzui tum a ni a, lawmawm deuh mai chu Planning Department in a theih ang angin hma min lakpui a, chuvangchuan a hlawhtlinna pawh kan hmuh chhoh theih pawh kan beisei lehzual a ni.

Tichuan Mission Veng Market building hi ₹ 598 nuai leh sing 4 leh 1000, in sak that tum a ni a, NEC atangin hei pawh hi a sanction kan hmu a, first installment ah ₹ 134 nuai leh sing 6 leh sang 4 hi kan hmu tawh a, tunah building hlui te pawh thiah a ni tawh a, sak bultan mai turin tunah hian contractor in hma an la mek a ni. A hna hi PWD ah Trade & Commerce Department in deposit a ni.

Indo –Myanmar border trade, ramdang nen a in sumdawn tawna hi Trade & Commerce in a enkawl tel a. Pu Speaker, Zokhawthar Land Custom Station hawn mai theih loh ti a kan sawi kan sawi thin hi Union Minister of State for Commerce & Industry in 25th March, 2015 ah a rawn hawng ta a. Tichuan, Champhai leh Zokhawthar inkar hi World Bank pawisa in tunah a kawng zauh that a laih that hna thawh mek a ni a. Tichuan Zokhawthara Tiau Lei Bailey bridge hi siam that a nih theih nan Ministry lamah Department in chak takin kan nawr chho mek a. Zokhawthar Land Custom Station ah hian Burma ram chung lampang, Rih – Kalymyo Road thalo hi a ni ber a, hei pawh hi Ministry of External Affairs leh Myanmar sawrkar pawhin inbiakna nei chho zelin National Highway double lane a an tih theih kan beisei a, tichuan India in a theih ang ang in BRO te kaltlanga estimate an lo siam tawh hi Myanmar sawrkar ah pe in a construction work hi an hauh tlat avangin duh angin a kalchak hleithei lo a ni.

Tichuan, Myanmar Border-ah tho hian, Border Haat Myanmar Sorkar leh India Sorkarin agreement an lo siam tawh location pali Hnahlan, Zote, Saikumphai (Vaphai) leh Pangkhua ah te hian siam tum a ni a. Hemi atan hian DPR ₹ 50 lakhs theuh Ministry ah kan thelut tawh a ni.

Pu Speaker, Zorinpui, Land Custom Station hi kan Sorkar term hmasaah pawh khan hma chak tak lo lak tawh a ni a. Amaherawhchu, Lawngtlai atanga Zorinpui hmun hi kawngpui a thlen mai theih loh avangin harsatna min siam a. Tunah hian Kolodyne Multi Modal Transit Transport Road hi construction work zawh tep a ni tawh a formation cutting hemi a thlen hun hunah hemi hna, Zorinpui Land Custom Station hi, abul tan theih tura beisei a ni a.

Tichuan, Pu Speaker, thil lawmawm deuh mai chu, Myanmar lam, Mizoram chhim tawp atanga Myanmar ram Sittwe port atanga Zochachhuah, Zorinpui thleng, a lawng kawng leh kawngpui laih thatna tur hian Central Sorkar, Union Cabinet-in, hmanni mai October, 14 khan cheng vaibelchhia 2904 hi an approve a. He pawisa hi Myanmar Sorkarah India Sorkarin a pe ang a. Myanmar Sorkar hian Sittwe atangin Kolodyne rawn zawh chhovin lawng kawng an rawn siam ang a, Paletwa thleng. Tichuan, Paletwa atangin Zochachhuah a lo lut chho ang a, kawngpui National Highway grade-in Myanmar Sorkarin hma an la ang a. Hemi an tih puitlin hunah phei chuan, Mizoram hi North East kawtchhuah ah siam a ni dawn a. Chu chu a eng kan hmu tan dawn niin ka hria a, Pu Speaker, a lawmawm hle a ni.

Tichuan, Indo-Bangladesh Border ah hian Kawrpuichhuah ICP dinna turin hma lak chhoh zel a ni a. Hmanni, May 27 khan Union Minister of State for Home Affairs, Pu Kiren Rijiju leh Land Port Authority of India Chairman-in a hmunah an rawn tlawh nghe nghe a. Ministry of External Affairs lam atangin, Bangladesh-in a min pawmpui theihna turin, clearance kan neih theihna turin hma chak takin lak chhoh mek a ni a. Chutih chhung chuan a hmunhma te chei tha a hma lak chhoh zel a ni a. Tunah hian, Revenue lam atangin min tihfel sak mai dawnin kan hria a. PWD lamin a kawng Tlabung atanga Kawrpuichhuah thleng hi hma an la chho mek bawk a ni.

Parliamentary Secretary, Trade & Commerce Pu Joseph Lalhimpuia pawh Union Minister tawiaamin a va kal nghe nghe a. Hei hi chak taka hma lak chhoh kan duh a. Tin, a lei dawhna turah pawh Bangladesh clearance kan neih hunah chuan World Bank pawisa atanga hma a lak theih turah kan ngai a. Tichuan Pu Speaker, Trade & Commerce ah hi chuan ka duh tawk mai ang a.

Tichuan, Demand No.40-na Industries ah hianin Pu Speaker, han lut chhoh leh ta ila, a thain ka ring a. Industries hian NLUP hi kan khawih tel avangin, a trade ngah ber pawl kan nih ka ring a. First phase leh Second phase hi chu pawisa pawh beneficiaries te hnenah kan sem fel tawh a. Third leh Fourth phase hi tunah hian hmabak kan neih chu a ni a. Tunah hian cheng 10000/- a then hi chu pek tawh an ni a. Carpentry & Wood processing phase-II thlang tute chu cheng 7400/- pek an ni tawh bawk a, a bak auto-rickshaw thlang tute erawh hi chu pek kan la nei lova. Anni hi chu a hlawm a auto- rickshaw a pek tur te pawh an la ni ang a, tiang chu NLUP ah kan hmalak dan a ni a. Trade hi a tira min ruahman sak ai khan a tam tak em avangin, a tirah hi chuan Staff in daih lohna nen district Level-ah phei chuan Industries Department hianin staff kan nei tlem em em a, an indaihlo hle chungin theihtawp an chhuah a, department dang kal rual hi chuan kan kal chho ve bek bek zel niin ka hria a.

Infrastructure lamah chuan thui tak han sawi pawh a tulin ka ring lova, EPIP Lengte hi tunah hian chei that chhoh mek ani a. NEC pawisain ₹ Nuai 434 leh sing 9 leh sang 2 in tunah hian tui lakna tur te, brick wall fencing te leh water supply system te, hma lak chhoh mek a ni. Tichuan Bamboo Development Agency (BDA) lampang hma lakna hi han tarlang ve ta ila, Bamboo Development Agency hian bamboo handicraft cluster pariat an siam a. Chu chu Republic, Chite, Edenthar, Sesawng, Mamit, Kawrpuichhuah, Lunglei leh Teikhangah te a ni a. Heng hmunah te hian Training on Bamboo Handicraft programme kalpui mek ani a. Hetah hian a training te hian an hlawkpui chho hlein kan hria a ni.

Food Processing Sector hi a pawimawh hle a, Central-in National Mission Food Processing 'NMFP' hma an rawn la chho a, Mizoramah pawh kan tangkai pui tan dawn hle a. Chutih lai chuan Central in a rawn delink zingah a tel ta hlauh mai a, pawl kan ti hle mai a, Mizo entrepreneur helam a tui miten an thil siamchhuah te pawh thianglim leh tha tak tak te an han nei tan tawh a, an phur chho tan dawn chauh a, Central in an han delink leh tak si avangin engtinge kan kal chhoh tak zel ang tih erawh hi chu ngaihtuah deuh chu a ngai dawn ani.

Tichuan, Handloom and Handicraft lamah hian han kal leh ta ila, Mizoram Handloom Export Facilitation Hub Thenzawlah ASIDE fund in din turin kan inruahman a, tunah hian cheng nuai 115 kan nei mek a, hemi hian bul kan han tan chhova. Hemi atana ruahmanna (Project cost) chu cheng vaibelchhe 8 leh nuai 37 vel a ni a, mahse ASIDE scheme hi an rawn delink zingah a tel avangin Ministry lamah tih puitlin theihna turin theih ang angin kan

nawr chho zel a. A hna bul tanna turin kan Chief Minister zahawm tak pawhin 16th July khan a lungphum min phum sak tawh a ni.

Puantahtute hamthatna turin theih ang angin department-in hma a la a, Industry Department hian photo identity card hi 591 puantahtute hnenah a pechhuak tawh a, hei hi loan an lak nan te a pawimawh em em a. Thenzawl khua a State Bank of India pawhin mi 156 hi loan an pe tawh nghe nghe a ni.

Mizoram puantahtute tana tangkai tak tur Weaver Service Centre Chaltlang-ah Union Minister of State for Textile-in a rawn hawng tawh a, Apparel and Garment Centre, sorkar laipui project hi a lungphum chumi tum chuan min phum sak tawh bawk a. Hei hi reiloteah peih fel tura beisei a ni a, November thla tawp lamah hi chuan commission mai hi an duh tawh a, helaiah hian khawl chi hrang hrang 300 lai rawn bunin Garment Production Centre atan leh training nan hei hi rawn hman an tum a. State in kan tih ve tur a awm a, hei hi state sorkar lam atang pawhin a theih ang angin hma kan la chho mek a ni.

Tichuan, 10% rebate chungchang hi Pu Speaker, kan puantahtute tana thil tangkai tak a ni a 2006-2009 inkar vel a mi tawh tunah hian kan nawrchhuah sak tawh a, a pawisa pawh nikum khan 1st instalment chu sem a ni tawh a, hmanni lawkah Handloom Day kan hman khan 2nd instalment pawh hi sem a ni leh tawh a ni.

Tichuan, NERTPS hnuaiah hian Cluster Development Project cheng vaibelchhe 16 leh nuai 44 hi central-in min sanction bawk a 1st instalment-ah hian vaibelchhe 3 leh nuai 58 hi kan dawng fel a, tichuan hma lak mek a ni tih hi kan member zahawm tak Pu Piana'n Sawlenga hma an lakna a lawmthu a rawn sawina pawh kha hemi fund atangin hian a ni a.

Tichuan, Integrated Skill Development Scheme hnuaiah hian cheng nuai 30 hmuh a ni a, hei pawh hi Cluster Development Scheme nen kal rual puiin puantahtute training nan hman zui a ni bawk a ni.

Tichuan, NHDP hnuaiah hian DPR pasarih tunah hian Ministry hnuaiah kan thehluta vaibelchhe 19 lai hetah hian kan thehluk chu a ni a, chu chu Ministry lamah kan umzui mek a, tunah hian approval stage-ah awmin kan hria a.

Tichuan, ram pum huapin a vawikhatna atan 7th August khan National Handloom Day hman a ni a. Handloom lama hma latute leh hemi tih hmasawn zelna atan hian tangkai turin Central-in a hria a, ruahmanna a rawn siam a, chu chu helamah pawh ngai pawimawhin kan lo hmang ve a. Chief Minister-in min hmanpui nghe nghe a, a la tha dawn viauin a lang a ni. Chu chu a tlangpui thu in Industry lama ka sawi theih chu a ni a.

Geology and Mineral Resources, Industry Demand hnuai a mi tho kha han sawi tel ka duh baw a. Revenue collection, nikum 2014-2015 ah khan vaibelchhe 3 leh nuai 72 leh 62617 hi a department hian sorkar-ah an chhunglut a. Tichuan April, 2015 atanga August, 2015 thlengin ₹ 2,28,65,582 hi sorkarah an chhunglut tawh a ni. Tin, royalty rate te pawh hi stone leh sand tepawh tihpun chhoh a, revise a hun tawh lawm ni tiin tunah department in an ngaihtuah chho mek a, Cabinet approval turin tunah hian kan process mek a ni.

Tin, resource mapping hi sandstone leh balu ah hian survey of India toposheet zul zuiin hmalak tawh a ni a, North East leh North West Area chhungah neih a ni a. South East leh South West ah hian neih mek a ni baw a. Blasting Design stone quarry neite tan pawh hian kan mithiamten an siamsak thin a. Amaherawhchu, quarry enkawltute hian duh angin heng blasting design te hi an zawm tha lo thin hi a pawh kan ti a, department-in theih ang angin an monitor zel a ni.

Tichuan, leimin leh tlakhniamna hmun 16 department in investigation an nei tawh a. Seismic vulnerability assessment leh risk evaluation of Aizawl Municipal Council Ward No. 5 leh 9 na te hi tih tawh a ni a, tunah hian a report an buatsaih mek a ni.

Member tamtak te'n Industries Demand a an han sawilan tam ber hi chu Gas Exploration chungchang hi a ni a, Gas Exploration hi a nodal Department kan nih angin hma kan la a. ONGC in Meidum-a Gas an hmuh hnu ah, tunah hian Zanlawn-ah ngawrh takin drilling an bei leh mek a, metre 3500 an target a nih laiin, tunah hian 2500 hi an thleng hial tawh in ka ring a. Zanlawn, Tawitaw hmunah khuan in hma an la mek a ni. Zanlawn an tihzawh hnu ah hmundangah an insawn leh ang a, ONGC hian hma an la mek a, anni hi a hmarlam chan an ni a.

Tichuan, a hmun laili deuhah Oil India Limited in tunah hian Maubuang ah an verh mek a. A verh tur target hi metre 4500 a ni a, an revised na ah metres 4154 ah hian tawh an ti a. Tichuan metre 4154 an verh hnuah an duhtawh ta a. Tunah hian perforation, khumi an verhna a pipe phum perforate hna an thawk mek a, gas awmna tur zawn ni a an rin lai lai khu a pipe an verh pawp a, a hnuai ber atangin an tan chho a. Tin, wawiin lam hian eng level chiah nge an thlen ka hre lova, metres 3600/3700 bawr vel ah hi chuan beiseina sang tak an la nei a ni. Tichuan metres 4000 bawr vela an verh chuan an duhtusam ang chu an hmu lo na a gas chu a awm a ni tih chu a Chiang a. Mahse, a awmdan chiah hi confidential a nih avangin helaiah han sawi thui vak theih chi pawh a la ni lova, nakin-ah official-in a puangtu tur ten an la puang turah kan ngai a. Gas awm hi eng ang reserve nge awm a, buaipui tham tak tak tur a ni em tih erawh hi chu la finfiah a la nilo a ni.

Tichuan, kumin chhung hian Keifang location ah Oil India Limited hian insawn chho hman a, verh hman kan tum a, chumi tur chuan tunah hian an inbuatsaih chho mek a. An harsatna ber a kawng han zauh leh han siamthat vel pawh tunah hian an zo tawh a. Chuvang in Maubuang-an zawh ve leh Keifangah an insawn chho leh dawn a ni. Tichuan, Phulmawi hi an buaipui mek bawk a, Thenzawl hi peihsa reng a ni a, verh theih maiin, amaherawhchu, a hmaa a verhtu tura an lo tih tawh an cancelled te'n court-a an khin avangin duh angin Thenzawl a kal chak thei ta lova. Chu chu tunah hian gas exploration lamah hma an lakna a tawi thei ang bera ka'n sawi theih ni mai se la, Pu Speaker, a thain ka ring a.

Demand No. 20-na School Education lamah han kai ta ila, Pu Speaker, member 13 in School Education Demand min sawisak a, a lawmawm hlein ka hria a. Han ngaihtlak hrehawm deuh pawh awm lovin a thenah phei chuan lawmthu han sawina ri kan han hriate khan min ti phur a, min ti lawm em em a. RMSA secondary school leh school thenkhat han inbawhthuah chungchang te sawi rik a ni a. Hei hi a pawl khawp a, school lo kal thua a awm hi. Pu Speaker, i bialah te pawh a awm ka hria a, chungte chu duh angin tun thlengin kan la inching fel hleithei lova, a theih ang angin Department-in hma kan la chho zel a ni. Tin, school building chhia chungchang te pawh kha member zahawm tak takte'n an rawn sawi a, hei hi sum harsatna avang in kan duh angin kan chei tha thei lova. Tunah hian a chhe zual tak tak, elementary school, (primary school leh middle school) thawm that ngai zual tak tak, a hmuna an enfiaha kan officer-ten tul zual an tih chu a theih ang anga han thawm that chu tunah hian kan tum chho mek a ni.

Tichuan, member zahawm tak Pu R. Vanlalvena'n a han sawi lan Assembly Starred Question chhanna leh Zalen chanchinbuin a tarlan school kal lo zat inmil lo tih chungchangah khan Zalen chanchinbuin a chhuah 1734 hi school kal lo hnathawk zat an ni a, a bak 931 te hi thla khat aia rei kal tawh lo an ni thung a. Tichuan, kal lo zat chu khami chhannaah pawh khan 1734 leh 931 belh khan 2665 a ni a, hei hi Assembly Starred Question-a kan chhanna a ni. Tichuan, 931 kha Zalen chanchinbuin an lo belh hmaih palh a nih hmeh.

Tichuan, zirtirtute census leh election leh E-roll vela hman chungchang kha sawi rik a ni a. Hei hian zirna a tibahlah angreng khawp a, a chhan chu an duty hi an kalsan nasa lo thei lova, amaherawhchu, kan thu bawk si lova. Election Commission leh Census of India-in an rawn ruat miao kha chuan zawm loh theih a ni bawk si lova. Tunah phei chuan electoral roll chungchangah pawh hian BLO atana kan zirtirtu an ruatte phei chu school an kal hman mang lo emaw tih mai tur a ni. Ni hnih ni thum hi an han thang a, school an kal dawn chauha thildang tih tur a awm leh zel a. Chuvang chuan, zirna lam chuan hei hi a tuar em em a. Siamthat theih dan awm se chuan Department lam chuan kan duh ngawih ngawih a ni tih ka'n sawi lang tel bawk a.

Cyclone-in a tih chhiat kan building thenkhatte tun thlenga la sak theih loh nikum lama mite pawh kan nei a, pasarih bawr vel niin ka hria a, khung Suarhliapah te, Bualpui H ah te

leh hmun thenkhatah chungte chu rei lo teah a theih ang anga siam that hi kan tum a, hma kan la mek a ni.

Tin, zirtirtu indaih lo chungchang teacher-student ratio hi member-ten an rawn sawi chhuak nual a. Zirtirtu indaih lo zualpui phuhruk nan hian tunah hian MPSC kaltlangin zirtirtu primary school-ah hian 169 hi lak fel tawh an ni a, 60 phei chu posting la tih fel loh an ni a, a bak erawh hi chu tih fel tawh a ni a, an thawhna hmunah an thawk tawh a. Tichuan, Primary School-ah hian zirtirtu hi a thar 60 MPSC in recruitment an tih fel tawh. (Speaker : MPSC kaltlang lova lak theih hram dan a awm em an ti deuh ber a nih kha. One time relaxation te kan ngen a).

Hei hi chu Pu Speaker, Department thu a ni chiah lova chuang chuan sawi thui theih ka nei vak lova ni. Tin, Middle School-ah hianin zirtirtu 34 nikumah khan lak tawh a ni a, tunah hian 102 hi buaipui mek, MPSC in written result an tihchhuah tawh, personal interview an la hmabaka. An rawn tihfel hunah phei chuan Middle School phei chu zirtirtu kan indaih sawtin kan ring a. Hei hi kan mamawhna zualah hianin posting pawh tih hram hram kan tum a ni.

Tichuan, kan indaihlohna ber chu Primary School-ah a ni a, chuang chuan, Primary School-ah pawh hian thingtlang lamah hian kan indaihlo zual a. Member zahawm tak ten an han sawi rik te pawh kha, thingtlang lam mi duhsak theih dan awmse an han tih te pawh kha Department pawhin a awm kan ti khawp a. Amaherawhchu, tun dinhmunah khatianga huang han zauh lutuk te pawhin, lo zauh thei te pawh ni tehreng ila, kan thulo chungin, zirna quality te pawh kan tih hniam phah thei ang em tih te thleng ngaihtuah tur tam tak a awm a ni. Tichuan, Primary School leh Middle School lamah enrollment ti pung tur hian Department lamin tan han la thei deuh se tih te kha a awm a. Hemi hi han tihpun chhoh theihna tur hian theih ang angin Department-in hma kan han la chho a, zirtirtu, a bik takin Primary School-te leh Middle School Zirtirtu Association-te nente pawh kan sawi ho thin a. Chung atang chuan tunah hian Early Childhood Care and Education, KG-I, KG-II atang te hian english medium in han tan chho ta ila ti te pawhin ngaihtuahna kan hmang a. Chung atan chuan tunah hian, tun Academic Session atangin school 66-ah hma kan la chho a.

Tin, english medium a a hma atanga lo leh tawh, 90 chuang niin ka hria a, chungte nen chuan a theih ang ang a kal kawp chho in hma kan sawn chho zel niin kan inhria a. Enrollment te pawh hetiang anih chuan a pung chho zel thei turah kan ngai a, chutiang chuan Department-in a theih ang ang in hma kan la chho zel a ni.

Tichuan, literacy percentage ti sang tur hian hmalak ni se tih te kha member zahawm tak ten an rawn sawi chhuak a, hei pawh hi Department a Adult Education lamin hma theih tawp in an la chho a, tunah hian kan hniam deuh bikna ni a kan hriat Lawngtlai District te, Lunglei District leh Mamit District lamah te hma lak chhoh zel kan tum a. Chutiang chuan, India ramah, keini a

ngai renga kan thut chuan midangin min lehpel chho zel thei ang a chuang chuan keini lam pawh kan tan ve zel a ngai a ni tiin theihtawp kan chhuah mek zel a ni.

Tichuan, zirtirtu quarter chungchang hi Pu Speaker, kan member thenkhatin an rawn sawichhuak bawk a, hei hi budget kal pangngai atang hi chuan tih ngaihna kan nei lova. Amaherawhchu, RMSA atang hian, tunhma RMSA a awm tan tirh atanga an lo sak tawh 141, Ladies Quarter tih te in a hming vuah a ni a, chu chu sak tawh a ni a. Tunah hian mamawh zualna 61 ah hian sak leh theih kan beisei a ni. Zirtirtu quarter chungchang hi Education Reforms Commission ah pawh khan tarlan a ni a. A recommendation tih hlawhtlinna turin a theih ang angin Department-in hma kan la a. NEC lam atang te, NLCPR lam atang te pawhin. Amaherawhchu, kan beisei angin kan kal tluang ta lo deuh a, theih tawp kan chhuah chho zela, tunah hian hlawhtlinna han sawi theih nei lo mah ila, beiseina sang tak nen kan kalchho mek zel a ni tih kha kan sawi lang tel bawk a. Tichuan, Pu Speaker, Department hmalakna tlem a zawngte chu han tarlan tel kan member-ten an hriat duh ka ring a, chu chu han sawilan telte pawh tha in ka hria a, hun ka hman rei lutuk lo ang chu maw.

High School Headmaster, Middle School Headmaster leh Primary School Headmaster-ah zirtirtu 325 lai mai promotion kan pe tawh a. Tichuan, contract Lecturer hi Higher Secondary School-ah 116, hei hi special deuhin Cabinet-in min remtih sak a, a lawmawm em a, kan sawi lang tel duh a. Tichuan, tunah hianin contract zirtirtu tho High School-ah hian 108 regularise turin phalna kan nei tawh bawk a, Middle School-ah hian zirtirtu 47, contract bawk, hei hi regularise tawh an ni a. Primary School-ah phei chuan 325 nikum atang khanin kan regularise tawh a ni. Primary School zirtirtu hi, nichina kan sawi tak ang khan, 169 lak thar an ni tawh a. ECCE hi Primary School 66-ah bul, tun session atangin kan tan chho a. Mid-day meal pawh tluang takin kan kalpui chhoh zel a ni tih he House hi ka hrilh duh a. Elementary zirtirtu, Primary School leh Middle School, Government leh SSA hnuaiia thawktute hi kumin leh nikumah khan, a thawktu awmsa te hi chu traning kan pe vek ta a. Kuminah, nikuma la training lo zawng zawng kha, kan DIET 8-ah admission pek vek tawh an ni a. Tichuan, sawkar hnuai leh SSA hnuaiia Elementary School (Middle School leh Primary School) a thawktute chu training kan pe ta vek a ni.

B.Ed pawh hi multi-mode in, hei pawh hi kan Education Reforms Commission recommendation tihlawhtlinna tho a ni a. Mi 200 in tun session atang hian training an nei chho mek a, hei hi Mizoram University-te nena tang tlangin special-in multi-mode in B.Ed hi kalpui a ni.

Tichuan, infrastructure lamah Education Centre, Treasury Square, Aizawl ah tunah hian ₹ 800 lakhs senna turin a lungphum hmanni lawk khan kan Chief Minister zahawm takin min phum sak tawh a. Tichuan, Education Complex & Rest House, Lunglei ah hian ₹ 120 lakhs senna tur hi Special Plan Assistance atangin kan hmu bawk a. Education Complex, Serchhip ah pawh chutiang tho chuan ₹ 122 lakhs in kan din dawn bawk a ni. Doordarshan Kendra, Aizawl nen School Education Department-in inremna siamin kar tin, nilaithawhtanni tlai dar 6 leh dar 6:30

inkar hian Department hmalakna hrang hrangte Doordarshan-ah puangchhuak turin, kan puangchhuak chho mek tawh a, hma kan la a ni.

Middle School leh High School zirtirtu RR siamthat a ni bawh a. Hetah hian, member thenkhatin an han sawi lan, subject bik zirtirtu tunhma a kan neih ngai loh, Mathematics leh Science zirtirtu kan mamawh zual puhru turin RR siamthat a ni a. Tuna Middle School zirtirtu 102 lak mekah pawh hman tan nghal a ni tawh a. High School pawh August thla khan RR peihfel a ni tawh a, High School zirtirtu kan lak theih hmasa berah he RR hi hman tan theih tur a ni.

Tichuan, School mapping leh School Education software, hei hi a pawimawh hle a, Pu Speaker, software hmang hian school hrang hrang awmna awlsam taka hmuh theih tura ruahman a ni a. Tichuan, school naupang awm zat te, zirtirtu awm zat te leh school academic record te hmuhtheih a ni dawn a, hei hi a hna pawh 85% zawh ani tawh a ni.

Pu Speaker, SCERT lam tawitein han sawilang tel ila. Introduction of New Text Book, 2015-16 tun session kal mekah hian pawl 1-4 thleng text book thar NCERT text book adapt-a hman mek a ni a. Tichuan English Medium leh Mizo Medium pawh a text inangin kalpui a ni.

Ka sawi tak zirtirtu training lo zawng zawng SSA hnuai amite leh sorkar school hnuai a mite hi training tir vek an ni a. Tunah hian zirtirtu 2020 nikum leh tun session tharah hian admit an ni.

Tin, DIET hrang hrangte leh SCERT ah hian building hi tunah 9 lai mai crore 1 chuang theuhin hma lak chhoh a ni a. DIET, Lungleiah hian hostel building hi sak mek a ni a, cheng nuai 216 leh 31000-in, DIET, Champhaiah cheng nuai 241 leh 46000-in, DIET, Kolasib-ah Institution building cheng nuai 279 leh 25000-in, DIET, Mamit-ah Institution building cheng nuai 223 leh 46000-in. DIET, Serchhipah pawh hian Institution building cheng nuai 274 leh 38000-in. Tichuan, hna la tan chiah loh tender tawh DIET, Lawngtlaiah hian Institution building nuai 233 leh 53000, DIET, Saiha-ah pawh Institution building cheng nuai 233 leh 70000. Hei pawh hi tender tawh, hna hi reilotea tan theih tura beisei a ni a.

SCERT Office, Complex-ah khuan multi-purpose building cheng nuai 175 leh 68000-in sak tum a ni bawh a.

DIET, Aizawlah hian hostel building, hei hi technical sanction an nei tawh a, tender la chhuah chiah loh a ni bawh a. Chutiang chuan a chak thei ang berin hma lak chhoh zel a ni. Aizawl DIET-ah hian Computer Study Centre kuminah hian kan hawng bawh a. Zirtirtu training-te leh staff-te tan certificate course in computer a zir theih a, a tangkai dawn hle a ni.

Tichuan, Pu Speaker, detail lutuk a ngai tawhin ka hre lova. SSA fund atang hian school building – Primary School te, Middle School-te a chhe zual lutukte hi chu a theih ang angin thawm that kan tum mek a. Free text book hi naupang 134510 hnenah hian kuminah pek a ni a. Free uniform hi naupang 120906 hnenah pek a ni.

Pu Speaker, school grant-ah hian ka sawi duh chu Primary School leh Middle School-ah pek thin a ni a. Primary School-ah hian sorkar leh sorkar aided-ah – Primary School bikah ₹ 5000/- kum khatah pek a ni a, tichuan Middle School-ah hian ₹ 7000/- pek thin a ni a. Hei hi dik takin an hman em tih hi kan member zahawm tak takte pawn anmahni bialah min lo enpui thei sela a lawmawm khawpin ka ring a.

Maintenance grant ₹ 7500/- school 1 tan hian sorkar school bikah pek a ni a. Heng grant-te hi an hman that tawk loh avang thin a ni em aw tih theih tur, pawisa tlem tea school han thawm that theih tur hi school thawm that mang loh te a lo awm thin a, hei hi a pawis hle a. Chuvang chuan bial fan pahin kan member zahawm tak takte pawhin min lo enpui theih chuan a lawmawm hlein ka ring a.

Tichuan Pu Speaker, a dang pawh sawi dawn chuan sawi tur a tam a. Mahse tikhan ka duh tawk mai dawn ang a, ka sawi rei tawhin ka hria. Member zahawm tak te'n dawhthei taka min ngaihthlak sak avangin an chungah lawmthu ka sawi a ni.

Tichuan, Pu Speaker, ka Demand No.20-na, School Education Department ₹ 9,09,97,21,000/-, Demand No. 20-na School Education Department ₹ 9,09,97,21,000/-, Demand No. 40-na Industries Department ₹ 59,25,91,000/-, Demand No. 44-na Trade & Commerce Department ₹ 10,40,69,000/-, Avaiin ₹ 9,79,63,81,000/- hi he House zahawm takin min pass sak turin ka han dil e.

S P E A K E R : Awle, tunah khan kan Minister zahawm tak Pu H.Rohluna'n a Department chan 4, Demand No. 20, 40, 44 a pawisa hman tura ruahman azavaiin ₹ 9,79,63,81,000/- pass sak turin House a dil a, pass remti zawngin 'remti' ti rawh ule, (Remti) remti lo kan awm em ? kan awm lo, tichuan Pu H.Rohluna, Minister zahawm tak, chan department 4 a pawisa hman tur a zavaia belhkhawm ₹ 9,79,63,81,000/- chu he House hian lungrual takin a pass a ni.

Pu H. ROHLUNA, MINISTER : Pu Speaker, ka lawm e.

SPEAKER : Awle, vawiina kan tihtur chu kan zo thei ta hram a, kan chawl rih anga, naktuk tahrak ni 20.10.2015 (Thawhlejni) zing dar 10:30 a kal khawm leh turin i haw rih ang u.